


Lukri Né Kena



Wagi: Lukri Né Kena Portions

Lukri Né Kena
Wagi: Lukri Né Kena Portions
Luk long tokples Wagi long Niugini

copyright © 2016 Wycliffe Bible Translators, Inc.

Language: Wagi

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 11 Nov 2022 from source files dated 29 Jan 2022
6967869f-9588-59ed-91d2-0158edb59705

Contents

LUK	1
---------------	---

LUK

Né Ura Koptak

Lukri Né ge danah wénih Luk qe yan. Nug ge dokta am Grikrer. Nug danah nusgur am danah lawardi Tiwur pi dosi qe ole olag mefe mérigri né ene yan. Tiwurdi Né os ge wénih Aposel qe ole Luk nug yan. Lukri Né e owa ge Luk Yesus kérdi wan ewa úriyan qeri yan: Nug oun os gattu owa de qe mariko peko buliko ow Tiwurdi uhribak éruddigri úriyan (19:10). Yesus danahas kunum asilag kug owari buliko diardigri úriyan (2:10; 2:30-32; 3:6; 24:47). Né Kena enewa, ig Yesusri o mousak hipunin danahas dilag nie qe ewqétu (6:20; 7:22; 14:11-13; 21:1-4). Ig nug o mousak as dilag qe ewqétu (né ene sillah 7:11-17; 8:2-3; 10:38-42; 13:10-13; 21:1-4; 23:27-31). Am nug o mousak nir nounu dilag qe ole ewqétu (né ene sillah 8:41-42; 54:55; 9:38-42; 9:46-48; 18:15-17).

Lukri Né Watiak

1. Né digumak (1:1-4)
2. Le Luarak danah Yon memnak am Yesus ole (1:5—3:20)
3. Yesus kekuak diguman (3:21—4:13)
4. Yesus Galili kekuan (4:14—9:50)
5. Yesus kekolle Yerusalem atan (9:51—19:27)
6. Kuha usih qe owa Yerusalem kérdi ban (19:28—23:56)
7. Yesus buliko fou meko asko am bégur gumarko wanan (sapta 24)

Né Digumak

¹ O danah nari Tiofilus, danah kurum la os ag tatam kérdi kérdi ig gamnigwa beko atan qeri né ene yeg. ² Ag né qe danahas ig mariweg duet qe sillah ole yeg.

Danahas qe digumakwa Yesus kérdi kérdi sew amlagwa peg qe, dimba ag Tiwurdi Néri kuak danah beg. ³ Da Luk da né qe digumakwa arereg ban qe peko kepaiko kouturin. Qeri da ole né ene kérdi kérdi kunum ban qe dimlamurko yarildi kena elle qe yin. ⁴ Danah nari Tiofilus, na né ismireg qe, né mefe qe doka ot mourdig.

Le Luarak Danah Yon Memnakri Né

⁵ Sén qewa Herod* nug king delle Yudia gumewew, pris† os wénih Sakaraia daré. Nug pris ameg Abiya qewari, am nug waw Elisabet ole a olele pris Aron furuh. ⁶ A olele Narinahri Ro am Né ole kunum dimlamurdap, qeri ge Tiwur a danahas mangunah qere pikan. ⁷ Gam a keinmanah am a nir kawa, kérdi Elisabet nug owa nir kawa. ⁸ Sén os pris ameg Sakaraia nug daré ole qe asilag sén kekuakri dewew ge, der os pris Sakaraia nug Tiwur nohwa kekuan. ⁹ Pris ag koulagwa wenglag ker masawa yeksi tourweg ge, Sakaraia wénih ban. Wénih bew ge, nug keprurweg Tiwur Lougwa noko ker ahu os kew kas murdig kena ole Tiwurdi mandigri nuan. ¹⁰ Ker ahu os kew kas murdig kena be ole qe nug manewew ge, danahas kunum dimdim qagleksi unuqoreg. ¹¹ Sén qewa Tiwurdi doup Sakaraia gumurko doko, qaréw ker ahu os murdig kena ole arelle dian qe séku kenariwa sirko dian. ¹² Dewew ge, Sakaraia aminko doup qe peko ge, nug wawtuurko ole fafan. ¹³ Gam Tiwurdi doup amegwa anan. “Sakaraia, na aw farwen. Tiwur unuqorak nasip duan. Na wat Elisabet nug nir danah memmanko mirdig, am na nir qe wénih Yon kataf. ¹⁴ Geisah nug

* 1:5 1:5 Herod ene Herod king dewew Yesus katleg ole qe memeg. † 1:5 1:5 Tiwur am danahas ole gamlagwa Tiwurdi ofa mak danah

dow, na ot gamag nafi asdig. Am nug durig qeri danahas la kuřum ole olag gamag asdig. ¹⁵ Keřdi nug Tiwur nohwa danah weniћ ole darig. Nug wain am le gagrag la qe ole ospi lew, am nug anig owa niewew, sen qewa ole Koulli Gun nug ole wittew dessa omaldig. ¹⁶ Nug anuřko Israel danahas kuřum omlarew ag olag buliew asilag Nafinah Tiwur gumdeksi dolag. ¹⁷ Profet† Elaisa gagragsak morew kekuan qe sillah Yon Nafinah noh oko anuřko attig. Atewew ge, nug sew nir memelgar ole ag olag usih nirig. Am nug danahas Tiwur nohwa tapewnak sesi qe omlarew olag buliew Tiwur o nie sillah diakri dahmelag. Qewa ge, nug sew Nafinah uririgri qeri danahas olag bawressi dalag,” eko anan. ¹⁸ Sakaraia Tiwurdi doup kořmoran, “Da qe areg ol meře merig? Keřdi da wal ole i keinmanah am i nir ole makri sen ertan.” ¹⁹ Tiwurdi doup nug kořewa oko anan, “Da doup Gebrel. Da Tiwur nohwa deina ole. Nug da meřilew nasip ne kena ene oko na amenwa andildi uriyem. ²⁰ Na doka koutor. Gei ole na ne kařdew ne ospi mariwen, keřdi na dasil ne ot meře pi me. Na dawew atewew nir nasip dow am bulika ne maririp. Da keř anem qe sen nusig morakwa berig.” ²¹ Sen qewa danahas Sakaraia dimdim berigri ameg meksi dessi dahmak kuřum og. “Aregri Tiwur Lougwa gun awen owa wagannah de?” ²² Sen nug dimdim ban ge, nug ne mariakri olele kawa. Ag nug Tiwur Lougwa kowol os pian ge, nug ewegwa ih sew peksi olag mouran, keřdi nug ne kařdan. ²³ Nug pris kuakri sen nusig qe malako ge, buliko lougwa atan. ²⁴ Qe dimba ge, waw Elisabet o ole meko, nug kalam tanig ole qe

loww ih dare. ²⁵ Elisabet anan, “Nafinah dasil o niew, nug sew da nir ole mein. Geri danahas nolagwa ura nak dorem ge, nug sew kawa man.”

Yesus Memnakri Ne

²⁶ Kalam 6 qere Elisabet nirdi weiewew, Tiwur doup nusig weniћ Gebrel qe meřorew taun nagur weniћ Nasaret qewa atan. Taun qe Galili atu owa de. ²⁷ Tiwurdi doup nug Tiwurdi ne oko as magun os danah ole ospi weiyes ole qe dowew atan. Nug danah os weniћ Yosep king Dewit fuřuhwari qeri feř orweg. As magun qe weniћ Maria. ²⁸ Tiwurdi doup nug gumurko atko amegwa anan, “Maria, na kena te dana? Tiwur nasip o nafi nie. Tiwur na ole dasa.” ²⁹ Maria doupri ne qe doko wawtuřko katat qew ge dahman, “Keř digurinah ne ene ane.” ³⁰ Gam Tiwurdi doup anan, “Maria, na aw farwen. Tiwur nasip o nie. ³¹ Geisah na ot ole meka nir danah os memanka am nug weniћ Yesus katař. ³² Tiwur sew nug binag nafi ole berig am nug weniћ Tiwur Karannah Bega eksi anlag. Nafinah Tiwur sew nug king beko alag dugiah Dewit king dare sillah darig. ³³ Nug Yakop fuřuh gumarelle king sansan darig. Kingdom nusig ge ospi kawa mew,” eko anan. ³⁴ Maria Tiwurdi doup amegwa anan, “Da danah ole ospi weyef gam, aregnah kowol qere dagnewa berig?” ³⁵ Tiwurdi doup kořewa oko anan, “Koulli Gun neko na tonirew gagragsak Tiwur Karannahri na qanřirdig. Qeri nir gunnah na memandip qe weniћ Tiwur Bega eksi anlag. ³⁶ Na doka koutor. Na liap Elisabet ole nug keinmanah, nug owa nir kawa eksi andew, gam gei nug

† 1:17 1:17 Tiwurdi ne oko mariak danah

kalam 6 qere nirdi weiye, géri nug nir ole darig. ³⁷ Keṛdi Tiwur nug keṛ os sakri ane ge, qe mou bérig.” ³⁸ Maria Tiwurdi doup koṛewa oko anan, “Da Naṛinahri kuak as, na né anam qe sillah bar.” Qere anew ge, Tiwurdi doup nug munurko atan.

Maria Elisabet Perig Atan

³⁹ Qe dimba wagam ole kawa, Maria bawarko usihri teko Yudia atu owa taun os qoukuwa, Sakaraia Elisabet ole des qewa atan. ⁴⁰ Atko Sakaraia lougwa wanew Elisabet peko sumdew ge, Maria ole Elisabet sumdan. ⁴¹ Sumdewew ge, nir Elisabet owa nian qe ole kawqan. Koulli Gun Elisabet wittew dessa dahmak moran. ⁴² Elisabet qalko Mariari anan, “Tiwur na as la kunum eṛarak wittak kena miran, am Tiwur nir na otwa nie qe wittak kena moran. ⁴³ Da ol gamag nah ase, keṛdi Naṛinah dasil anig peirḍigri uriyé. ⁴⁴ Na sumṛam qe dueppi ole nir da olwa ene gamag asew kawqé. ⁴⁵ Tiwur na wittak miran, keṛdi na nug anan qe beko mou murdigri ot meṛe man,” eko Elisabet Maria anoran.

Mariari Kasi

⁴⁶ Maria anan, “Da ol dahmak ole kunum Naṛinah morko binag meina. ⁴⁷ Da Tiwurdi ol gamag naṛi ase, keṛdi nug da hipunin dasil noh uwindi seko buliko wiṛan. ⁴⁸ Da Tiwurdi kekuak as sam, gam nug da dahmirko koutoran. Qeri gei digumak am dimba dimba ole danahas anlag, ‘Tiwur as qe wittak kena moran,’ éksi anlag. ⁴⁹ Keṛdi Tiwur Gagragsak Digu, nug dagrowa kowol danah sakri kawa qe sew ban. Nug wénih gunnah. ⁵⁰ Nug sew danahas nug faṛursi ole qe ag alalgar dugialgar ole ag nusig o duak owa dalag. ⁵¹ Nusig gagragsakwa kowol danah sakri kawa qe san. Nug sew danah ag

agégé binlag meg qe kum qétiég. ⁵² Nug king binlagri seréw qe dilag gagragsak sew kawa meweg, am danah binlag kawa sam daréw qe sew ag nug nohwa nafi beg. ⁵³ Nug danahas ke kawa qe ke kena nusigwa begaran am sew danahas kehlag ole qe ewlag sam qere ateg. ⁵⁴⁻⁵⁵ Nug kuak nir nusgur Israel danahas kehnanan. Keṛdi nug Abraham am algur dugiahur ole o duak nusig owa sansan diakri né fagqan qe dahmorko, ig alangar dugiangan agop ole qere sérig,” eko Maria Tiwur binag man. ⁵⁶ Maria nug Elisabet ole kalam kiam sillah dessa, am buliko kawagwa Nasaret atan. ⁵⁷ Elisabetri nir memnak sén dow ge, nug nir danah memnan. ⁵⁸ Nug gému ole asilaswari am leilti ag Elisabet nug Naṛinahri o duak naṛi owa dian qe dueksi, uriweg nug ole aṛié olag gamag asan. ⁵⁹ Deṛ 8wa ge nir féru gone kotṛakri sén dew, ag uriyég. Ag memeg Sakaraia wélqorlagri seg. ⁶⁰ Gam nir anig anaran, “Kawa, nir wénih Yon kataṛnig,” eko anan. ⁶¹ Anew ge, ag Elisabet anoreg, “Asilag atérwari ounté os wénih qere ole kawa.” ⁶² Am ag Sakaraia nir wénih oun kataṛdig qe dolagri ewlagwa nug perigri kowol seg. ⁶³ Seweg ge, nug keke os morweg yarigri ewegwa ih sew uksi morweg ge, “Nug wénih Yon,” yew peksi dorlag nan. ⁶⁴ Sén qewa ih Sakaraia nug koṛe koptew digumeko né mariyelle Tiwur binag suman. ⁶⁵ Danahas aṛié daréw ole qe né qe kunum duessi wawtuṛég. Yudia atu kunum qoukuwari danahas ag ole kowol qe neihwah marieg. ⁶⁶ Danahas kowol qeri né duessi olag meweg te meweg new ge aneg, “Nir ene keṛ danahnah bérig?” éksi aneg.

Kerdi Nařinah eweg§ Yon dowā dian.

Sakaraiari Kasi

⁶⁷ Koulli Gun Yon memeg Sakaraia wittew des, géri nug Tiwurdi né qe oko marian. ⁶⁸ “Nařinah Israel isanig Tiwur binag ménig. Nug danahas nusgur kehnardigri uriko keger asilgar ewlagwari buliko diaran. ⁶⁹ Tiwur kéhnigak danah os gagragsak naři ole ignéwa mew uriyān. Nug Nařinahri kuak danah king Dewit fuřuh. ⁷⁰ Algu Tiwur sew profet gun ag nusig né qe uksi marieg. ⁷¹ Nug danah qe gagragsak naři ole ig kéhnigrigri mew uřirig. Nug isanig keger am danahas are ag ig nouni dahmigi ole qe ewlagwari buliko wigri. ⁷² Tiwurdi o duak ig alangar dugiāngar ole deg am nug titwanak gun qe doug ospi katian. ⁷³ Tiwur nug alnig dugianig Abraham dowā né qe fagqān. ⁷⁴⁻⁷⁵ Nug ig keger isangar ewlagwari wigri né fagqān. Qeri ig pi fařhut, nug nohwa onig kunum morettu sansan mangu weiyettu gun dettu nug binag ménig. ⁷⁶ Am nir dasil Yon, na geisah Tiwur sew na Tiwur Karannahri profet éksi anirřlag. Kerdi na Nařinah noh oka anuřka atenna ih nusig orřip. ⁷⁷ Na danahas nusgur anardip: Nařinah hipunin asilag kusuřko buliko diardig. ⁷⁸ Kerdi Tiwur isanig o duak naři nie, qewa ge kem be sillah Nařinah kéhnigrigri saw kappari uřirig. ⁷⁹ Danahas gattuwa dasi am mousakri fařakwa dasi qe agop sonřelle nug ih ismigew Tiwurdi maror ihwa atnig,” eko anan. ⁸⁰ Nir qe dahmak am o mourak kena ole kena man. Nug atu

meirak danah kawawa daré, gam dimba Israel danahas gumarko wanan.

2

Maria Yesus Memnan

¹ Sén qewa Ogastus nug Rom atu qe kunum dilag king delle, nug řo os man: Danahas kunum atu qewa daréw ag wenlag yalagri řo qe man. ² Kurinius nug Siriari kuri danah naři delle ge, wenlag yakri řo qe diguman. ³ Am danahas kunum ag kawlag awen awen wenlag yalagri aseksi ateg. ⁴ Géri Yosep nug ole Galili owa taun Nasaret qewari am Dewitri taun Betlehem Yudia atu qewa atan. Kerdi nug Dewit fuřuh. ⁵ Nug Maria ole ařié wenlas yalasri ates. Maria nug Yosep urigri fég orřwak dewew am Maria nir urigri sén unaka dewew ole ates. ⁶ A Betlehem qewa dessa ge, Mariari nir memnak sén duan. ⁷ Sén qewa nug nir danah memnan. Nug ge nir anřakri. Maria nir qe lamen nařiwa saputko ge, doř dilag kelak awen qewa awen bawarko mew nian. Kerdi řo danah niakri lo qe ambew ag awen ole kawa.

Sipsip Gumarak Danah Tiwurdi Doup Ole

⁸ Sipsip gumarak danah ag Betlehem kaw qe mourak awen gisgar olewa sipsip asilgar gumareksi tuřan qewa deg. ⁹ Tiwurdi doup nug ag gumarko gamlagwa now ge, Nařinahri kamsahlak sonařko talilaran. Talilarew, olag nařinah fařan. ¹⁰ Am Tiwurdi doup nug ag anaran, “Ag aw fařweg. Da asilag né kenanah os oko uriyém. Né qe sew danahas kunum olag gamag naři asdig. ¹¹ Gei deř ewa Dewitri taunwa as os nir danah memanko maré. Nir qe hipunin noh asilag

§ 1:66 1:66 “Nařinah eweg Yon dowā dian” digu ge Nařinahri gagragsak Yon dowā dian.

* 2:11 2:11 Kristus ge Mesaia. Tiwur danahas nusgur buliko diardigri danah tořoran.

owegri seko buliko diarak danah am nug Nařinah Kristus.*¹² Ag nir qe peksi olag mourdigri ge kowol os ere pelag: Nir anig nug lamenwa saputko doř dilag kelak awenwa mew niewew pelag,” eko anaran.¹³ Tiwurdi doup nug né qe mariko malwew ge, usihri saw karan Tiwurdi doup ameg naři doweg qagleksi Tiwur binag sumessi kasi ireg.¹⁴ “Tiwur karannah nug kamsahlak gun olewa de. Am danahas wanwa Tiwur asilag o nie ole qe ag maror nusig owa dasi.”

Sipsip Gumarak Danah Yesus Pelagri Ateg

¹⁵ Sén Tiwurdi doup ag minareksi saw karan atweg ge, sipsip gumarak danah qe ag agégé né marieg. “Ig Betlehem atektu Nařinah anigé ole am keř bé qe penig.”¹⁶ Géri usihri atessi ge, Maria Yosep ole am nir yu qe doř dilag kelak awenwa niewew mariareksi piareg.¹⁷ Ag nir qe peksi ge, nir qeri né dueg ole qe danah la os taun qewari ole amlagwa aneg.¹⁸ Danahas ag né qe dueksi dahmak lanah qere og.¹⁹ Gam Maria keke kunum béksi ateg qe owa ih dewew dahmak naři oré.²⁰ Am sipsip gumarak danah olag gamag asewew Tiwur binag karan sumessi am binag messi bulieksi ateg. Keřdi ag keke kunum Tiwurdi doup anan qe sillah amlagwa peg am doulagwa dueg.

Yesus Memeg Anig Ole Oksa Tiwur Lougwa Ates

²¹ Deř 8wa Yosep Maria ole nir yu féru gone kotřak sén dow ge, wénih Yesus katřes. Nug anig o ole pi mak Tiwurdi doup wénih qe moran.²² Sén a Mosesri Řo yakwa gun kowol qe dimlamdeksa malweksa ge, a nir oksa Yerusalem Tiwur Lougwa Tiwur

ewegwa melasri ates.²³ Nařinahri Řo yakwa de ge, “Nir memeg anig ole nir danah anqakri memanas qe Tiwur ewegwa melas.”²⁴ Am Maria ofa oko Tiwur murdigri qe ole ses. Keřdi Tiwurdi Řo yakwa ane, “Kuhřil naři ařit kawa ge, kuhřil nounu masiksik fou kena mak ařit os pris mores.”

Simion Tiwur Binag Man

²⁵ Sén qewa, danah os wénih Simion Yerusalem qewa daré. Nug Tiwur nohwa mangu weiré am Tiwurwa ih daré. Nug Tiwur Israel kug asilagwari buliko diardigri qe ameg meré. Koulli Gun nug ole darap.²⁶ Koulli Gun sew nug duan ge, nug Nařinah dowari Kristus uřiyew peko tatam am mousdig.²⁷ Koulli Gun sew nug Tiwur Lougwa teko qewa dewew, Yosep waw ole Řo yakwa ane qe dimlamdeksa nir asilas Yesus oksa qewa tes.²⁸ Simion nir qe oko momowa ořako Tiwur binag sumko anan.²⁹ “O Nařinah, na atu kunum gumna ole, na né fagqen ge, na sewe nasip kuak danah da ol marorwa mousko atil.³⁰ Keřdi da amelwa danahas buliko diardigri danah uřiyen qe piém.³¹ Na nug keřřurka bawřurka mewe uřiyen. Qeri danahas kuřum atu kunumba nug pelag.³² Nug Yuda danahas kawa la qe am danahas naspar Israel dilag ole Tiwurdi kamsahlak gun ole oko uřirig,” eko anan.³³ Nir memeg anig ole Simion nirdi anan qeri dorlas nan.³⁴ Simion wittak marko am nir anig Mariari anan. “Nir ene Israel danahas kuřum sew tolalag am gagrag dalagri ole am nug Tiwurdi ih ismardigri toqoran. Gam danahas kuřum nug dimorlag.³⁵ Qeri danahas kunum dilag dahmak olagwa nie qe ambo mérig am na otwa qoum yako qetko attig,” eko anan.³⁶ Am as profet os wénih Anna. Nug

Fanuel aʀeg am Aser ater qewari. Nug keinmanah am nug gému ole nug oksa makaʀ 7 qer dessa, gému mousan. ³⁷ Géri nug qehʀas dew uʀiyew makaʀ 84 qer ban. Nug sansan tuqan kémun ole Tiwur Lougwa noko Tiwur binag mérigri kurdelle am unuqordé. ³⁸ Sén qewa ih nug Yosep Maria ole am nir asilas ole gumarko doko nir qeri Tiwur kena sam eko anan. Anelle ge, nir qe Yerusalem danahas kug owari buliko diardi-gri ameg meg qe anaran. ³⁹ Yosep waw Maria ole Tiwurdi Ró yak de qe dimlamdeksa kuak kunum malweksa ge, a kawlas diguwa Nasaret, Galili atu qewa bulieksa ates. ⁴⁰ Nir asilas qe gagragsak ole kena man. Nug dahmak kena ole ban am Tiwur wittak kena mordé.

Nir Nag Yesus Tiwur Lougwa Dian

⁴¹ Makaʀ dorog Yesus anig memeg ole a Yerusalem Nanʀurak Deʀdi† mallenwa attap. ⁴² Sén nug makaʀ 12 qer dewew ge, ag koulag qe dimlamdeksi Yerusalem mallenwa ateg. ⁴³ Sén mallen qe kawa mew, nug anig memeg ole bulieksa kawlagwa atepes ge, nalas Yesus nug Yerusalem qewa dian, gam a qe pi dues. ⁴⁴ A danahas ole aʀié atsi essa deʀ usih ge ates. Deʀ oswa ge a digumeksa Yesus mariessa aʀilaswari am leilti koʀmares. ⁴⁵ Sén nug ospi peksa, a nug marilasri bulieksa Yerusalem ates. ⁴⁶ Deʀ kiam qewa, a nug Tiwur Lougri kaʀ owa Tiwurdi Néri duak marak danah qe olagwa dewew pes. Nug ag né marieg qe doko ge koʀmaran. ⁴⁷ Ag kunum ole nusig duak marian qe am koʀmak buliko noh man qe ole dueksi dorlag nan. ⁴⁸ Sén

anig memeg ole nug pekxa ge, a ole katat aqatan. Anig anoran, “Nir dasil, na keʀdi i qere sitam? Na memen am da ole i dahmak naʀi nasip ollu mariyirah,” eko anan. ⁴⁹ Nug a koʀmatan, “A keʀdi da mariyirsa? A pi te dosa da Mem Lougwa deina?” eko anan. ⁵⁰ Gam nug né anatan ge, a olas ospi mouran. ⁵¹ Yesus nug a dimlamatew bulieksi Nasaret ateg. Nug anig memeg ole koʀlas dimlamurdé. Gam Maria nug keʀ keʀ beko atan qe owa ih dahmelle daré. ⁵² Yesus nug dahmak kena ole kena man. Tiwur am danahas ole nusig olag gamag asdé.

3

Le Luarak Danah Yon Né Kusuan

¹ Makaʀ 15 owa Taiberias nug Rom atu qe kunum dilag king daré. Pontius Pailot nug Yudia wan atu qe gumdé, Herod Antipas nug Galili atu qe gumdé, am kamaq Filip nug wan atu aʀit Ituria am Trakonitis ole gumatdé. Am Lisianias nug Abilene wan atu qe gumdé. ² Anas am Kaiafas ole a pris* dilag kuri darap. Sén qewa Sakaraia nag Yon atu meirak danahas kawawa dewew, Tiwurdi Né nugrowa uʀiyan. ³ Yon nug atu le naʀi Yordan mourak qe kunumba weiyelle né kuswelle danahas dilag anan. “Tiwur hipunin asilag kusuqrigri ge, ag olag buliew le luak os.” ⁴ Qe sillah profet† Aisaiari Né yakwa algu anan, “Danah os atu meirakwa qalko uʀurig. ‘Naʀinah uʀirigri ih bawres. Ih mangu mores. ⁵ Ollu kunum meglares am qouku nounu am qouku wagé wagé qe ole kunum mangu marweg uʀemqes. Ih mériak qe kunum

† 2:41 2:41 Nanʀurak Deʀ ge Yuda dilag mallen os. Sén Yuda danahas Isip darew qe, mousak nir danah anqakri nanʀaran qe dahmorakri sén. * 3:2 3:2 Tiwur am danahas ole gamlagwa

Tiwurdi ofa mak danah † 3:4 3:4 Tiwurdi né oko mariak danah

mangu mares, am ih goto goto ge bawres. ⁶ Danahas kunum Tiwur asilag kugwari buliko diardig qe pelag,' ” eko anan. ⁷ Danahas ameg naŕi Yon le luardigri gumdeksi ateg. Atweg ge, Yon anaran, “Ag mat nou bégur. Oun anew ag Tiwurdi uhŕibak uŕirigri unaka de qe eŕdeksi kum atsi? ⁸ Ag mefenah olag buliew pe, mou kena qe seweg bar. Am ag agégé ‘Ig Abraham fuŕuh,’ éksi aw anweg. Da ag anarina, Tiwur qar nisi ene oko sew Abraham fuŕuh belag olele. ⁹ Palangis qe ker kuardigri ifil diglagwa bawrak de. Ker are os mou kena ospi niweg pe, kuarko kewba touŕardig,” eko anan. ¹⁰ Yon qere anew ge, danahas kuŕum ag koŕmoreg. “Am ig aregnah sénig?” éksi aneg. ¹¹ Yon koŕlagwa oko anan. “Danah siot aŕit ole ge os ge danah siot kawa ole qe morar. Am danah oun nug ke ole ge nug ole qere ih sar.” ¹² Takis wak danah os ole le luarakŕi Yon gumdeksi uŕiyeksi koŕmeg. “Duak marak danah, am ig ge aregnah sénig?” ¹³ Yon koŕlagwa oko anaran, “Ag qarég takis wakri anak qe ih mangu os am aw qe éŕurweg,” eko anan. ¹⁴ Fan danah os ole koŕmoreg. “Am ig ge areg sénig?” Yon koŕlagwa oko anaran, “Ag danah aw keigarweg faŕareksi qarég marweg. Am ag danah aw yagoŕ mareksi qarég oweg, ag kuak asilag noh mangu olag gamag asakwa os,” eko anan. ¹⁵ Danahas ag Kristus[†] ameg méksi daréw, géri ag dahmak kuŕum og. Qewa ge ag kunum olagwa ih ere dahmeg. “Yon nug Kristus qenan te?” éksi dahmeg. ¹⁶ Géri Yon danahas kunum koŕlagwa oko anan. “Da lewa ih le luarina, gam geisah danah os da eŕlak nug gagragsak ole uŕirig. Da danah

kena kawa am nug fég gaŕa darér kusqakri olele kawa. Nug Koulli Gunwa am kew aŕikwa luardig. ¹⁷ Danah qe nug ifil kekuakri bawré de. Nug darweh owa reis mou ge, kepaŕko qagulko nug lougwa mérig. Gam reis gaŕa ge kew pi qouse ole qewa mandig,” eko anan. ¹⁸ Yon nug né la kuŕumba danahas doulag patelle am Né Kena ole kusuan. ¹⁹ Gam sén Herod atu qe gumewew, Yon Herodri hipunin uŕa kopatko gaŕa moran. Keŕdi nug kamag waw Herodias kaŕurko am nug hipunin la kuŕum os ole san. ²⁰ Am Herod nug hipunin nusig la os qe tuŕurko sew kuak danah nusig Yon uksi kalabuswa yaneg.

Yon Yesus Le Louran

²¹ Sén Yon kalabuswa pi atak delle danahas kuŕum le luarelle, Yesus ole le louran. Le lourak qe oko malako unuqorewew saw matlan. ²² Saw matlew ge, Koulli Gun kuhŕil sillah Yesus dowa new am Tiwur fag saw karandi anan. “Na nir dasilnah. Da nasip ol mouse am ol gamag ase,” eko anan.

Yesus Algur Wenlag

²³ Sén Yesus makaŕ nusig 30 keke qere dewew, kekuak nusig diguman. Danahas dahmeg ge nug Yosep nag éksi aneg. Yosep nug Heli nag. ²⁴ Am Heli nug Matat nag, am Matat nug Liwai nag, Liwai nug Melki nag, Melki nug Yanai nag, Yanai nug Yosep nag. ²⁵ Am Yosep nug Matatias nag, am Matatias nug Amos nag, am Amos nug Nahum nag, am Nahum nug Esli nag, Esli nug Nagai nag. ²⁶ Nagai nug Mat nag, Mat nug Matatias nag, Matatias nug Semen nag, Semen nug Yosek nag, am Yosek nug Yoda nag. ²⁷ Am Yoda nug Yoanan nag, Yoanan nug Resa nag, Resa nug Serubabel nag,

[†] 3:15 3:15 Kristus ge Mesaia. Tiwur danahas nusgur buliko diardigri danah toqoran.

Serubabel nug Sialtiel nag, Sialtiel nug Neri nag. ²⁸ Am Neri nug Melki nag, Melki nug Adi nag, Adi nug Kosam nag, Kosam nug Elmadam nag, am Elmadam nug Er nag. ²⁹ Am Er nug Yosua nag, Yosua nug Elieser nag, Elieser nug Yorim nag, Yorim nug Matat nag, Matat nug Liwai nag. ³⁰ Am Liwai nug Simion nag, Simion nug Yuda nag, am Yuda nug Yosep nag, am Yosep nug Yonam nag, Yonam nug Eliakim nag. ³¹ Am Eliakim nug Melea nag, Melea nug Mena nag, Mena nug Matata nag, am Matata nug Natan nag, am Natan nug Dewit nag. ³² Am Dewit nug Yesi nag, Yesi nug Obet nag, Obet nug Boas nag, Boas nug Salmon nag, Salmon nug Nason nag. ³³ Am Nason nug Aminadap nag, Aminadap nug Atmin nag, Atmin nug Arni nag, Arni nug Hesron nag, Hesron nug Peres nag, Peres nug Yuda nag. ³⁴ Am Yuda nug Yakop nag, Yakop nug Isak nag, Isak nug Abraham nag, am Abraham nug Tera nag, Tera nug Nahor nag. ³⁵ Am Nahor nug Seruk nag, Seruk nug Reu nag, am Reu nug Pelek nag, Pelek nug Eber nag, Eber nug Sela nag. ³⁶ Am Sela nug Kainan nag, Kainan nug Arpaksat nag, Arpaksat nug Sem nag, am Sem nug Noa nag, Noa nug Lamek nag. ³⁷ Am Lamek nug Metusela nag, Metusela nug Inok nag, Inok nug Yaret nag, Yaret nug Mahalalel nag, Mahalalel nug Kenan nag. ³⁸ Am Kenan nug Inos nag, Inos nug Set nag, Set nug Adam nag, Adam nug Tiwur nag.

4

Nou Memeg Yesus Qepian

¹ Yesus Yordan le minko atew, sén qewa Koulli Gun nug owa olele morew dessa Yesus omalko atu meirak danah kawawa

atan. ² Omalko atew ge, Yesus der 40 qere dewew, nou memeg* qepian. Am sén qewa Yesus nug kité ospi lan, géri der qe malwew ge nug laké qan. ³ Qew ge, nou memeg Yesuri anan, “Na Tiwur Bega daka pe, qar ene anwe ke buliar,” eko anan. ⁴ Anew ge, Yesus anan, “Tiwurdi Né yakwa ane, ‘Danahas kewa ih fou pi dasi,’ ” eko anan. ⁵ Anew ge, nou memeg Yesus omalko atu qoukuwa teko usihri Yesus wan atu kunum ismuran. ⁶ Ismurko anan, “Da na gagragsak mirwi wan atu e kunum gundip am da séwi binam nañi ole darip. Keñdi keke ene kunum ge da mirak. Qeri da danah os murdildi ge da murdil. ⁷ Qeri na da nolwa duk noka binal mérip ge keke kunum nasip darig,” eko anan. ⁸ Yesus kořewa oko anan. “Tiwurdi Né yakwa ane, ‘Na Nañinah nasip Tiwur ih binag me am kallowa da,’ ” eko anan. ⁹ Anew ge, nou memeg Yesus omalko Yerusalem atko sew Tiwurdi Lo kořo karannah qewa tew anoran. Na Tiwur Bega daka pe, olka wanap no. ¹⁰ Keñdi Tiwurdi Né yakwa ere ane, “Tiwur doup nusgur anew na dahmireksi koutorlag.” ¹¹ Ag ewlagwa na urwirlag géri na fén qar ospi yew, eko anan. ¹² Anew ge, Yesus kořewa oko anan, “Tiwurdi Né ane, ‘Na Nañinah Tiwur nasip aw mena pewen,’ ” eko anan. ¹³ Nou memeg nug ih kuřumba Yesus qepian malako ge, Yesus munurko am sén os qeperigri ameg man.

Yesus Kuak Nusig Galili Digu-man

¹⁴ Sén qewa Koulli Gundi gagragsakwa Yesus buliko Galili atu qewa atko dian, am nug neihwah atu qe kunumba tualan. ¹⁵ Nug Yuda dilag binag mak lo kuřumba danahas Tiwurdi Néri

* 4:2 4:2 Satan

duak mardé. Danahas kuřum nug binag sumdév.

Yesus Kawag Diguwa Né Kusuan

¹⁶ Yesus nug nir nagurwa delle kena man ole kaw Nasaret qewa atan. Am nug Sabatwa sansan seré sillah Yuda dilag binag mak lo owa noko, Tiwurdi Né ewqerigri asan. ¹⁷ Asew ge, binag mak lori kuak danah profet Aisaiari Né yak qe nug moreg. Morweg kolako ge, né os ere anko yak qe mariko peko ewqan. ¹⁸ “Nařinahri Koulli ge dagnéwa de. Keřdi nug da danahas o duak agop Né Kena kusurildi kurulwa gořen gogořko toqırın. Tiwur nug da Né Kena qe kuswelle danah kalabuswa qagrakwa dasi qe da séwi kusqak olagri am danah amlag gařu qe séwi bulieksi aminlagri meıřew urıyin. Tiwur nug da danah kug owa dasi qe séwi kusqak olagri meıřew urıyin. ¹⁹ Am sén urıyew, da Nařinah danahas nusgur buliko diardigri né qe kusurildi meıřew urıyin.” ²⁰ Ewqeko malako ge, Yesus Né yak qeko buliko kuak danah qe morko, am nug Né digu kusurigri dian. Dewew ge, danahas kunum Yuda dilag binag mak lowa deg qe amlag atew nug keř eko anew dolagri kittureksi deg. ²¹ Am nug digumeko Né ewqan qe kusuan. “Geı Tiwurdi Né ewqewi ifıl duéw ene meřenah bé,” eko anan. ²² Danahas kunum dueksi nug binag sumeg. Ag nug kořewa né kenanah ban qeri dahmak kuřum ossi am aneg. “Danah uni Yosep nag, gam areg?” éksi aneg. ²³ Qere anweg ge, Yesus anan. “Meřenah, ag geisah nun né dasil ene anlag. ‘Dokta, na nagégé féřun sewe pasaorar. Kowol are na Kapernaum sewe ig duet ole qe

ih na kawan diguwa ewa ole qere se,’ éksi aniřlag.” ²⁴ Qere anařelle anan, “Da meřenah amlagwa anina. Profet nug kawag diguwari danahas ag nug pi sumursi. ²⁵ Am da ag amlagwa anina. Elaisari sénwa saw megalko gu kawa makař kiam am kalam 6 qere laké naři Israel atu kunumba nian. Sén qe as qeřas kuřum Israel daréw. ²⁶ Gam Tiwur nug Elaisa mew Israel as qeřas usih os kéhnurdigri pi atan. Nug Elaisa mew Sarefat Saidon† atu qewa as qeřas os kéhnurdigri atan. ²⁷ Qe sillah sén profet Elisari sénwa Israel danah kuřum lepra waře ole daréw. Gam olagwa Elisa danah usih os waře nusig qe pi sew kawa man. Gam Naman Sirirer‡ qe ih sew pasaoran,” eko anan. ²⁸ Qere anew ge, danah Yuda dilag binag mak lowa deg ole ge né qe dueksi olag uhři nounah ban. ²⁹ Uhřilag bew aseksi, Yesus beřweksi kawlag qoukuwa de qe dougwa waneg. Waneksi qouku sékuwa béwa touřweg nurigri qere seg. ³⁰ Gam qer seppeg, nug buliko gamlagwa wanko ole ih nusig oko atan.

Yesus Koulli Nou Gerđan

³¹ Dimba ge, Yesus Nasaret minko noko Galili atu qe owa Kapernaum qewa atan. Qewa atko ge, Sabat deř oswa ge Yuda dilag binag mak lo owa danahas Tiwurdi Né ismaran. ³² Ismarew ge, ag nusig né qe dueksi dahmak kuřum og, keřdi né nusig ge gagragsak am kuakri wittak ole. ³³ Am danah os féřuwa koulli nou ole Yuda dilag binag mak lowa qewa dian. Nug qalko urwan. ³⁴ “Ei! Yesus Nasaretter, na ig keř sigripri urıyam? Na sewe ig paral ménigri te urıyam? Da na duirina. Na Tiwurdi Gun Danah,” eko uruko

† 4:26 4:26 Sarafet kaw am Saidon atu ge Yudia atu kawa. ‡ 4:27 4:27 Siria ole Yudia atu kawa.

anan. ³⁵ Uruko anew ge, Yesus koulli nou qe gagrag anoran. “Na torka danah qe pařoka beka eit.” Qere anew ge, koulli nou danah qe pařwurko beko atelle, touřew danahas nolagwa atko qewew beko atan. Gam nug gurak ospi moran. ³⁶ Danahas kunum dořlag new, ag agégé né marieksi aneg. “Uni ge keř nénah? Nug kuakri wittak ole am gagragsak olewa koulli nou né mare. Qeri ag dueksi ole pařwureksi atsi,” éksi aneg. ³⁷ Qewa ge, Yesus neihwah Galili atu kunumba tualan.

Yesus Pita Numia Sew Waře Pasaoran

³⁸ Yesus Yuda dilag binag mak lo qe minko danah os wénih Saimon lougwa atan. Qewa ge Saimon numia féru gagrak nařinah doko niewew, Yesus waře qe sew pasaurdigri anoreg. ³⁹ Géri nug wanko duk noko delle waře gařa morew ge, as qe waře pasaoran. Pasaorew ge, as qe usihri asko ke asilag bawardigri dian. ⁴⁰ Kem nowew ge, danahas leilgar waře digu kowol kowol ole qe diaressi Yesus dowá uriyeg. Uřiweg ge, nug danahas kunum waře asilag usih usih qere feřlag ořwelle kunum ole sew pasaoreg. ⁴¹ Am qe ih kawa, koulli nou danahas kuřum pařwaressi atessi ole Yesusri urřweg, “Na Tiwur Bega!” éksi aneg. Gam nug gařa marew kořlag qamteksi né ospi marieg. Keřdi ag dueg ge nug Kristus. ⁴² Kuagřewew ge, Yesus awen os danah kawawa unuqurdigri atan. Atew ge, danahas nug marieksi atessi peg. Peksi ge, nug minarko atewri dagoreg. ⁴³ Gam nug anan, “Da Né Kena Tiwur danahas nusgur dilag king delle gumare né qeř kusuwi kaw lalawa ole dolag. Keřdi da kuak qe sérildi anew uriyin,” eko anan. ⁴⁴ Qewa ge,

nug Né Kena kuswelle, Yuda dilag binag mak lo kuřumba Yudia atu owa weiré.

5

Yesus Nug Béгур Digumeko Diaran

¹ Deř os Yesus Genesaret le koře kawa řanwa asko dewew, danahas kuřumnah nug Tiwurdi Né mariew dolagri omoreksi deg. ² Deppeg nug řanwa kuh ařit os deppeš pian. Sén qewa, kaké wak danah ag kuh minatweg deppeš usu isaressi deppeg pian. ³ Yesus nug olko kuh ošwa tan, kuh qe Saimonri. Teko Saimon kuh nakok bitlew řan minko lewa nurigri amegwa anan. Now ge, Yesus kuhwa delle danahas doulag patan. ⁴ Nug doulag patko malako ge, Saimonri anan. “Kuh palniwe nagur le gamagwa wanew, usu kaké wakri pařwarweg nos,” eko anan. ⁵ Anew Saimon kořewa oko anan, “Danah naři, ig tuřan usu touřehut kuagřé, gam kaké ospi wam. Gam na anam qeri usu buliko pařwarwi nolag,” eko anan. ⁶ Qere séksi ge, kaké kuřumnah diarweg usu tatařlag seg. ⁷ Qere sew ge, leilgar kuak usih kuh ošwa deg qe dolagri ewta qarweg, duksi kehnařweg beřweg. Beřwarweg beweg ge, kuh ařit olele kaké yanweg ambew, torieksa lewa nolasri ses. ⁸ Sén Saimon wénih os ge Pita qere peko ge, unaka Yesus fégwá gatewa yako duk noko ge anan. “Nařinah, da hipunin danah. Qeri na da pařwilka eit,” eko anan. ⁹ Keřdi nug leigur kunum ole kaké huhak diareg qe peksi dorlag nan. ¹⁰ Saimon leikuř Yems, Yon ole Sebedi békuř qe a ole dorlas nan. Géri Yesus Saimonri anan, “Na aw fařwen. Na gei digumak danah diardip,” eko anan. ¹¹ Qere anew

ge, kuh berwatweg ranwa tewes, ken kunum mineksi ge, Yesus dimlamdeg.

Yesus Danah Os Lepra Waře Ole Sew Pasaoran

¹² Sėn os Yesus nug taun oswa dewew, danah os fėru kunum lepra waře ole qe gumurko duan. Nug doko Yesus peko ge, gatewa yako duk noko Yesus nuqurko anan. “Nařinah, na ot sew pe, na da fėrulwa waře ene sewe kena mar,” eko anan. ¹³ Anew ge, Yesus eweg tiorko danah qe fėruwa meko anan. “Da ol de. Waře nasip pasaorar,” eko anew ge, usihri lepra waře qe mundan. ¹⁴ Qe dimba, Yesus danah qe gagrag anoran, “Na danah os amegwa awnah anwen. Mosesri Ró yakwa ane qe sillah atka fėrun pris* os ismureнна am doř os oka mor. Qeri danahas kunum dolag na waře nasip sew pasaoaran,” eko anan. ¹⁵ Gam Yesus neihwah qe atu kuřumba tualan. Tualew dueksi ge, danahas nusig né dolagri am waře asilgar kusuqko mardigri kuřumnah uřiyeksi qagleg. ¹⁶ Gam Yesus sėn kuřum minarko atko awen danah kawawa delle unuqordė.

Yesus Danah Eweg Fėg Mousak Ole Sew Pasaoran

¹⁷ Der os Yesus danahas doulag patelle dewew, Farisi os am Mosesri Ró duak danah ole qewa deg. Ag kaw kuřumbari Galiliri Yuđiari am Yerusalemri ole uřiyeg. Am Tiwurdi gagragsak waře danah sew pasaorakri qe Yesus dowa dian. ¹⁸ Sėn qewa danah os ag danah eweg fėg mousak ole os qarqarwa méksi maweg. Ag maweksi lo owa nuksi Yesus nohwa melagri seg. ¹⁹ Gam danahas kuřumnah, géri awen amban. Ambew ge, waře

danah qe uksi owa nolagri seg, gam ih ospi peg. Géri qarqar ole maweksi lo kořgowa teg. Téksi ge, lo kořgo sifeksi ore qewa qarqar ole pařoweg now danahas gamlagwa Yesus nohwa meg. ²⁰ Meweg ge, Yesus olag meře mak qe peko anan. “Lal, hipunin nasip kusqém,” eko anoran. ²¹ Anew ge, Ró duak danah am Farisi agégé né kuřum marieksi aneg. “Danah uni nug kėr danah qeri Tiwur pihlure? Danah ountė la os hipunin kusuqrigri olele kawa. Qe Tiwur nugė nusig kuak,” éksi aneg. ²² Yesus asilag dahmak qe duan, géri amlagwa anan, “Ag kėrdi olagwa dahmak qere usi? ²³ Kėř né andil qe kug kawa? ‘Hipunin nasip kusqém,’ te kawa ‘Na aska wei,’ eko andil qe te kug kawa? ²⁴ Gam ag ere dolag. Tiwur nug Danah Bega wan enewa hipunin kusuqrigri kepařko kuakri wittak moran,” eko anan. Yesus buliko ge danah eweg fėg kunum mousak ole qe amegwa anan. “Na aska qarqar nasip oka mouka ole louw eit,” eko anoran. ²⁵ Anew ge, usihri danah qe nolagwa asan. Asko qarqar nug nian ole qe oko mouko, Tiwur binag sumelle lougwa atan. ²⁶ Qeri danahas kunum dorlag new Tiwur binag sumessi am ag Tiwurdi gagragsak fařdeksi aneg. “Ig gei kowol founah os piam,” éksi aneg.

Yesus Liwai (Matu) Kepřan

²⁷ Qe dimba ge, Yesus atko takis wak danah os wėnih Liwai† takis wak lowa dewew pian. Peko ge, amegwa anan, “Na doka da dimlamir.” ²⁸ Qere anew ge, Liwai keke kunum minelle asko Yesus dimlamdan. ²⁹ Dimba ge, Liwai nug lougwa Yesusri ke nafi san. Sew ge, takis wak danah kuřum

* 5:14 5:14 Tiwur am danahas ole gamlagwa Tiwurdi ofa mak danah † 5:27 5:27 Wėnih os ge Matiu.

am danah la os ole a ole ni-naqiréksi dessi ke qe leg. ³⁰ Gam Farisi am *Ro* duak danah Farisi dilag ag dougwa piareksi deg qe aseksi Yesus bégur agop né né kuřum marieg. “Ag takis wak danah am hipunin danah la ole ke am le ole ospi lelew sillah,” éksi aneg. ³¹ Anweg ge, Yesus amlagwa anan, “Danahas waře kawa ge dokta dow a pi atsi. Gam danahas waře ole qe ih dokta dow a atsi. ³² Da danahas mangu diardildi pi uriyin. Gam da hipunin danahas anwi olag bulirigri uriyin,” eko anaran.

Kurniak Kowoldi Yesus Kořmoreg

³³ Sén qewa, danah qe Yesus ere amegwa aneg. “Le Luarak danah Yon bégur ge sén kuřum kurdessi unuqursi. Am Farisi begalgar ag ole qere sési. Gam na begpar ge qere ospi sési ag ke le ole lési,” éksi aneg. ³⁴ Géri nug né tonak ene anaran, “Danah os as owew, ag nug leigur ke gun marlag olele te? Sén nug qe ole deppeg, kawa. ³⁵ Gam dimba geisah danah qe uksi atlag, géri nug foula leigur ole pi daweg. Sén qewa ge, leigur qe ke gun melag,” eko anaran. ³⁶ Yesus nug né tonak os anaran. “Danah ounté nug lamén fou ge parilko saréh nagur os oko am lamén alag oře pi titie. Am danah os qere sérig ge, nug lamén fou qe sew nou mérig. Am lamén saréh fou qe lamén alag qe ole amnak usih kawa. ³⁷ Am danah ounté os nug wain fou bawrak le witakri doř gařa alagwa pi yane. Am danah os qere sérig ge, wain fou doř gařa parilko wain wanwa gogořdig. Am wain fou doř gařa le witakri qe ole sew nou mérig. ³⁸ Danah nug wain fou ge doř gařa fouwa ih yanar. ³⁹ Am danah nug wain alag tatam le ole ge, nug

wain fou bawrak qeri ospi sew. Nug ane, ‘Wain alag ge kena,’” eko anan.

6

Sabat Deřdi Kořmak

¹ Sabat deř oswa Yesus bégur ole reis dar owa nuksi ateg. Atessi ge, nug bégur reis qieksi ewlagwa mou ořoleksi damqéksi leg. ² Qere seweg ge, Farisi os piareksi kořmareg, “Sabat deřwa qere sakri ge gun, gam ag keřdi qere séw,” éksi kořmareg. ³ Yesus Farisi kořlagwa oko anan, “Ag Dewit danah nusgur ole laké aqarew seg qeri, Né yak nie ge ospi te ewqéksi dosi? ⁴ Dewit Tiwur Loug owa noko, Tiwur nohwari ke beret qe wan. Beret qe gun, danah balbal kunum dilag kawa, pris* dilag mangu. Gam Dewit nug beret qe leko am danah nusgur qe ole marew leg. Ag Né yak qe ospi te ewqeg?” ⁵ Yesus buliko anaran, “Danah Bega nug Sabat deř gume,” eko anaran.

Yesus Sabat Deřwa Kekuan

⁶ Sabat deř oswa Yesus nug Yuda dilag binag mak lowa noko danahas Tiwurdi Néri duak maran. Am danah os eweg kenari mousak ole qewa dian. ⁷ *Ro* duak danah am Farisi os ole ag keř ihwa os Yesus yagoř morlagri ih marieg. Géri ag Yesus Sabat deřwa waře danah kusqarew pelagri kařeordéw. ⁸ Gam Yesus asilag dahmak qe iril duan. Doko ge, danah eweg mousak ole qe amegwa anan. “Aska danahas gamlagwa sirka da,” eko anaran. Géri danah qe asko sirko dian. ⁹ Dewew ge, Yesus kořmaran, “Ag dosi ge, kowol are ge *Ro* dimlamdak? Ig Sabat deřwa danah kowol kena te sarnig, kawa ig gurak te marnig? Ig danah kena

* 6:4 6:4 Tiwur am danahas ole gamlagwa Tiwurdi ofa mak danah

dalagri te kehnarnig, kawa ig danah sarhut paral te melag?" eko kořmaran. ¹⁰ Nug amnew weiyew danah kunum piarko ge, danah qe anoran. "Ewen tior," eko anoran. Anew danah qe qere sew ge, eweg sew buliko pasaorko koutoran. ¹¹ Gam ag uhrilag bew ge, ag Yesus aregnah sorlagri qe ag ageágé marieg.

Yesus Aposel 12 Qere Kepraran

¹² Qe dimba sén os ge, Yesus Tiwurdi unuqurdigri qoukuwa tan. Teko ge, tuqan usih qe unuqorelle dewew kuagřan. ¹³ Kuagřew furuwa ge, nug bégur anew qagleg. Qagulweg ge, nug ¹² qere keprarko ag wenlag aposelř maran. ¹⁴ Os ge wénih Saimon, Yesus wénih Pita katřan. Am Endru, nug Saimon kamag. Yems am Yon ole. Am Filip, Batolomiu ole. ¹⁵ Matiu am Tomas ole. Am Yems nug Alfius nag. Am Saimon, nug Silot danah ameg qewari. ¹⁶ Am Yudas, nug Yems nag. Am Yudas Iskariotrer, nug dimba geisah Yesus keger ewlagwa mérig.

Yesus Danahas Doulag Patelle Am Kusqaran

¹⁷ Yesus Bégur ¹² ole nuksi ge, nug wanko wan uřemba asko dian. Nug bégur kuřumnah ole deg. Am danahas kuřumnah Yudia atu kunumbari am Yerusalem taun qewari am Tair, Saidon ole řanwari qe kunum ole deg. ¹⁸ Ag nusig né dolagri am nug feřlagwa waře kusuqrigri ole uřiyeg. Danahas koulli nou sarew nou marak ole ge, Yesus kusqaran. ¹⁹ Yesusri gagragsak wanko danah kunum kusqaran, qeri danahas kuřumnah nug féřu ořalagri seg.

O Duak Danah Olag Gamag Asdig

²⁰ Yesus nug bégur piarko delle anaran, "Danah ag gei o duak dasi, ag olag gamag asar. Keřdi Tiwurdi kingdom ge asilag. ²¹ Danah ag gei laké dasi, ag olag gamag asar. Keřdi dimba Tiwur sew ag kutuk ospi meweg. Danah ag gei kunnessi dassi, ag olag gamag asar. Keřdi dimba ag imlag. ²² Ag Danah Bega dimlamdeppeg, qeri séksi danah ag keger maressi uksi uksi aqsi am geraressi am wenlag seweg nou mew ge, ag olag gamag asar. ²³ Ag asilag qere seweg pe, ag sén qewa gamlag asakwa olessi des. Keřdi qe noh asilag saw kappa ge nařinah. Algu alalgar profetř dilag ole qere seréw. ²⁴ Gam danah keřlag ole ag kug os pelag. Ag keke sew olag kena diakri iril oweg olele moran. ²⁵ Danah gei ke léksi koutursi, ag kug os pelag. Ag dimba laké aqardig. Danah ag gei imsi, ag ole geisah Tiwurdi uřřibak pelag. Dimba ag olag nou mew kuanak naři selag. ²⁶ Ag danah kunum binlag sumbeg ge, ag kug os pelag. Algu alalgar profet darmak dilag ole qere seréw," eko anaran.

Keger Asilgar Dilag Olag Mousar

²⁷ Yesus doulag patelle anaran. "Gam ag né dasil dosi ole ag anarina. Ag keger asilgar dilag olag mousar. Danah os kowol nouni sarweg ge, ag kowol kena sares. ²⁸ Ag danah os wittak nou marweg ge, ag Tiwur kořmorweg wittak kena marar. Am danah nouni sarweg ge, ag asilag unuqores. ²⁹ Danah os na siwen leis ge korew pe, leis ole buliwe korar. Am danah os laman nasip ow ge, minwe kasuk nasip qe ole war, aw gagansi owen. ³⁰ Am danah os na kekeri kořmirew ge, na mor. Am danah os nasip keke ow ge,

† 6:13 6:13 Danah os Yesus nugégé toqarko meř arew kekuak nusig séksi ateg ole qe. Aposel ge Yesusri meř danah. ‡ 6:23 6:23 Tiwurdi né oko mariak danah

na buliko mirdigri wagé meka aw sewen. ³¹ Danah la ag kowol kena sarlagri olag nie qe sillah, ag ole qere sares. ³² Ag danah asilag olag mouse ole qe dilag ih olag mousew pe, oun ge ag danah kena eko anardig? Hipunin danah ag ole danah are asilag olag mouse ole qe dilag ih olag mouse. ³³ Am ag kowol kena danah os asilag sési ole qe dilag ih seweg pe, oun ge ag danah kena eko anardig? Hipunin danah ole ag kowol qere ih sési. ³⁴ Am ag danah keke marsi qe noh marlagri olele duessi marweg pe, oun ge ag danah kena eko anardig? Hipunin danah ole ag hipunin danah leilgar keke marsi qe ag keke noh olele bulieksi marlagri duessi marsi. ³⁵ Gam ag keger asilag dilag olag mousar am ag nouni aw sarweg. Ag keke mareksi am noh olagri aw dahmeweg. Ag qere sepeg ge, ag noh naři mardig am ag Tiwur Karannah bégur dalag, kerdi nug danah nou am danah keke marew kena sam éksi pi ansi qe ole nouni pi sare. ³⁶ Ag danah dilag olag duar, Memlag Tiwur o duak nie ole qe sillah.”

Ag Leilgar Aw Kepřarweg

³⁷ “Ag danahas dilag kowol nou aw kepreksi am nou arweg. Qere seweg ge, Tiwur ole asilag qere sérig. Ag danahas kowol nou asilag noh olagri aw anweg. Qere seweg ge, Tiwur ole asilag qere sérig. Ag danah os nouni sarweg ge, hipunin asilag kusuqgeg, Tiwur ole asilag hipunin kusuqrig. ³⁸ Ag danah la qe keke mares am Tiwur geisah ag keke mardig. Geisah Tiwur keke yanew ambeko letewew mardig. Ag keke gane danah marsi qe sillah Tiwur ag ole mardig,” eko anaran. ³⁹ Anko ge, Yesus né tonak os ole amlagwa anan. “Danah os ameg gařu nug ameg gařu lia omaldigri olele

te? Kawa, geisah a olele tolweksa mořwa nolas. ⁴⁰ Sulnir nug duak nusig duak morak danah nusig pi erde. Sulnir are nug duak morak danah nusig dowari duak kunum oko malako ge, duak morak danah nusig qe sillah bérig. ⁴¹ Areg na liap amegwa kinkak nagurnah de qeri aminna? Gam na amenwa ker masa naři de ge, pite dahmorna? ⁴² Na nagégé amenwa ker masa naři de ge pite penna am areg liap anorna, ‘Lal, da na amenwa kinkak nagurnah de ge uřil seina.’ Na darmak gařanwa ih Tiwur dimlamdak danah! Na tatam na nagégé amenwa ker masa naři ge oka, amen kena mew aminka koutorka ge, na kinkak nagurnah liap amegwa de qe uřipri olele.”

Ker Am Mou Ole

⁴³ “Ker kena nug mou kena nie. Qe sillah ker nou nug mou nou nie. ⁴⁴ Danah ag ker mou tatam peksi ge, ker qe kena te, ker qe nou te ge ag dosi. Danah ag guřaw mou darér qoum olewari pi usi. Am ag peipé mou ker nagurnah qoum olewari pi tuqsi. ⁴⁵ Danah kena nug dahmak kena kuřum owa nie. Qeri nug kowol kena se. Qe sillah danah nou nug dahmak nou kuřum owa nie. Qeri nug kowol nou se. Kerdi nug dahmak nou owa ambak nie qe, kořewa bew ane.”

Lo Fuakri Kowol Ařit

⁴⁶ “Kerdi ag dasil ‘Nařinah, Nařinah,’ éksi ansi, gam ag da kořel ospi dimlamursi? ⁴⁷ Danah os da gumıřko doko, am da fal doko dimlamurdig ge, da kowol nusig qe mariwi ag dolag. ⁴⁸ Nug danah os lo fuan qe sillah. Tatam ge, nug moř pesorko oko, wandor lagko kėtum qeko koutorko ge lo fuan. Dimba le kue neko lo qe yepian, gam qiakri olele kawa. Kerdi nug fuko koutoran. ⁴⁹ Am

danah nug da fal doko pi dimlamde ge, nug danah os moř oko, wandor diguwa k t m pi qak lo fuan qe sillah. G ri dimba lo qe le kue neko yepew ge, qiko neko ole kadurko nou meko koutoran,” eko anaran.

7

Yesus Fan Kuriri Kekuak Nir Sew Pasaoran

¹ S n Yesus nug danahas n  gene marko malako ge, nug Kapernaum taunwa atan. ² Qewa ge, Romdi fan kuri danah nug kekuak nir os ole dar . Kuak nir qeri o naři nir  ole qe waře meko mousdigri malwak nian. ³ Fan kuri danah nug Yesus qewa dian n  qe doko ge, nug Yuda dilag kuri danah meřarew ateg. Ateksi ge, Yesus amegwa anweg uriko kuak nir nusig qe sew waře pasaurdigri anoreg. ⁴ Yesus dow aateksi gagragnah ere aneg, “Danah qe kenanah. Na k hnurdipri olelelah. ⁵ Nug ig Yuda isanig o niew binag mak lo isanig fuan.” ⁶ G ri Yesus ag ole ateksi, fan kuri danah qe loug mourak waneppeg ge, nug leigur os meřarew Yesusri n  uksi ateksi ere aneg. “O nařinah, na aw kekuak naři sewen. Na da loul owa neripri olele kawa, keřdi da danah kenanah kawa. ⁷ Qeri da duina ge, da na gumirko wanakri olele kawa. Na qere denna am n  ih anwe, dasil kekuak nir waře pasaorar. ⁸ Keřdi da ole danah w nih ole kekuak miře qe kallowa deina. Am da ole fan danah os da kallowa dasi. Am da usih os amegwa anina, ‘Na eit,’ eko anwi ge, nug ate. Am da la amegwa anina, ‘Na doka,’ eko anwi ge, nug do. Am da dasil kekuak nir qe amegwa anina, ‘Na kekuak ene se,’ eko anwi ge, nug qe se.” ⁹ S n Yesus n  qe doko ge, danah qeri o meře mak peko wawtuřko ole o gamag asan. Asew ge, nug buliko

danahas ameg naři dimlamdeg qe anaran, “Da ag anarina. Israel olagwa danah usih os o meře mak ere ole ospi p gin.” ¹⁰ Qe dimba, fan kuri danah leigur meřarew ateg ge, bulieksi louw uriyeksi, kekuak nir qe iril sew pasaoran peg.

Yesus As Qehřas Nag Os Mousew Buliko Qaqran

¹¹ Nagur dimba Yesus taun os w nih Nain qewa atan. Nug b gur am danahas ameg naři qe ole nug dimlamdeg. ¹² Nug atko taun ihřam naři qe mourak wanewew ge, danah mousak os mawessi dog. Danah mousak qe anig nug nag usih qe ih ole am nug as qehřas. Danahas ameg naři taun qewari asessi as qe ole aři  dog. ¹³ Nařinah nug as qe peko ge, o naři dow, nug as qe amegwa anan. “Na aw kuanwen.” ¹⁴ Qere anelle ge, unaka wanko danah mousak nian ole qarqar qewa eweg man. Eweg mew ge, danah qarqar maweg qe asessi deppeg, Yesus anan. “Nir geir, da anirina, na as,” eko anan. ¹⁵ Anew ge, danah mousak qe buliko asko delle ge, digumeko n  marian. Yesus nir qe parwew anig dowa wanan. ¹⁶ G ri danahas kunum fařeksi nou m ksi Tiwur binag meg. Ag aneg, “Profet naři os onigwa b . Tiwur danah nusgur kehnardigri urie,”  ksi aneg. ¹⁷ Danahas Yesusri n  qe Yudia wanwa am atu lala talilorak nie qe kunumba mariweg tualan.

Yesus Am Le Luarak Danah Yon Ole

¹⁸ Yon nug b gur ag keke kunum dueg am peg qe nug amegwa anweg, nug bekuř arit urwatan. ¹⁹ Nug Nařinah ere kořmorlasri anew ates. “Na enan te Tiwur uriripri anan, kawa ig danah la te ameg m nig?” ²⁰ S n danah arit qe Yesus dow

ateksa ge, amegwa anes. “Le Luarak danah Yon anew i na kormirnitti gumdekrú uriah. Nug ere ané, ‘Na enan te Tiwur uriripri anan, kawa ig danah la te ameg ménig?’ ” eksa kormores.²¹ Sén qewa ih Yesus danahas kuřum waře digu digu ole sew pasaoreg am koulli nou danah feřlagwari kuřum geřaran. Am danah amlag gařu ole kuřum sew amlag kena mew bulieksi amneg.²² Am danah ařit qe amlaswa anan, “Bulieksa ateksa Yon keke piap am duap ole qe amegwa anes. Amlag gařu ge bulieksi aminsi, félag mousak ge bulieksi weisi, lepra danah ge feřlag buliko pasaore, doulag itwak ge bulieksi né dosi, danah mousak ge bulieksi assi, am o duak danah ag Né Kena dossi.²³ Am danah os o meře mak gagrag dewew da pi dimirdig ge, Tiwur nug wittak murdig.”²⁴ Danah ařit Yonri né oksa uries ole qe mundeksa atwes ge, Yesus digumeko danahas amlagwa Yonri anaran. “Ag awen danah kawawa keřnah pelagri Yon gumdeksi ateg? Ag ulas qaweř os orwew ulle qe te pelagri ateg?²⁵ Kawa ge, ag keř qewa pelagri ateg? Ag danah bala kena ole te pelagri ateg? Kawa, danah bala kena kena mési am danah keřlag ole qe king lougwa dasi.²⁶ Gam ag keř pelagri ateg? Ag profet te pelagri ateg? Yo, da amlagwa anina. Nug profet la kunum eřarak.²⁷ Danah Yon eneri ih Tiwurdi Né yakwa ane. ‘Da dimba geisah meř danah dasil méwi atko na nom oko anuřko nasip ih bawardig.’²⁸ Da ag amlagwa anina. Yon nug danah wanwa dasi qe kunum eřarak. Gam danah nug Tiwurdi Kingdomwa nagurnah de qe nug Yon erđak,” eko anaran.²⁹ (Danahas kunum takis wak danah ole Yesusri né dueksi olag usihwa “Tiwur ge

mangunah,” éksi dahmeg. Keřdi ag atweg Yon le luaran.³⁰ Gam Farisi am Mosesri řo duak danah ole Tiwur ag ih ismaran qe dimoreg, keřdi ag Yon le luarak mineg.)³¹ Yesus buliko anaran. “Da keř né tonakwanah os danahas geiri ismardil? Kowol asilag ge aregnah?³² Ag nir nounu sillah. Kaw gamagwa dessi nir nounu la urwaressi dasi sillah. ‘Ig asilag dum dum yaltu ge, ag kasi sak minéw. Am ig ginanig kuntu iřtu, gam ag kuanak minéw,’ éksi ansi.³³ Le Luarak danah Yon nug urıyan am nug ke wain ole ospi leré. Qeri ag aneg, ‘Koulli nou nug féruwa de.’³⁴ Danah Bega urıyan, nug ke wain ole lewew, ag ansi, ‘Danah ene pes. Nug ke wain ole nařinah lelle de. Nug takis wak danah am hipunin danah ole liam patak dasi,’ éksi ansi.³⁵ Gam danahas Tiwurdi duak usi ole kowol asilagwa ismıgısi ge, duak qe keke meřenah,” eko anan.

Hipunin As Yesus Féğ Gořenwa Wařwuran

³⁶ Farisi os nug Yesus ole ke lelasri anew ge, Yesus Farisi qe lougwa atko ninaqırko dian.³⁷ Hipunin as os taun qewa daré. Nug Yesus Farisi qe lougwa ke lelle dian né qe doko ge, nug gořen murdig kenanah ole siné ambak oko urıyan.³⁸ Sén nug wanko Yesus dimugwa féğ mourak kunnelle dewew ge, amři gogořko noko Yesus féğ lourew ge, kuri urugwa urťian. Urťielle ge féğ kis morko gořenwa féğ wařwuran.³⁹ Farisi Yesus nug lougwa urıyan ole qe, kowol qe peko ge, owa ih anan. “Danah uni nug profetnah wen, nug as uni keř as nugnéwa eweg me qe dolo am nug as qe hipunin as qe ole dolo.”⁴⁰ Géři Yesus nug danah qeri dahmak doko ge, amegwa anan, “Saimon, da né os ole na amenwa andildi.”

Anew ge, Saimon anan, “Aria, duak marak danah, né nasip ge an.”⁴¹ Yesus anan, “Danah arít os ateksa danah qarég ole qe dowan waneksa qarég os anwes matan. Danah os ge anew 10,000 kina moran am danah os ge anew 100 kina ih moran.”⁴² Danah arít qe qarég qe buliko morakri olele kawa, géri danah nugnéwa qarég os ole qe nugégé kug asilas qe duew doug katian. Qeri danah arít qe olaswa oun nug danah qe o kunum ole murdig?”⁴³ Saimon anan, “Arté, danah qarég narí wan ole qe.” Yesus amegwa anan, “Né noh nasip qe mangu.”⁴⁴ Am Yesus buliko as qe peko delle ge, Saimon amegwa anan. “Na as ene pena te? Da na lout owa ném, am na da fél isdilri le ospi miřam. Gam as ene ge nug amriwa fél uhru oko am kuri urugwa urtié.”⁴⁵ Na da kis ospi miřam. Gam sén da owa ném am uriyew geisah e patak as ene da fél bulibuli kis moré.”⁴⁶ Na ig kounigwa da kurilwa oliw gořen nagur ospi warwuram, gam as ene gořen murdig olewa da fél warwuré.”⁴⁷ Qeri da na amenwa anina. Nug o narinah miře, qeri da hipunin nusig kurumnah kusqém. Gam danah os nug hipunin nagur se eko ane qe kusuqwi ge, nug o nagur ih miře.”⁴⁸ Qe dimba Yesus as qe amegwa anan, “Hipunin nasip kusqém.”⁴⁹ Danah nug ole ke lessi deg qe agégé nug kořmorew wane morew duak séssi aneg, “Danah ene ounnah qeri nug hipunin kusqe?”⁵⁰ Yesus as qe amegwa anan, “Na dasil ot meře mé qewa buliko wirém! Na aska ot kenawa ih eit,” eko anan.

8

As Os Yesus Dimlamdessi Weiyeg

¹ Qe dimba nagur os dessi ge, Yesus taunwa am kappa ole weiyelle Tiwurdi Né Kena kusuko anan. “Tiwur danahas nusgur dilag king delle gumardigri sén uriyé.” Nug Béğur 12 qe am as os ole arié ateg.² As qe tatam Yesus koulli nou ferlagwari geřaran am waře ole deppeg sew pasaoreg. Os ge wénih Maria taun Makdalari. Tatam Yesus koulli nou 7 qere féruwari geřaran.³ Am Yoana, nug gému Kusa ge Herod loug qeri kuakri kuri danah. Susana am as la kurum os ole ateg. As qe ag asilag kekewa Yesus béğur ole kehnareg.

Danah Ke Sařeg Tourakri Né Tonak

⁴ Danahas kurumnah taun lalawari uriyessi Yesus dowan qagleg. Qagulweg ge, Yesus né tonak os amlagwa anan.⁵ “Danah os atko dara ke sařeg touřan. Nug touřelle atewew ge, ke sařeg os ihwa tolweg. Tolwessi neweg ge danah tapareg am kunum é diareksi lareg.”⁶ Am ke sařeg os ge wan qarqar olewa tolweg. Tolweksi qara beg, gam wan qe le ole kawa, géri ke qara wagam kawa ole meireg.⁷ Am ke sařeg os ge meř qoum ole gamlagwa tolweg, géri arié béksi meř qoum ole ke qara tonarweg meireg.⁸ Gam ke sařeg os ge wan kenawa tolweg. Ag béksi mou kurumnah nieg. Mou ge 100 érdak qere.” Yesus qere anko ge uruko anan, “Danah oun os doug né duakri ole dew pe, né ene doko koutorar.”⁹ Yesus nug béğur né tonak qe diguri kořmoreg.¹⁰ Géri nug anan, “Tiwurdi Kingdomri duak qe algu lariaq daré, gam gei nug sew ag duak lugmak qe dosi. Gam, danahas lala qe duak lugmak qe da né tonakwa anarina. Qeri Né yak qe mou bérig. ‘Ag aminsi gam ospi peweg. Am né qe dosi gam

digu ge olag ospi mourew,' eko anan.

Ke Sařegri Né Tonak Digu

¹¹ Yesus anaran, "Né tonak ene digu ge ere, ke sařeg ge Tiwurdi Né. ¹² Ke sařeg os ge ihwa tolasi, qe ge danah né dosi gam dimba nou memeg doko né qe olagwari o. Keřdi nug qere sew ag olag meře pi mew ge, hipunin asilag noh ospi éřurweg. ¹³ Am ke sařeg os wan qarqar olewa tolweg ge, danah né qe dueksi uksi olag gamag ase. Gam ag ke qařa diři wan kunuk pi no sillah. Qeri ag olag meře mak sén kutuk ih de, gam qepiak uřiyewew ge, ag tolasi. ¹⁴ Am ke sařeg os meř qoum ole gamlagwa tolasi qe sillah ge, danah né dossi gam ag sén kuřum asilag kug kowol kowolri dahmési, ag wan ewa kehlag ole am o gamag asakwa dalagri, dahmak qe Tiwurdi Né tone. Qeri ag olag meře mak mou ole kawa. ¹⁵ Am ke sařeg wan kirag olewa tolwe qe sillah ge, danah olag kena am dahmak mangu ole Tiwurdi Né dueksi gagrag orwessi, am ag olag meře mak gagrag dewew mou kuřum nisi."

Lam Wa Kallowa Pi Tonsi

¹⁶ Yesus buliko né marian, "Danah os lam kamutko wawa pi tone am qarqar kallowa pi me. Kawa, nug karan eisew nie. Qeri danah lo owa nuksi ge, sarmer qe pelag. ¹⁷ Keř keř lugmak dasi ge, dimba Tiwur ambo mérig. Am keř keř tonak ge, dimba qe ole ambo mew dolag. ¹⁸ Qeri dosi koutores. Danah are nug né doko orwe ge, Tiwur sew nug o mourew geisah naři qere murdig. Gam danah are nug né pi duelle 'da duina,' eko ane ge, nug nagur os due qe Tiwur buliko kařurdig," eko anan.

Yesus Anig Am Kamgur Ole

¹⁹ Sén qewa Yesus anig am kamgur ole pelagri uřiyeg. Gam danah kuřumnah qagleg, qeri ag nug gumdeksi unaka wanakri olele kawa. ²⁰ Danah os Yesus anoran, "Na anin am kampar ole peirlagri dimdim ewa aséw dasi." ²¹ Yesus buliko anaran, "Da anil am kamlar ge danahas Tiwurdi Né dueksi am dimlamursi ole qe," eko anan.

Yesus Ulas Naři Anew Toran

²² Deř os Yesus bégur dilag anan. "Doweg, ig le koře kawa séku leis uwa atet." Qere anew ge, kuh oswa olessi téksi ateg. ²³ Kuhwa atessi ge, Yesus usameg new nian. Niewew ge, ulas gagrag le koře kawawa bew, le koř koř naři qeko kuhwa noko ambew kug naři owa deg. ²⁴ Yesus bégur gumdessi wanessi qařressi aneg. "Danah naři, Danah naři, ig torin-igri sétu." Géri Yesus asko ulas kořkoř uhři naři ole gařa matew tores. Torwes ge, le ameg mousko nian. ²⁵ Yesus bégur dilag anan, "O meře mak asilag arewa de?" Gam ag fařessi dahmak kuřum uksi agéagé aneg. "Danah ene oun? Nug ulas le ole gagrag anatew, né nusig dimlamdap," éksi aneg.

Yesus Koulli Nou Danah Os Féruwari Gerđan

²⁶ Yesus bégur ole kuhwa ateksi Gerasa waneg. Atu qe Galili le koře kawa nie qe séku leis de. ²⁷ Yesus kuh minko pitiyewew, danah os féruwa koulli nou ole taun os owari nug Yesus gumurko duan. Sén welah nug lamen ospi tagré am louw ospi daré, nug matmatwa ih nire. ²⁸⁻²⁹ Sén kuřum koulli nou danah qe pi pařwurdé. Danah kuřum nusig sansan amneksi koutordéw, am nug sen darér olewa qagdéw. Gam nug sen darér ole qe tatřardé. Koulli nou souorew awen danah kawawa

atté. Danah qe Yesus peko ge, qalko úrwelle unaka fégwa wanwa qere tolwan. Tolwew peko ge, Yesus koulli nou danah qe pařwurdigri gagrag anoran. Qeri nug fag gogwa úruko anan, “Yesus, na Tiwur Karannah Bega. Na kérdi dagrowa úriyam? Da gurak aw mirwen.”³⁰ Yesus kořmoran, “Na wénim oun?” Eko anew am nug anan, “Ameg naři.” Kérđi koulli nou kuřum nug féřuwa nog.³¹ Koulli nou qe qagleksi úrweksi Yesus bulibuli kořmoreg. “Na ig aw geřigwe moř aminweg atko kutuk mewa nuhut.”³² Fo kuřum qouku nagur os qewa ke lessi deg. Qeri koulli nou qe ag Yesus dowá qagleksi úřwessi aneg. “Na ig minigwe fo uni feřlagwa wanet.”³³ Am Yesus anew koulli nou ag danah qe mundeksi fo feřlagwa waneg. Fo qe gueksi waneksi béwa tolweksi le koře kawa qewa nuksi le léksi mouseg.³⁴ Fo gumarak danah ag kowol qe peksi kum atessi taunwa am kaw lalawa ole mariweg tualan.³⁵ Géři danahas ag keř ban qe pelagri taun pařweksi ateg. Ateksi Yesus dowá waneksi ge, danah koulli nou pařwureksi ateg qe, dahmak qaorew am lamén tako Yesus nohwa ninapiřko dewew pessi fařeg.³⁶ Danah os keke qe amlagwa peg ole ge, ag danahas la danah koulli nou ole dewew Yesus areg sew kena man qeri mariweg dueg.³⁷ Géři danahas kunum Gerasá atu qewari Yesus minarko attigri sinanah anoreg. Kérđi ag olag nouninah fařan. Géři Yesus buliko attigri kuhwa olko tan.³⁸ Danah koulli nou pařwureg ole qe Yesus nuqurko anan, “Da na olé atnit,” eko anan. Gam Yesus anew buliko atewew ge anoran.³⁹ “Na bulika kawanwa atka, Tiwur keke kunum nasip san qe mariwe dues.” Géři danah

qe taun kunumba atko danahas amlagwa Yesus keke kunum san qe kusuko marian.

*Yesus Nir Asin Mousak Qaqran
Am Waře As Sew Pasaoran*

⁴⁰ Yesus buliko le koře kawa séku leis atew ge, danahas kunum nug felqoreg. Kérđi ag kunum nug ameg méksi deg.⁴¹ Sén qewa danah os wénih Yairus nug Yesus gumurko wanan. Nug Yuda dilag binag mak lo osri kuri danah. Nug Yesus nohwa gatewa yako gagrag nuquran. “Na da ole loulwa atnit olele te?” eko kořmoran.⁴² Kérđi nug nir as usihnah ole am nug makař nusig 12 keke qere qe mousdig malwak nian. Géři Yesus wanęo atewew ge, danahas ameg naři duksi nug omorweg ateg.⁴³ Am as usih os nug makař 12 qere as dilag waře qe ole daré. Am nug kéhu kunum dokta agop malwan. Gam danah ounté os sew waře nusig ospi pasaoran.⁴⁴ As qe Yesus dimugwa doko, Yesusri lamén noh orřew ole waře nusig usihri kawa man.⁴⁵ Yesus kořman, “Oun da úřwilé?” Eko anew, kunum aneg. “Iğ kawa, ig kawa.” Éksi anweg Pita anan, “Danah naři, danahas ameg naři na omiressi qataoréw dasi.”⁴⁶ Gam Yesus anan, “Ounte da úřwilé. Kérđi da gagragsak dasil os pařwilko atew dahmorém.”⁴⁷ As qe duan ge, nug lugumdigri olele kawa. Géři nug sařelle Yesus nohwa doko wanwa duk noko, danahas kunum nolagwa nug kérdi Yesus dowá eweg man qe kopatko amegwa anan. “Waře dasil ge usihri sew pasaoré.”⁴⁸ Yesus as qe anoran, “Nir dasil, na dasil ot meře mé qewa na féřun sew kena mé. Na aska oř kena ih dewew eit.”⁴⁹ Yesus né marielle dewew, Yuda dilag binag mak lori kuri danah Yairus qe lougwari meř danah os úřiyan. Úřiko ge,

Yairus anoran, “Na aʀen ge iʀil mousé. Na duak marak danah aw kug morwen.”⁵⁰ Gam sèn Yesus qe doko ge, Yairus amegwa anan, “Na aw faʀwen. Na dasil ot meʀe mew, geisah aʀen séwi kena mérig.”⁵¹ Yesus nug Yairus lougwa atko ge, nug danah la os minarew nug ole lo owa pi nog. Gam Yesus nug, Pita, Yon, Yems, am nir as qe memeg anig ole ag ih owa nog.⁵² Danahas kunum nir as qeri masieppog ge, Yesus amlagwa anan. “Ag aw masiweg. Nir qe pi mousé, nug usnie,” eko anan.⁵³ Anew ge, ag dueg nir qe iʀil mousan, qeri ag nug imdeg.⁵⁴ Gam Yesus lo owa noko nir qe ewegwa oʀako qalko anan, “Nir dasil, na as.”⁵⁵ Anko malwew, nir qeri koulli buliko féruwa uʀiyew foumak oko usihri asan. Yesus amlagwa anan, “Ag ke os morweg lar.”⁵⁶ Nir qe memeg anig ole dorlas new ole faʀes. Gam Yesus gagrag anatan. “A ounté os aw keke eneri amegwa anwes,” eko anan.

9

Yesus Béгур 12 Qe Kekuaq Maran

¹ Yesus Béгур 12 qe uʀwarew dog. Doweg ge, nug koulli nou kunum geʀarlagri am waʀe kowol kowol ole kusqarlagri gagragsak am kuakri wittak ole maran.² Am nug Né Kena “Tiwur king delle danahas nusgur gumardigri” qe kusulagri am waʀe danah seweg pasaorlagri ole anew ateg.³ Yesus amlagwa anan, “Ag weiyakri sènwa kite os aw oweg. Ag durqak sokét, baram, ke, qarég am siot aʀit os aw oweg.”⁴ Ag lo arewa diarweg nuksi pe, ag qewa ih dessi ole taun qe mineksi ates.⁵ Gam danahas ag fel pi qaressi diareksi loulagwa pi atweg pe, ag taun

qe mineksi atessi ge félagwari usuʀ qeqlessi ates. Ag kowol qe peksi ge, kowol nou asilag qe olag mourdig.”⁶ Géri Yesus Béгур ateksi kaw kunumba weiyessi, Né Kena kuswessi am waʀe danah atu kunumbari seweg pasaoʀeg.

Herod Yesusri Katat Qan

⁷ Herod Antipas nug Galili dilag king. Nug Yesus Béгур ole kuak seg qeri né doko katat qan. Keʀdi danah os ge aneg, “Le Luarak danah Yon buliko siran.”⁸ Am os ge aneg, “Elaisa gumarko duan.” Am la os aneg, “Profet* os algunah mousan qe buliko siran.”⁹ Géri Herod anan, “Da anwi Yon fag iʀil kotʀeg. Gam danah qe ounnah nusig kuak am kowol ole mariweg duina?” eko anan. Géri nug Yesus perigri dahman.

Yesus 5,000 Danah Ke Maran

¹⁰ Yesusri aposel† bulieksi uʀiyeksi keke kunum seg qeri nug amegwa marieg. Qe dimba ge, nug omlarew, danah la minareksi ag agé kaw os wénih Betsaida qewa ateg.¹¹ Gam danahas dueksi ge, nug dimlamdeksi ateg. Ag nugnéwa atweg ge, nug felqarelle Tiwur king delle danahas nusgur gumardigri né qe kuswew dueg. Am danah os waʀe ole qe sew pasaoʀeg.¹² Kem noko tseh manew ge, Béгур 12 qe duksi Yesus amegwa aneg. “Na danahas anwe atares. Ag kaw naʀi am kaw nounu unaka dassi qewa ateksi niak awen am ke lakri os ole maries. Awen ig datu ole ene ge danah kawa,” éksi aneg.¹³ Anweg ge, Yesus buliko anaran, “Ag agégé ke mares.” Gam Béгур 12 qe aneg, “Ig ke kuʀum ole kawa, beret tanig ole am kaké aʀit ole ih de. Ig atektu danahas ene kunum dilag ke daren te

* 9:8 9:8 Tiwurdi né oko mariak danah † 9:10 9:10 Danah os Yesus nugégé toqarko anew kekuak nusig séksi ateg ole qe. Aposel ge Yesusri mef danah.

méktu marnig?”¹⁴ (5,000 danah keke qere qewa deg.) Yesus nug bégur amlagwa anan, “Ag danahas amlagwa anweg, qaglak ameg 50, 50 qere qagleksi des.”¹⁵ Yesus nug anan sillah, bégur né nusig dimlamdeksi anweg danahas kunum ninapiressi deg.¹⁶ Yesus beret tanig ole am kaké arít qe ole oko saw karan amnelle kena sam elle keru unuqoran. Malako ge, temelle bégur danahas agop panilagri maran.¹⁷ Géri danahas kunum ke léksi olag orwew ge, ke big big minareg qe Yesus Bégur diareksi kaleg 12 qere yanareg.

Pita Né Kopatko Yesus Ge Kristus Eko Anan

¹⁸ Deñ os Yesus bégur ole dessi am nug nugé kepařko unuqorewew, am bégur gumdeksi doweg kořmaran. “Danahas dasil ge oun éksi ansi?”¹⁹ Nug bégur aneg, “Os ge Le Luarak danah Yon éksi ansi. Am os ge Elaisa éksi anirsi. Am la os ge profet os algnah mousan qe buliko siran éksi ansi.”²⁰ Anweg ge, Yesus bégur kořmaran, “Gam ag ge dasil oun éksi ansi?” Pita anan, “Na Tiwurdi Kristus†, Tiwur danahas nusgur bulika diardipri toqiran.”²¹ Géri né qe danah os amegwa anwegri Yesus bégur gun qaran.

Yesus Mousko Am Buliko Asdigri Anan

²² Am Yesus amlagwa anan, “Meřenah, danah Bega geisah gurak kuřum morlag. Kuri danah am pris dilag anqak danah ole am Mosesri Ro duak danah ole geisah nug dimoreksi, am qeweg mousdig. Gam deñ kiamba ge buliko sirdig.”²³ Anko ge, buliko danahas kunum anaran, “Danah os da dimlamirđigri dew ge, nug

nugégé nusig sak am o mourak ole qe dimorko, am ker mawanak nusig deñ dorog mouko ge da dimlamřar. §²⁴ Danah os nug nugégé nusig sak am o mourak ole dimlamurko ge, nug founak ospi ow. Gam danah os nug da dimlamřelle mousko ge, founak oko sansan darig.²⁵ Am danah nug wan kénih ole delle mousew ge, keke qe ospinah kéhnurweg.²⁶ Am danah os dasil am né dasildi ura new pe, sén Danah Bega nug nusig kamsahlak gun olewa am Memegriwa am Tiwurdi doup gun dilagwa urig ge, danah qeri ura nérig.²⁷ Da ag amlagwa meřenah anina. Danah os ewa aséw dasi ge, geisah ag pi mousak, Tiwur king delle danahas nusgur gumarewew pelag,” eko anan.

Yesusri Kamsahlak Gun Ole Bégur Peg

²⁸ Yesus né qe anko malwew, deñ 8 keke qere atew ge, nug unuqurdigri Pita, Yon am Yems ole diarew qoukuwa teg.²⁹ Nug unuqorelle dewew ge, nug kitru ge buliko sonřewew am nug féru bala qe ole ampir sillah sonran.³⁰ Usihri danah arít Moses Elaisa ole kamsahlak gun olewa dowes nug ole né marieg.³¹ Yesus nug wagam kawa Tiwurdi Né dimlamurko olele morko Yerusalem mousdigri danah arít qe ole marieg.³² Pita leikuř arít qe ole amlag kug morew nilag seg. Gam sén amlag fou mew ge, danah arít qe am Yesus ole aseksi kamsahlak gun ole qe owa deppeg piareg.³³ Danah arít qe Yesus mundeksa atepes, Pita Yesus amegwa anan. “Danah naři, ig ewa dalom ge kena. Ig laklak kiam os sénig, os nasip am os Mosesri, am os Elaisari.” (Pita nug

† 9:20 9:20 Kristus ge Mesaia. Tiwur danahas nusgur buliko diardigri danah toqoran. § 9:23 9:23 Ker mawanak mouko dimlamdak digu ge, nugégé nusig sak am o mourak dimorko am kug mawelle Tiwur dimlamdakri kowol.

o pi mourak né qe anan.) ³⁴ Nug né qe anewew ge, fur os doko tonarew owa dessi olag fañan. ³⁵ Tiwur fur owa anan, “Ene nir dasilnah. Da nug algu toqurin. Ag nug fag duessi dimlamdes.” ³⁶ Tiwur né qe anko malwew ge, ag Yesus nugé dewew peg. Am bégur ag sén qe keke peg qeri né ospi marieg, asilag dahmakwa ih dian.

Yesus Nir Os Koulli Nou Ole Sew Kena Man

³⁷ Der qe dimba ge, Yesus am bégur kiam qe ole qoukuwari noppeg, danahas ameg nafi uriyeksi Yesus ihwa peg. ³⁸ Am danah os danahas ameg nafi qe olagwa urwan, “Duak marak danah, na da nal ene peripri nuqrina. Da nir danah usihnah enan ih. ³⁹ Koulli nou os nir qe owa now ge, gelelle ole usihri atko kauřko kawqelle sihru newew nie. Koulli nou qe nir ofeř ospi parwe, am fėru sew nounah me. ⁴⁰ Da na begpar koulli nou ene geřurlagri nuqarin, gam ag sakri olele kawa.” ⁴¹ Gėri Yesus anan, “Danahas geiri, ag olag meře mak ole kawa am olag ge mangu kawa. Sén gane da ag ole dettu olag meře mérigri amlag méril?” elle ge anan, “Nir nasip oka ere do,” eko anan. ⁴² Nir nag qe Yesus gumurko dowew ge, koulli nou qe touřew atko wanwa qeko kawqelle nian. Gėri Yesus koulli nou qe nir qe pařorigri gařa morko geřdan. Geřurko nir qe sew kena mew ge, buliko memeg moran. ⁴³ Gėri danahas kunum Tiwurdi gagragsak qe peksi dorlag nan. Danahas qe Yesus keř keř kunum san qe peksi dorlag new sepppeg, nug bégur anaran. ⁴⁴ “Né andil seina, ene dossi koutores! Danah os Danah Bega keř ewlagwa mérig,” eko anan. ⁴⁵ Gam bégur ag né qe olag pi mouran. Tiwur sew né digu qe

larian, qeri ag olag ospi mouran. Am ag Yesus né qeri kořmorakri fařeg.

Oun Nug Naři?

⁴⁶ Yesus bégur ag kořlagwa ih oun nug naři asilag qeri kareg. ⁴⁷ Yesus dahmak asilag qe doko ge, nir nag os oko doko nug dianwa man. ⁴⁸ Meko ge, nug amlagwa anan. “Oun os nug da wėnilwa nir nag ene sillah oko dahmore ge, nug da dahmiře. Keřdi nug dasil o meře me qeri qere se. Am oun nug da wiře ge, nug Tiwur da anew uriyin qe o. Gėri oun ag kallolagwa de qe, nug naři.” ⁴⁹ Yon anan, “Danah naři, ig danah os na wėnimba koulli nou geřarew pektu anurhut minan. Keřdi nug ig ole pi weitu.” ⁵⁰ Gam Yesus anaran, “Ag nug aw dagorweg. Oun nug ag keger pi mare ge, nug ag leilag,” eko anan.

Samaria Yesus Kawlagwa Nuakri Mineg

⁵¹ Yesus wan minko saw kappa attigri sén durmurew ge, Yesus o kunum morko ole Yerusalem attigri atan. ⁵² Am nug danah os meřarew anqeksi kaw os Samaria gewa keke dalagri am ke lelagri qe kunum bawarlagri ateg. ⁵³ Gam danah kaw qewari ag dueg ge nug Yerusalem attigri atan qeri Yesus uksi loulagwa atakri mineg. ⁵⁴ Yesus bekuř Yems Yon ole, a né qe dueksa anes. “Nařinah, na ot niew pe, i kew saw karandi anhuř ařelle neko danah uni ařardig!” eksa anes. ⁵⁵ Gam Yesus buliko ařit qe gařa matan. ⁵⁶ Qe dimba ge, Yesus bégur ole kaw lawa ateg.

Yesus Dimlamdakri Kowol

⁵⁷ Ag ihwa ateksi ge, danah os Yesusri anan, “Na arewa atip ge, da na dimlamirwi ole atnit.” ⁵⁸ Yesus danah qe kořewa oko anan, “Qé déguř ag wan ořewa nisi am é ag teflag ole.

Gam Danah Bega nug ge niakri lo ole kawa.”⁵⁹ Nug danah la os amegwa anan, “Na doka da dimlamir,” eko anan. Gam danah qe anan, “Nařinah, na minwe tatam ge da atko mem mou-san suhumko am dimlamirdil,” eko anan.⁶⁰ Yesus danah qe amegwa anan, “Danah mousak qe minwe agé agé mousak leilgar qe suhmares. Gam na atka Tiwurdi Kingdomri* Né kusu.”⁶¹ Am danah la os Yesusri anan, “Nařinah, da na dimlamirdil. Gam tatam na minwe da louw atwi ke séktu léktu ewlag ořako am na dimlamirdil.”⁶² Gam Yesus danah qe anoran, “Danah palangis digumeko tořelle am sansan nug buliko dimugwa amne ole qe, nug Tiwurdi Kingdom owa kekuakri olele kawa,” eko anan.

10

Yesus 72 Danah Nusgur KekuaK Marew Ateg

¹ Dimba ge, Nařinah nug Béğur 12 qe am danah la os ole keřarko 72 danah qere anew awen are nug attigri ole qe kunumba ařit ařit nug noh uksi anqeksi ateg.² Nug ere eko anaran, “Ke lep kuřum nie, gam ke lep qe tuřakri kuak danah kuřum kawa. Qeri ag dar memegri unuřorweg nug sew kekuak danah la os ateksi dar nusigwa ke lep tuřlag.”³ Ag ates! Da séwi ag sipsip nagur sillah qé déğur olagwa atsi.⁴ Ag asilag qarég yanakri sogot am keke yanakri baram aw oweg, am félag gařa la os ole aw diarweg. Am ag ihagwa danahas piareksi ge, aw félag yeksi né marweg.⁵ Ag danah os diarko lougwa now ge, ere tatam anares, “Tiwur o maror ag ole dalag.”⁶ Am lo qe memeg o kenawa diarew pe, Tiwurdi kena sak lo qewa darig.

Gam pi diarew pe, Tiwurdi kena sak lo qewa pi dew buliko agrowa durig.⁷ Ag lo qewa ih deppeg keř marlag ge, lessi des. Keřdi kekuak danah nug kekuak nusig qe noh urig olele. Ag lo oswari am oswa aw weiweg.⁸ Ag taun oswa noweg, felqareksi diareksi am keř ke bawresi marlag ge, ag les.⁹ Waře danah os taun qewa dalag ge, ag seweg waře pasaorar. Am ag Tiwurdi Kingdom* agrowa uřiyé unaka de qe anweg dues.¹⁰ Gam ag taun oswa noweg fel pi qarweg ge, taun qeri ihwa aseksi dessi anes.¹¹ ‘Ig féniğwa usuř asilag taunwari de, qe ag pelagri qeqalhut ne. Gam ag dahméksi koutores: Tiwur danahas nusgur dilag king delle gumardigri sén unaka de.’¹² Da ag amlagwa anina, Tiwurdi uhřibak deřwa geisah Tiwur Sodom kaw kug moran qe eřdak ag kug naři pelag.¹³ Korasin am Betsaida ole ag olag duak! Ag geisah kug naři pelag. Keřdi da mirakel os agnéwa sein qe Tair Saidon ole selem ben, ag algu olag bulilo. Ag asilag hipunin qeri nouni dueksi neko aqarew am usuř luessi dessi olag bulilo.¹⁴ Gam Tiwurdi uhřibak deřwa Tair Saidon ole kug olas qe eřdak ge ag olag.¹⁵ Am Kapernaum, ag te os Tiwur ag binlag karan sumdig? Kawa. Ag ole Tiwur touřarew nuksi paral melag,” eko anan.¹⁶ Am Yesus buliko anaran, “Oun os nug asilag né dorig ge, nug dasil né due. Am oun os nug ag dimardig ge, nug da dimiře. Gam danah da dimiře ge, nug Tiwur anew da uřiyin qe dimore,” eko anan.

72 Keuak Danah Bulieksi Uřiyeg

¹⁷ 72 danah qe bulieksi uřiyeksi olag gamag asakwa aneg.

* **9:60** 9:60 Tiwur danahas nusgur dilag king delle gumare. * **10:9** 10:9 Tiwur danahas nusgur dilag king delle gumare.

“Nařinah, ig na wénimba anektu, koulli nou geřarhut né dueksi ateg.”¹⁸ Géři Yesus koflagwa oko anaran, “Da Satan saw karandi ampir sillah usihri tolwewew pégin.¹⁹ Ag dues. Da ag mat am kappiép ole qarlagwa tapeksi ořollarlagri gagragsak marin. Am kegeř asilagri gagragsak kunum qe seweg kéwsi kawa mérigri gagragsak marin. Qeri ag kité ospi sarew nou meweg.²⁰ Gam koulli nou ag kořlag dimlamdeg qeri ag aw olag gamag asew. Ag Tiwur saw kappa iril wenlag yan qeri olag gamag asar.”²¹ Sén qewa Koulli Gun nug sew Yesus o gamag asew anan, “Mem, na wan saw oleri Nařinah. Da binam sumina. Keřdi na keke ene duak danah dowegri sewe larian, gam danah nir nounu sillah ge ismaren. Meřenah, Mem na ere séripri ot nian ole qe sen.²² Mem gagragsak am keke kunum ole da ewelwa man. Tiwur Bega ge oun qe ounté ospi due, gam Mem ih due. Am Mem ge oun qe ounté ospi due, gam Bega ge due. Am danah are da keřřarko ismarin qe ag ole Mem dossi.”²³ Géři Yesus buliko bégur ih dolagri anan, “Danah keke ag pesi ole qe pesi, qe ag olag gamag asdig.²⁴ Da ere anarina keřdi ge, algu profet am king kuřum ole keke ag gei pesi ole qe pelagri seg, gam ag pi peg. Am né ag gei dossi ole qe dolagri seg, gam ag ospi dueg,” eko anan.

Samaria Danah Kenari Né Tonak

²⁵ Deř os Řo duak danah os asko Yesus sew perigri seko kořmoran. “Duak marak danah, da areg seko ge foumak sansan diakri uril?”²⁶ Géři Yesus kořewa oko anan, “Mosesri Řo yakwa keř eko ane? Na dona ge areg?”²⁷ Géři danah

qe anan, “Řo ane: Nařinah nasip Tiwurdi ot mousew, ot kunum ole, kitton ole, gagragsak nasip kunum ole am dahmak nasip kunum ole Tiwur mor. Am na nagégé nasip ot mouse qe sillah liapri ole qere ot mousar.”²⁸ Géři Yesus danah qe kořewa oko anan, “Na meře anam. Na qere seka ge, foumak owe Tiwur ole sansan dalas,” eko anan.²⁹ Gam danah qe nug da mangu elle qeri Yesus kořmoran. “Am oun ge da lial?” eko kořmoran.³⁰ Am Yesus amegwa anan, “Danah os Yerusalemri noko Yeriko atewew, yawssen danah ihwa ořweksi féřu balla nusig kunum urdeksi keke nusig kunum kardeksi, mouřaweg ameg tariew niewew ateg.³¹ Niewew ge, pris† danah os ih qe dimlamurko noko nug danah qe peko ge, ih séku leis wanko nanřurko atan.³² Qe sillah, Liwai‡ danah os ole qere noko peko, nug ole ih leis wanko nanřurko atan.³³ Gam Samaria danah os ih unari uriko danah qe nianwa doko qere peko ge, o duan.³⁴ O dow ge, nug danah qe gumurko wanko isiwa gořen am wain ole gogřew now isi witan. Malako ge, danah qe sumew donki nusigwa tew oko řo lo oswa atko qewa meko guman.³⁵ Kuagřew ge, qarég silwa ařit ipko řo lo gumak danah qe morko anan. ‘Na danah ene dahmoreppe da buliko uriko ge na qarég gane tourdip qe noh méřil,’ eko anan.”³⁶ Am Yesus Řo duak danah qe kořmoran, “Danah kiam ene na dona ge danah are ge yawssen danah mouřweg ole qe lia?” eko kořmoran.³⁷ Kořmorew ge, nug kořewa oko anan, “Danah o dow kéhnuran ole qe.” Géři Yesus danah qe anoran, “Na ole atka qere ih se,” eko anoran.

† 10:31 10:31 Tiwur am danahas ole gamlagwa Tiwurdi ofa mak danah ‡ 10:32 10:32 Pris kéhnurak danah am nug Liwai fuřuh

Yesus Mata Maria Ole Piattig Atan

³⁸ Yesus bégur ole Yerusalem atlagri atessi kaw oswa waneg. Yesus kaw qewari as os wénih Mata qe lougwa atew, Mata felqoran. ³⁹ Nug mageg os wénih Maria, qe Nařinah fégwa delle né marian qe duelle dian. ⁴⁰ Gam Mata ge ke bawrakri sik nou qan. Géri nug doko Yesusri anan, “Nařinah, da magel ene minřew kekuak dagé seina, qe na areg dona? Na anwe nug ole da kéhniřar,” eko anan. ⁴¹ Gam Nařinah anoran, “O Mata, na keke kuřumřinah ot sik qew ot nou me. ⁴² Gam keke usihri qe na kutuk. Qeri Maria nug keke kenanah kepařko se. Am ounté os nug keke keptre qe pi kařdew,” eko anoran.

11

Yesus Bégur Unuqorakri Ismaran

¹ Deř os Yesus awen oswa unuqoran. Sén nug unuqorko malwew ge, nug bega os anoran. “Nařinah, Le Luarak danah Yon bégur unuqorakri ismaran sillah, ig ole ismig.” ² Géri Yesus anaran, “Sén ag unuqoressi ge, ere anes: ‘Ig Mémnig, na wéhnim gun ole karan sumnig. Na urıka king denna danahas gumardip. ³ Na ig deř dorog ke mig. ⁴ Ig ole oun nouni sige qe kusqektu dohut dounig katie qe sillah, hipunin isanig kusuřka mig. Am ig aw pařwigwe qepiakwa tolahun.’” ⁵ Am Yesus bégur dilag anan. “Olagwa usih os tuřan tugamag lia lougwa atko qaqurko kořmurdig. ‘Lal, beret kiam os miřdip olele te? ⁶ Keřdi da lial os weiko urıko loulwa dué. Gam da ke nug morakri ole kawa.’ ⁷ Géri danah lo owa ge andig, ‘Na da aw kekuak miřwen. Iřřam iřil maném, am da nir dahlar ole

niak awenwa nitu. Da asko keke mirakri olele kawa.’” ⁸ Da ag anarina. Nug lia qeri nug asko keke ospi morew. Gam nug pi fařak kořmurdig qeri nug asko keke qe murdig. ⁹ Qeri da ag amlagwa anina. Ag kořmeweg, Tiwur ag mardig. Mariweg ge, nug ismardig. Ag iřřam qouqou orweg, nug iřřam matuldig. ¹⁰ Qeri oun os Tiwur kořmurdig ge, nug urig. Oun os maririg ge, nug ismurew perig. Am oun os iřřam qouqou orew ge, nug iřřam matulko murdig. ¹¹ Oun os nug nir memeg ge, nir kaké murdigri kořmew ge, mat nou os murdig te? ¹² Am maru owah murdigri kořmew ge, kappiép os oko murdig te? ¹³ Qeri hipunin danah ag ole nir keke kena marlagri qe dueksi koutursi. Am Mem saw kappari danah are kořmési ge meřenah Koulli Gun mew uřirig,” eko anan.

Yesus Belsebul Ole

¹⁴ Deř os Yesus danah os koře kunum fėruwa koulli nou qe sew koře kunum daré qe geřdan. Geřdew atew ge, danah qe né buliko mariew danahas peksi dorlag nan. ¹⁵ Gam olagwa danah os ge aneg, “Nug koulli nou dilag kuri Belsebulri* gagragsakwa koulli nou geřare.” ¹⁶ Am olagwa danah la os Yesus mirakel os sérigri kořmoreg. Keřdi ag nug meřenah Tiwur dowari te urıyan qe pelagri kořmoreg. ¹⁷ Gam Yesus nug asilag dahmak qe doko ge, amlagwa anan. “Danah kaw usihwari ag kopatweg ařit patew fan selag ge, geisah kaw qe paral mérig. Am danah os ag atėf usihwari ag kopatweg ařit patew fan selag ge, geisah atėf qe kawa mérig. ¹⁸ Am Satan leigur ole kopatweg ařit patew fan selag ge, gagragsak nusig kawa mew ag paral melag. Ag

* 11:15 11:15 Koulli nouri kuri am nug nou memeg Satan

ansi ge da Belsebulri gagragsakwa koulli nou ge'arina, qeri da ere anina. ¹⁹ Da Belsebulri gagragsakwa koulli nou ge'arwi pe, asilgar danah ge oundi gagragsakwa koulli nou ge'arsi? Qeri asilgar danah ih qewa ismigi ge ag darmési. ²⁰ Gam da me'ere Tiwurdi gagragsakwa koulli nou ge'arwi pe, Tiwur danahas nusgur gamlagwa king delle gumardigri agrowa ur'iyán." ²¹ Am Yesus né tonak os anaran. "Danah os gagragsak ole nug fan sakri keke bawarko loug ka'riah wite ge, keke nusig kunum kena dasi. ²² Gam danah gagragnah os beko fan seko é'urko ge, fan sakri keke kunum gagrag qore qe urig. Am nug keke kunum urig qe danah la agop panirig. ²³ Oun nug da lial kawa ge, nug dasil keger. Oun nug da pi kéhni'ew sipsip qaglar'ru ge, nug sipsip lamarew pih'foursi," eko anaran.

Koulli Nou Buliko Uriye

²⁴ Yesus anaran, "Sén koulli nou danah os fé'urwari gé'urweg doko atko ge, atu me'irakwa sik oko darigri awen mariko weiye. Am nug awen os pi peko ge, ane. 'Da lo minko ur'iyin qewa buliko attil,' eko ane. ²⁵ Gé'ri nug buliko atko danah qe owa lo qe kinkak eka'ko bawarko koutorak pe. ²⁶ Peko ge, nug atko am koulli nou la nug é'rdak nounah 7 qere diarew ur'iyeksi qewa dasi. Gé'ri danah qe tatam dian qe é'urko ole nounah me," eko anan. ²⁷ Yesus né qe anewew, as os danahas ameg na'fi qe olagwa ur'uko anoran, "As na mémnirko ouma mirelle begran ole qe nug o gamag ase." ²⁸ Gam Yesus anan, "Danah areg Tiwurdi né dueksi dimlamursi ge, ag olag gamag asak na'riwa dalag," eko anan.

Yesus Mirakel Sew Pelag Aneg

²⁹ Sén danahas ku'rum qaglessi omorweg ge, Yesus anaran, "Danahas ge'ri ag olagwa sak nouninah ambak. Ag da mirakel sé'wi pelagri ko'rmési. Gam da mirakel usih ospi sé'wi peweg. Ag profet Yona fé'ruwa kowol nian qe sillah ih pelag. ³⁰ Niniwe danahas kowol Yona dowo ban qe peksi ge, Tiwur nug mew atan qe ag dueg. Qe sillah danahas ge'ri ag ole Danah Bega qere peksi ge ag dolag. ³¹ Dimba Tiwurdi uh'ribak de'ruwa kenariwari kuin sirko danahas ge'ri ole aseksi dessi asilag sak nou qe ambo marko ismarew pelag. Ke'rdi kuin qe wan atko patakware Solomonri duak kena qe dorigri ur'iyán. Gam ag olagwa danah os Solomon é'rdak ge ewa de, am ag nusig né duak minsi. ³² Sén Tiwurdi uh'ribak de'ruwa Niniwe danahas sireksi ge'ri danahas ole aseksi dessi ge'ri danahas dilag sak nou qe ambo melag. Ke'rdi ag Yona né kuswew olag bulian. Gam gei ge danah os Yona é'rdak ge ewa de, am ag olag buliak minsi," eko anaran.

Fé'undi Kamsahlak

³³ Yesus anan, "Danah os lam kamutko pi larium, am wawa pi tone. Kawa, nug karan eisew nie. Gé'ri danah lo owa nuksi ge, lam a'ere qe pesi. ³⁴ Na amen ge na fé'undi lam sillah. Na amen kena dew ge, fé'run kunum ole kamsahlakwa darig. Gam na amen nou ge, fé'run kunum ole gattuwa darig. ³⁵ Qeri kamsahlak otwa de qe gattu tonewri na dah-meka koutor. ³⁶ Qeri na fé'run kunum kamsahlakwa darig am gattu nagur ospi fé'runwa darig ole ge, fé'run kunum kamsahlelle darig. Lam arko atko fé'runwa kamsahle qe sillah," eko anan.

Yesus Farisi Am Ro Duak Danah Ole Alaran

³⁷ Yesus né mariko malwew ge, Farisi os nug lougwa atew ke kelasri anoran. Géri Yesus nug lougwa atko ninaqirko dian. ³⁸ Farisi qe Yesus eweg tatam pi isak ke lew peko ge, nug dorog nan. ³⁹ Géri Nařinah anan, “Farisi, ag asilag kap am plet ole dimdim ih issi, gam ag olagwa ge ameg qak am kowol nounah ole ambak. ⁴⁰ Ag né tapewnak danah! Tiwur férnig ih te kawian? Am onig owa ole pi te san? ⁴¹ Gam asilag kap am plet ole owa keř keř dassi qe o duak danah kehnaressi mares. Ag qere selag ge, Tiwur amegwa ag olag isak perig. ⁴² Gam Farisi ag dahmes! Ag kug os pelag. Kerđi ag danahas agop sak mangu ospi sési am Tiwurdi olag pi mouse. Ag qané, lumbu am darari kes kowol kowol ge watiweg ameg 10 qere new ameg usih qe Tiwur mursi. Gam ag qere séssi am ole Tiwurdi olag mousewew am danahas agop sak mangu ses. ⁴³ Farisi ag dahmes! Ag kug os pelag. Kerđi ag binag mak lowa danah wenlag ole dilag diak awen qewa ih dalagri séssi am ag qaglak awenwa felqareppeg ih weilagri olag naři de. ⁴⁴ Ag dahmes! Ag kug os pelag. Kerđi ag matmat bala pi kehak qe sillah, danahas pi duak qařewa tapeksi weisi,” eko anaran. ⁴⁵ Řo duak danah os anan, “Duak marak danah, na Farisi dilag né anna qe, na sewe ig ole urnig ne.” ⁴⁶ Qeri Yesus né noh meko anan, “Řo duak danah, ag ole dahmes! Ag kug os pelag. Ag Řo kug ole danahas qařlagwa mési, géri ag mawakri kug aqare. Gam ag mawakri kehnaresi ewlag ospi marsi. ⁴⁷ Ag dahmes! Ag kug os pelag. Kerđi ag alalgar profet qe aqareg am ag profet dilag mat-

matwa bala kehareksi bawarsi. ⁴⁸ Kowol asilag qewa danah ismarsi ge, ag alalgar algu profet aqareg qe kowol kena seg essi ag matmatwa bala keharsi. ⁴⁹ Qeri Tiwurdi duak kena qewa nug iril anan, ‘Da profet† am aposel‡ ole anwi atlag. Ag os ge nouni sarlag am gurak marlag. Am la os ge ag aqarweg mouslag.’ ⁵⁰ Qeri kug algu wan digumakwa profet aqareppeg uřiyew gei patak qe noh danahas geiri ag olag. ⁵¹ Algu Abel qakwari uřiyew pris Sakaraia qe Tiwurdi doř manko morakri qařew mourak am Tiwur Loug gamagwa ole qeg. Da meře anarina. Kug qe kunum noh qe danahas geiri ag olag. ⁵² Řo duak danah, ag dahmes! Ag kug os pelag. Kerđi ag danahas Tiwur dowegri dagareg. Am ag agégé Tiwur duak mineksi ge danahas Tiwur dolagri seppeg ag dagareg,” eko anaran. ⁵³ Sén Yesus lo qe minko attig sew ge, Farisi am Řo duak danah ole uhrilag bew, keger moreksi diguméksi gurgur kořmoreg. ⁵⁴ Ag Yesus né nouni os anew dueksi ořalagri kařeordéw.

12

Né Darmak Kowolri Dahmes

¹ Sén qewa ih danahas kuřumnah 1,000 eřdak ag Yesus pelagri qagleksi agégé nug tapeksi seppeg, Yesus bégur dilag tatam anan. “Ag Farisi danah dilag yis* qeri dahméksi koutores. Yis qe darmak gařlagwa ih Tiwur dimlamdak kowol. Qe sillah aw seweg. ² Ag keř keř lareksi tonak nie ge Tiwur sew ambo melag. Am keř lariaqwa sési qe ole sew kunum pelag am dolag. ³ Qeri keř ag gattuwa

† 11:49 11:49 Tiwurdi né oko mariak danah

‡ 11:49 11:49 Danah os Yesus nugégé toqarko anew kekuak nusig séksi ateg ole qe. Aposel ge Yesusri meř danah.

* 12:1 12:1 Yis ge palawa ole kawlieksi palawa manweg titfe.

lugmeksi agé marilag ge, dimba kémunwa danahas kunum dolag. Am keŕ kutiptip kurugwa marisi ge, dimba tamniakwa mariew kunum dolag.”

Tiwur Ih Farðes

⁴ “Da leilar, ag anarina. Ag danah feŕlag qelag seweg qeri aw faŕarweg. Kerdi ag dimba kité la os pi seweg. ⁵ Gam da ag oun faŕurlagri qe anwi dolag. Ag Tiwur ih farðes. Nug ge koulli kaŕwarew mouslagri am ole dimba touŕarew kew pi qouse olewa nolagri gagragsak ole. Meŕenah, da buliko anarina, ag Tiwur ih farðes. ⁶ Ag dossi, danah ag é reis anig tanig ole qarég nagurnah usihwa irar mési. Gam Tiwur nug reis anig usih ospi doug katie. ⁷ Am meŕenah Tiwur ag kurlag urug kunum ge gane qe nug due. Qeri ag aw faŕweg. Am nug asilag o nie ge, é nounou kuŕum dilag dahme qe erðak.”

Yesusri Aw Uŕlag New

⁸ “Da ag anarina. Oun os nug danahas amlagwa nug da dimlamŕeri andig ge, Danah Bega Da ole geisah Tiwurdi doup amlagwa nug danah dasil eko andil. ⁹ Gam ounté os danahas amlagwa nug da dimiréw ge, da ole geisah Tiwurdi doup amlagwa nug danah dasil kawa eko andil. ¹⁰ Danah oun os pi duak Danah Begari nouni andig ge, Tiwur hipunin nusig kusuqrig. Gam oun os nug duelle Koulli Gun oko oko qurdig ge, Tiwur hipunin nusig qe ospi kusqew. ¹¹ Ag da dimlamiŕsi qeri danah os ag orwareksi diareksi Yuda dilag binag mak lowa am kuri danah wagé wagé am danah kuakri wittak marak ole qe nolagwa atweg ge, keŕ né am areg anlagri aw dahmak kuŕum oweg. ¹² Kerdi ag keŕ éksi anlagri ge sén qewa Koulli Gun ag ismardig,” eko anan.

Danah Kéhu Oleri Né Tonak

¹³ Danah usih os danahas ameg naŕi qe olagwa nug Yesus amegwa anan, “Duak marak danah, na da awal amegwa anwe nug keke i memnitdi ge wasaŕko dasil sillah qe miŕar.” ¹⁴ Gam Yesus né qe noh meko anan, “Lal, oun da asilas ken watiko mattildi keprák danah toqirán?” ¹⁵ Elle ge nug kunum amlagwa anan, “Ag dahméksi koutores! Ag keke kunumdi aw amlag qew. Danah kénih naŕi ole ge, kénih qe sew nug kena ospi dew.” ¹⁶ Am Yesus nug né tonak usih os amlagwa anan, “Danah kéhu ole os dar seko ke kehew mou kuŕumnah nian. ¹⁷ Qewa ge, nug nugégé dahman, ‘Da ke ene oko mew diakri awen olele kawa. Qeri da aregnah séril?’ ¹⁸ Am nug anan, ‘Da ere séril. Geisah da ke makri lo kunum logŕarko am lo wagé wagé fuarko ge, ke kunum am keke dahlar kunum ole qewa mardil. ¹⁹ Am da dagégé dasil ere andil, da ke am keke la kunum qe makaŕ kuŕum urwildigri olele qaglin. Aria, da sam delle ke lelle am ke naŕi selle gamal asakwa daril.’ ²⁰ Gam Tiwur nug amegwa anan, ‘Na né tapewnak danah! Gei tuqan ewa na mousdip. Am keke kunum bawren de ene ge geisah oun memeg mérig?’ ²¹ Géri danah keke kuŕumnah wan ewari nugé nusig qagle ole qe dowa qere bérig, gam Tiwur nohwa ge nug keke kawa,” eko anan.

Wan Kénihri Dahmak Naŕinah Aw Oweg

²² Yesus bégur dilag anan, “Qeri da ag amlagwa anina. Ag wan enewa fou diakri aw dahmak kuŕum oweg. Ag ke lessi fou dalagri am feŕlag balari ole dahmak kuŕum aw oweg. ²³ Ag fou dasi qe ke erðak am ag feŕlag qe feŕlagri bala qe erðak. ²⁴ Ag kalog dilag dahmes. Ag ke pi kéhsi am ke uksi qagleksi louw pi mési, gam

Tiwur ke mare. Tiwur é dahmare qe érdak ge ag dahmare. ²⁵ Ounté os olagwa dahmak kuřum ow fou darigrí sén deř usih yako terigrí olele té? ²⁶ Géri ag keke nagur usih os sakri olele kawa ge, kérdi ag dahmak kuřumnah keke lari usi? ²⁷ Ag bala areg besi qe dahmores. Ag teret pi sési am lamén asilag pi sési. Gam da anarina. Bala qe asilag amnak ge king Solomon féru bala kenanah qe érdak. ²⁸ Gisgar nug gei de am kéřew ih danah kotařko kewba touřew árdig. Gisgar sam qe Tiwur nug bala mare. Qeri Tiwur ag gumardig qe gisgar gumare érdak gumardig. Ag danahas olag meře mak kutuk ole! ²⁹ Qeri ag kéř ke am le ole lelagri aw dahmak kuřum oweg. ³⁰ Wan ewa danah Tiwur pi dosi ole ag keke qeri marieksi sik aqare. Gam ag ge, Memlag Tiwur ag keke qeri olag nie qe nug íríl doko malwe. ³¹ Qeri ag Tiwurdí Kingdom meweg anqew dimlamurweg ge, nug keke qe ole mardig.”

Keke Kena Saw Kappari Qaglakri Kowol

³² “Ag da beglar kuřum kawa, gam ag aw farweg. Ag Memlag Tiwur nug o gamag asakwa Kingdom nusig mardig. ³³ Ag keke asilgar daren marweg qarég uksi o duak danah mares. Qe ge saw kappa keke kena asilag qe qaglak darig. Am qarég yanakri sogot saw kappari ge óre ole kawa. Asilag keke kena qe ospi kawa mew qe darig, yawsen danah ospi yawsen oweg am diruř ospi seweg nou mew. ³⁴ Asilag keke kenanah arewa de qewa ih ag olag am dahmak asilag kunum ole qewa darig,” eko anan.

Nařinah Úřirigra Bawrena Da

³⁵ Yesus anaran, “Ag lamén asilag kutuk mappieksi tageksi am lam kamutweg ářewew bawressi

des. ³⁶ Ag kuak nir dilag danah naři danah as wakri mallenwa úřirigrí ameg méksi dasi qe sillah bawressi des. Géri sén nug úřiko ihřam qouqou orew ge, usihri ihřam nusig matleksi morlag. ³⁷ Kekuak nir are ag danah naři asilag úřirigrí bawreksi us aw niweg ameg méksi deppeg buliko úřiko piarew ge, ag olag gamag asdig. Da meře anarina. Nug nugégé lamén tagko sew ag daweg ke bawarko mardig. ³⁸ Nug tuřan tugamag té kuagařdigri maru gelleppeg té úřiko kuak nir ameg méksi deppeg piarew ge, ag olag gamag asdig. ³⁹ Am ag né dasil óřwes: Lo memeg os yawsen danah nug lougwa úřirigrí sén qe íríl duewew ge, yawsen danah qe loug ospi logařko owa now. ⁴⁰ Qe sillah, ag ole sansan bawressi des. Kérdi ag Danah Bega da kéř sénwa buliko úřiril qe ag pi dosi,” eko anan.

Kekuak Nir Kenari Né Tonak

⁴¹ Yesus né qe anko malwew ge, Pita kořmoran. “Nařinah, na ig amnigwa ih te né tonak ene marina, kawa danahas kunum ole amlagwa te marina?” ⁴² Nařinah kořewa oko anan, “Oun ge kekuak nir kena duak kena ole qe danah naři nusig nug toqorew kuak nir la qe gumarelle ke marak sénwa ke wasařko mardig? ⁴³ Dimba danah naři nusig qe buliko úřiko am kuak nir qe kekuak mangu ih sewew perig ge, kuak nir qe nug o gamag asdig. ⁴⁴ Meřenah anarina, danah naři qe geisah sew kuak nir qe keke nusgur kunum ole gumardig. ⁴⁵ Gam kuak nir os ere dahmelo, ‘Danah naři dasil ofeř ospi buliko úřiyew,’ elle nug kuak nir am kuak as la qe digumeko mouřwarko ke naři seko lelle am le gagrag qe leko gar qelo. ⁴⁶ Danah naři qe deř kuak nir qe pi dahmurdig ole qewa

am sén os nug pi dorigwa ufiko kuak nir qere peko ge, nug kotrew new danah olag mefe pi me dalag awen gewa tourew nurig. ⁴⁷ Kuak nir nug danah nafi nusig kefdi o nie qe duelle pi bawarko dimlamdew pe, danah nafi nusig sew nouninah qelag. ⁴⁸ Gam kuak nir nug danah nafi nusig kefdi o nie qe pi duelle nouni sew pe, danah nafi nusig nafi pi qew. Tiwur danah are ag nafi mare ge, ag nafi morlag. Am danahas are ag keke nafi gumlagri mare ge, nug ag nafi bulieksi morlagri kofmardig.”

Yesus Dimlamdakwa Danahas Watilag

⁴⁹ “Da wan ewa kew meril ufiiyin, am da ol se ge kew qe ifil digumeko afan. ⁵⁰ Am da le lourak oswa nuril. Qeri da kug nafi iwrewew atew sén qe durig. ⁵¹ Ag dahmesi ge diak kena te darigri wan ewa ufiiyin? Kawa. Da anarina, da danahas olagwa koptak berigri ufiiyin. ⁵² Gei digumak lo usihwa danahas tanig ole qe watieksi, kiam ge arit dilas olag usih ospi dew am arit ge kiam qe dilag olas usih ospi dew. ⁵³ Ag watieksi memeg nug nag ole olas usih ospi dew am nag nug memeg ole olas usih ospi dew. Anig ge areg ole olas usih ospi dew am areg nug anig ole olas usih ospi dew. Am anig nug aswa ole olas usih ospi dew am aswa nug anig ole olas usih ospi dew,” eko anan.

Sén Peksi Olag Mourar!

⁵⁴ Yesus danahas kurum amlagwa anan, “Ag fur kem nuakwa qaglew peksi ge, ofef ole ansi. ‘Gu nerigri se.’ Am qe mefe, gu ne. ⁵⁵ Am sén ag ulas kenariwa yalew ge, ag ansi. ‘Geisah kem gagaridig.’ Am qe mefe kem gagre. ⁵⁶ Ag darmak garlagwa ih Tiwur dimlamdak danah! Ag wanwa am saw karan sén kitru

peko anakri ge dosi koutursi. Gam kefdi ag gei sén ewa kef kef beko ate qe peksi digu olag ospi moure? ⁵⁷ Kefdi ag agégé kowol mangu ih sakri ospi kepreksi dimlamursi? ⁵⁸ Na danah os na kitéri yagor mirew pe, kugri né keprak lowa pi wanak ih umuwa né qe bawreksa olas usih melasri mena pe. Kawa ge, nug na keprak danah dowa wirko wanew ro danah ewlagwa meirew kalabuswa yanirlag. ⁵⁹ Da na anirina. Na kug noh qarég makri anak qe kunum mewe atew am nagurnah ospi meka malarip ge, na kalabuswari dimdim ospi downen,” eko anan.

13

Danah Os O Pi Bulirig Ge, Paral Mérig

¹ Danah os Yesus ole sén gewa dessi Yesus anoreg. Galili danah os dof manko Tiwur morak qe sepppeg, Pailot anew aqarweg mousweg karlag noko dof karag qe ole kawlian. ² Yesus anan, “Ag dosi ge, Galili danah mouseg ole qe hipunin asilag ge Galili danah la kunum dilag hipunin qe erdak nouninah, qeri te ag kug qe og? ³ Kawa! Da ag anarina, ag olag pi buliew pe, ag ole qere ih paral melag. ⁴ Am danah 18 qere Siloam lo welah nafi karan uwa qiko aqarew mouseg qe, ag dosi ge, ag qe Yerusalem danahas la efareksi hipunin nouninah te seg? ⁵ Kawanah! Da anarina, ag olag buliar. Kawa ge, ag ole qere ih paral melag,” eko anan.

Gu raw Mou Pi Nieri Né Tonak

⁶ Am Yesus né tonak ene amlagwa marian. “Danah os wain dar nusig owa gu raw ker os kehew dian. Géri dimba ge, gu raw qe mou niew perigri atan, gam mou usihnah ospi niew pian. ⁷ Géri nug dar gumak danah nusig qe anoran, ‘Da maka kiam qere

guřaw ene mou niew perildi s3n kuřum uřir3m, gam mou usih ospi niew p3gin. Qeri na kowe qiar. Keřdi nug awen oko delle wan kirag pi malwew.’⁸ Gam dar gumak danah qe kořewa oko anan, ‘Danah naři, minwe makař usih la os ole dew. Am da diguwa wan kapatko mol morelle am kinkak ole diguwa m3ril.’⁹ Makař os uwa mou niew pe, qe kena. Gam mou ospi niew pe, kuwi qirig,’ eko anan.

Yesus Sabatwa As Os Sew Waře Pasaoran

¹⁰ Sabat deřwa Yesus Yuda dilag binag mak lowa danahas Tiwurdi N3ri duak maran. ¹¹ Am as os qewa dian ge koulli nou sew nug makař 18 qere gumi tupiak, g3ri nug gumi mangu morakri olele kawa dar3. ¹² S3n Yesus as qe peko ge, uřwurew dow anoran, ‘As, da waře nasip s3wi pasaore.’¹³ Yesus qere anelle eweg as qe gumiwa mew, usihri asko mangu delle Tiwur binag suman. ¹⁴ Yesus Sabatwa as qe sew kena man, qeri kuri danah Yuda dilag binag mak lori qe Yesusri uřribew danahas dilag anan, ‘Ag kekuak deř la qewa ge uřiyeksi anweg waře asilag sew pasaorar, gam Sabat deřwa uřiyeksi ge ag aw anweg waře asilag sew pasaorew,’ eko anan. ¹⁵ G3ri Nařinah kuri danah qe anoran, ‘Ag darmak gařlagwa ih Tiwur dimlamdak danah! Ag Sabat deřwa makau am donki ole asilgar le marlagri pi te kusqareksi diareksi atsi?’¹⁶ Qeri as Abraham fuřuh ene Satan wařewa dagorew makař 18 qere dian. Nug Sabatwa kusqak murdil ge nouni te?’¹⁷ S3n Yesus qere anew ge, danah nug kegeř moreg qe ag uřlag nan. Gam danahas ge nug kuak kunum kenanah san qeri olag gamag asan.

Mastet 3gri N3 Tonak

¹⁸ G3ri Yesus anaran, ‘Tiwurdi Kingdom ge kit3 sillah? Da qe kit3 sillah eko andil?’¹⁹ Qe ker os w3nih mastet 3g sillah qe danah os oko dar nusigwa kehan. Ker qe beko naři mew ewegwa 3 kuřum uřiyeksi sik ukxi dasi,’ eko anan. ²⁰ Am nug buliko anaran, ‘Da Tiwurdi Kingdom ge kit3 sillahnah eko andil?’²¹ Qe yis sillah. As os yis oko palawa nařiwa gogrew now kawlian. Yis qe sew palawa titiřko naři me qe sillah,’ eko anan.

Ihřam Nagurdi N3 Tonak

²² Yesus Yerusalem attigri atelle taun am kaw eřaran ole qe danahas doulag patelle atan. ²³ Danah os kořmoran, ‘Nařinah, danah usih usih te foumak ukxi sansan dalag?’ Qere anew ge, Yesus anaran. ²⁴ ‘Ag ihřam nagur qewa nolagri gagrag mes. Da anarina, danahas kuřum ihřam qewa nolagri selag, gam ospi noweg.’²⁵ S3n lo memeg asko ihřam manew ge, ag dimdim aseksi ihřam dessi ihřam qouqou oressi anlag, ‘Danah naři, ihřam matulwe ig ole not,’ 3ksi anlag. Gam nug kořlagwa oko andig, ‘Da ag pi duarina am ag arewari uřiy3w.’²⁶ Qere anew ge, ag anlag, ‘Ig na ole ke am le ole let am na ig kawmigwa dounig paten ole qe,’ 3ksi anlag. ²⁷ Gam nug kořlagwa oko andig, ‘Da ag pi duarina am ag arewari uřiy3w. Ag kunum kowol nou sak danah, ag uwa wanes!’²⁸ S3n qewa ge Abraham, Aisak, Yakop am profet kunum saw kappa deppeg piarlag. Gam ag ge minarak dimdim dessi, qeri olag nou mew kuanessi 3lag gařmessi dalag. ²⁹ Geisah danahas kem bakwari, kem nuakwari, kenariwari am nanettiwari am wan atu kunumbari ole uřiyeksi awen asilag ukxi saw kappa mallen naři qewa dalag. ³⁰ Meřenah, danahas gei ag wendlag kawa dasi ge Tiwurdi Kingdom

owa ag wenlag ole dalag. Am danahas gei ag wenlag ole dasi ge ag wenlag kawa dalag,'” eko anan.

Yesus Yerusalemri Kuanan

³¹ Sén qewa ih Farisi os duksi Yesusri aneg, “Na awen ene minka awen oswa eit, keŕdi king Herod Antipas na iwirdigri se.” ³² Géri nug koŕlagwa oko anan, “Ag ateksi qé déguŕ qe ere anores, ‘Da gei keŕew ole am atak ge danahas feŕlagwa koulli nou geŕardil am waŕe danah séwi waŕe pasaorlag. Am sén dasil uŕiyew ge kekuak dasil malaril.’” ³³ Areg darig ge da gei, keŕew, am éŕul attil. Keŕdi Tiwurdi profet ge Yerusalem ih aqarweg moussi! ³⁴ O Yerusalem, Yerusalem! Ag ih Tiwurdi profet agrowa uŕiyeg ge, qar touŕeg am aqarweg mouseg. Sén kuŕum da maru anig nagur sougwa qaglarke tonare qe sillah, nir asilgar qaglardil sein, gam ag mineg. ³⁵ Ag qere dues! Gei Tiwur ag minarko loulag dimurdig. Da ag amlagwa anina. Ag da bulieksi ospi peiŕweg atew sén uŕiyew ag ere anlag, ‘Ig Naŕinah Tiwur wénihwa Danah uŕirig qe binag ménig,’ éksi anlag,” eko Yesus anan.

14

Yesus Sabat Deŕwa Waŕe Danah Os Sew Kena Man

¹ Sabat deŕ oswa Yesus Farisi dilag naŕi os lougwa ke lakri atan. Atew ag nug kaŕéoreksi koutoreg. ² Qewa ge, nug nohwa aminko danah os waŕe féŕu titŕarak ole qe dewew pian. ³ Yesus Farisi am Ŕo duak danah ole koŕmaran. “Sabatwa waŕe danah sew kena mak ge Ŕo dimlindak te?” ⁴ Gam ag né kawa deg. Géri Yesus danah qe oŕako sew kena mew ge anorew atan. ⁵ Atewew ge, Yesus koŕmaran, “Ag eneri olagwa usih os nag te kawa makau nusig te os Sabat deŕwa moŕ oŕewa tolako

now pe, ag ofer pi te béruweg bew?” ⁶ Am ag né ospi aneg.

Mallen Memeg Am Ŕo Danah Ole Dilag Né

⁷ Sén Yesus danah mallenwa ke lakri uŕieg qe danah wenlag ole dilag awen qewa dalagri seweg peko ge, né tonak ene anaran. ⁸ “Sén danah os ag nug wakri mallenwa atakri anew ateksi ge, ag danah wenlag ole dilag awen qewa aw daweg. Keŕdi danah os wénih naŕi ole na eŕdak uŕwurweg uŕirig ge na pi dona. ⁹ Qere dew ge, mallen memeg a aŕié uŕwattig ole qe doko anirdig. ‘Na danah ene awen mor,’ eko anew uŕan newew atka danah wenlag kawa dasiwa darip. ¹⁰ Gam sén na anew atka ge, awen danah wenlag kawa dasi qewa deppe, mallen memeg doko anirdig, ‘Lal, na aska atka awen kena danah wenlag ole dasiwa da,’ eko anirdig. Qe ge danah mallen qewa uŕilag ole leipar qe nolagwa na wénim sumdig. ¹¹ Danah oun os nug nugégé wénih sumdig ge, Tiwur danah qe wénih qew nérig. Am danah oun os nug nugégé wénih pi sumdig ge, Tiwur nug wénih karan sumdig.” ¹² Géri Yesus mallen memeg qe amegwa anan, “Sén na ke naŕi os seka ge, na leipar, awnar kampar ole, nasipwari am leipar kehlag ole na mourirak dasi qe aw uŕwarwen. Na qere sérip ge, ag ke séksi noh méksi na uŕwirlag. ¹³ Gam na ke naŕi seka ge, o duak danah, danah ewlag félag nou ole am amlag gaŕu ole qe uŕwarwe ates. ¹⁴ Qere sérip ge, ag noh makri olele kawa. Gam sén danahas mangunah ag Tiwur nohwa sirlag ge, Tiwur na noh mirko wittak mirdig,” eko anan.

Mallen Naŕiri Né Tonak

15 Danah os ke lelle Yesusri né qe doko ge anan, “Danah os mallen nañi Tiwurdi kingdom owa ke lérig ge, nug Tiwur wittak kena morew o gamag asdig.” 16 Yesus né qe noh meko anan, “Danah os mallen nañi ofwelle danah kuñum urwaran. 17 Sén keke kunum bawarko malako ge kekuak nir anew atko danah urwaran qe anaran, ‘Keke kunum bawrakra doweg atet,’ eko anaran. 18 Danah urwaran ole qe kunum ole ag kekuak la ole, géri ospi atweg éksi aneg. Danah anqak qe anan, ‘Da wan fou os daren mein, géri minwe da atko wan qe kitalko peril,’ eko anan. 19 Os ge nug anan. ‘Da tuménah makau 10 qere daren marin. Géri ag areg kekolag qe seweg peril qeri da ospi attil,’ eko anan. 20 Am la os ge anan, ‘Da tuménah as win, géri ospi attil,’ eko anan. 21 Kekuak nir qe buliko atko lo memeg qe amegwa anan. Anew ge, lo memeg qe uhñibew kuak nir nusigri anan, ‘Oférnah atka taunwa ih nañi am nounu olewa o duak danah, ewlag félag nou ole am amlag gañu ole qe diarka urí,’ eko anan. 22 Kekuak nir qe qere seko ge anan, ‘Danah nañi, na aníram sillah sém, gam lo ospi ambé.’ 23 Géri mallen memeg kekuak nir nusigri anan. ‘Na atka taun dimdim ih nañiwa am nounuwa ole keigarwe uríweg da loul ambar. 24 Da anarina, da danah tatam urwarwi mineg ole qe kunum mallen dasilwa ke nagurnah ospi leweg,’ eko anan,” Yesus qere anaran.

Yesus Dimlamdakri Kug

25 Danahas ameg nañi Yesus dimlamdepppeg, nug buliko danahas qe anaran. 26 “Oun os dagrowa durigri dew pe, nug dasil o nañi mousar. Am nug memegri

am anigri, wawri, nir nusgur dilag, awgur kamgur dilag, am kéwingur dilag am nugégé nusig o nañi niew pe, nug da begal diakri olele kawa. 27 Am oun os nug nugégé nusig ker mawanak ospi mouko am da pi dimlamiñko pe, nug da begal diakri olele kawa* . 28 Am ag olagwa danah usih os lo welah am karan os furigri ge, nug dako qarég gane tourko lo fuko malarigri qe dahmeko peko am digumérig. 29 Keñdi nug digumeko lo lagko am pi malarig ge, danah kunum lo qe peksi siwegkoleksi ere anlag. 30 ‘Danah ene lo digumeko fuan gam nug malwakri olele kawa,’ éksi anorlag. 31 Am king os 10,000 fan danah ih ole nug king os 20,000 fan danah ole fan selasri ge, nug lia qe éñurdigri ge delle dahmeko koutorko peko digumeko fan sérig. 32 Nug olele kawa dew pe, king os qe lawar dewew danah os anarew keñ ihwa olas usih melasri koñmorlagri atlag. 33 Am ih qewa, ag oun os nug keñ keñ nusig qe kunum pi dimorko pe, nug da begal diakri olele kawa.”

Sol Mumda Kawa

34 “Sol ge keke kena, gam nug mumda kawa mew ge, areg seweg am buliko mumda ole darig? Kawa. 35 Sol mumda ole kawa qe nug ker os diguwa wanwa meko ker ke morakri kawa, nug kekuak ole kawa. Qeri sol qe tourweg ate. Oun os doug né duakri ole dew pe, né ene doko koutorar,” eko Yesus anaran.

15

Sipsip Lariakri Né Tonak

1 Deñ os takis wak danah am hipunin danahas ole qe ag Yesus né mariew dolagri uríyeksi qagleg. 2 Gam Farisi am Mosesri Ro

* 14:27 14:27 Ker mawanak mouko dimlamdak digu ge, nugégé nusig sak am o mourak dimorko am kug mawelle Tiwur dimlamdakri kowol.

duak danah ole né né marieksi aneg, “Danah ene hipunin danah ole liam pateksi arié ke lési.”³ Géri Yesus né tonak ene anaran.⁴ “Ag olagwa danah os nug sip-sip 100 qere ole darig am sip-sip usih os lariew ge, nug areg sérig? Nug 99 qe minarew awen gisgar olewa deppeg am nug atko sipsip usih larie qe pi te mariko pew?”⁵ Am sén nug peko ge, o gamag asew sipsip qe sumko guqawa meko mouko louw ate.⁶ Atko ge, nug leigur am nusigwari qe ole urwarew uriyeksi qagulweg anare. ‘Ig onig gamag asar. Ke’rdi da sipsip dasil usih larian qe peko buliko wém.’⁷ Da anarina. Kowol qewa ih, hipunin danah os o buliew ge, saw kappa ole olag gamag asak narinah nie am danah mangu 99 olag buliakri olele kawa qe dilag olag gamag ase qe érdak.”

Qarég Lariakri Né Tonak

⁸ “Qe sillah, as os qarég silwa*
10 qere ole am usih os lariew pe, nug areg sérig? Nug lam kamutko louw kinkak ekfelle yamorko mariko mariko peko urig.⁹ Am sén nug peko oko ge, leigur am nusigwari qe ole urwarew uriweg anare. ‘Ag da ole onig gamag asar, ke’rdi qarég silwa dasil larian qe peko buliko wém.’¹⁰ Da anarina. Kowol qewa ih, hipunin danah os o buliew ge, Tiwurdi doup qe ag ole olag gamag ase,” eko anan.

Nir Geir Memeg Munurko Atanri Né Tonak

¹¹ Yesus né ene buliko anaran, “Danah os békur arit ole daré.
¹² Géri nag dimbari ge memegri anan, ‘Mem, na keke wasar’ka dasil sillah qe mir.’ Géri memeg keke kunum nakur dilas wasar’ko matan.¹³ Wagam ole kawa, nag dimbari qe keke nusig kunum qaglew daren meg. Meweg qarég

oko orwelle atu os una qewa atan. Atko qewa delle ge, nug o mourakwa ih nouwa qarég sew kawa man.¹⁴ Kawa mew dimba ge, atu qewa laké nari nian. Niew ge, nug digumeko qagrakwa dian.¹⁵ Géri nug atu qewari danah os dowwa kekurigri atew ge, danah qe sew atko awen qewa fo nusig ke marelle gumardé.¹⁶ Nug laké qew fo tounam gone mardé ole qe lérigri o nari daré, gam ounté kité ospi mordé.¹⁷ Sén dahmak kena nugrowa uriyew ge, nug nugégé anan, ‘Da memri kekuak nir ge ag ke olele, gam da ge ewa lakéri mousdil sein.¹⁸ Da mem dowwa buliko atko andil, “Mem, da Tiwur nohwa am na nomba ole hipunin sein.¹⁹ Da na nam eka ani’rdipri olele kawa, gam sewe da kekuak nir nasip de,” ’ eko andil, eko anan.²⁰ Géri nug asko buliko memeg dowwa atan. Gam nug ih una uriyewew memeg peko nusig o dow guko atko qagru ofako gamnurko kis moran.²¹ Géri nag memegri anan, ‘Mem, da Tiwur nohwa am na nomba ole hipunin sein. Da na nam diakri olele kawa.’²² Gam memeg kekuak nir nusgur dilag anan, ‘Ag ofer féru bala kenayah qe uksi méksi mores. Eweg dorohwa ring oraweg now am fég ga’ra méksi mores.²³ Am makau yu titfaknah qe qéksi ke nari seweg lettun onig gamag asar.²⁴ Ke’rdi ig da nal ene mousko malwan qere dahmet, gam buliko uriyé. Nug larian, gam buliko peko wém.’ Géri ag olag gamag asakwa ke nari qe leg.²⁵ Sén qe, nag digam nug dara dian. Nug uriko lo mourko dolle ge, kasi seppeg uttulag duan.²⁶ Géri nug kekuak nir os urwurew wanew ge, ko’r moran, ‘Uni ke’ sessi sési?’²⁷ Kekuak nir qe anan, ‘Na kamap ge buliko uriyé. Am na memen

* 15:8 Silwa qarég ene drakma. Qe def usihri kekuak noh.

makau yu titraknah qe qew ke nañi sam. Keñdi nug nag larian qe gurak ospi wan kena ih buliko uriyew o gamag asew sé,' eko anan. ²⁸ Gam awag ge uhríbew lo owa nuak minan. Géri memeg dimdim wanko lo owa nurigri sinanah kořmoran. ²⁹ Gam nug memegri anan, 'Na pe! Da makař kuřum nasip kekuak sam sein am né nasip ospi tappi nan. Gam qeri na meme yu usih ospi miřwe da leilar ole ke nag ospi séktu let. ³⁰ Sén na nam ene qarég nasip nañi oko atko o mourakwa ih nouwa am ihwari as feřlagwa sew kawa mew, am buliko louw uriyew ge, na makau yu titraknah qeka mořam,' eko anan. ³¹ Géri memeg anan, 'Da nal, na sansan da ole dařu. Am keke dasil kunum qe nasip. ³² Gam ig ke lettu onig gamag asé, keřdi na kamap ene mousan gam fouman. Nug larian gam buliko kappa uriyew ge, ig buliektu piam,' eko anan," Yesus qere anaran.

16

Kekuak Gumak Danah Duak Kena Ole

¹ Yesus bégur anaran, "Sén os danah kéhu oleri kuak nir dilag anqak danah keke nusig kunum gumardé ole qe daré. Deř os danah os atko danah kéhu ole qe amegwa kekuak nir nusgur dilag anqak danah qe qarég nusig sew kawa meré qeri anoran. ² Géri nug urwurew now kořmoran, 'Danah nasip marisi qe meře te? Keřdi na kuak qewari malwirdil, na qarég areg gumen qe kunum ole yaka miř,' eko anan. ³ Géri kekuak gumak danah qe nugégé anan, 'Danah nañi da gumře ge kuakwari géřildig, géri da aregnah séřil? Da dar kekuakri gagrařsak ole kawa am da nuqak uřal ne. ⁴ Sén da kekuak ewari

malwiřew ge, aregnah séwi dana-has wiřweg loulagwa danigri ge da duina,' eko anan. ⁵ Géri nug né mew danah nañi nusig qeri qarég noh makri danah qe usih usih uriyeg. Anuqko uriyen qe kořmoran, 'Na keke gane bulika noh meka danah nañi dasil murdip?' ⁶ Danah qe né noh meko anan, 'Oliw gořen siné 100 qere.' Kuak gumak danah anoran, 'Na pepa bulika noh makri ene oka ofeř qere daka siné 50 ih qere ya,' eko anoran. ⁷ Qe dimba am danah os dow kořmoran, 'Am na ge keke gane noh méřip?' Danah qe kořmak noh meko anan, 'Reis bek 100 qere.' Kuak gumak danah anoran, 'Pepa bulika noh makri nasip enan da oka 80 bek ih qere ya.' ⁸ Qeri danah nañi qe kekuak gumak danah kena kawa qeri 'Kena sam. Na duak kena ole,' eko anoran. Keřdi danah wan ewari ag keke gumarakri duak qe ag dosi koutursi, danah kamsahlak owari dilag duak qe eřarak. ⁹ Da amlagwa anina. Keke wan ewariwa ag leilgar kehnares, geisah keke qe ole diakri sén olele morew, Tiwur ag sumarew saw kappa awen ole dalag. ¹⁰ Oun os nug keke nagur pesorko gumdig ge, nug keke nañi ole pesorko gumdig. Am oun os nug keke nagur nouni gumdig ge, nug keke nañi qe ole nouni gumdig. ¹¹ Géri wan kéhu nouni gumarlag ge, oun nug saw kaw kéhu meřenah qe gumlagri mardig? ¹² Am ag danah osri keke nouni gumarlag ge, oun nug keke asilagnah qe mardig? Kawa. ¹³ Kekuak nir os danah nañi ařit dilas sén usihwa kekuakri olele kawa. Nug os ge dimorelle am osri ih o nirig. Nug os ge dimlamdelle am os ge mindig. Qe sillah ag Tiwur méřiwanessi am keke wan ewari ole méřiwanakri olele kawa," eko anan. ¹⁴ Qere anew ge, Farisi qarégri olag niré

ole qe dueksi Yesusri né siwkolessi aneg. ¹⁵ Né siwkolessi anweg ge, nug anaran. “Ag ansi, ‘Danah amlagwa ig mangunah,’ gam Tiwur ge ag olag pe am due. Danah ag ke’ kekeri olag na’ri nie ole ge, Tiwur amegwa keke qe nouninah.”

Yesus Né Ene Ole Marian

¹⁶ “Mosesri Ro am profet dilag né kusweppeg u’iyew Yonwa patan. Qe dimba ge, Tiwurdi Kingdomri né kena qeri kusweppeg u’iye. Am danahas kunum qewa nolagri kekuak na’ri sési. ¹⁷ Wan saw ole ge kawa mérigri kug kawa, gam Tiwurdi Ro Yak ge nagurnah ospi kawa mew. ¹⁸ Danah oun os waw munurko am as la urig ge, nug do’ dilag kowol qe sérig. Am danah os as gému mundak urig qe ole nug do’ dilag kowol qe sérig,” eko anan.

Danah Kéhu Ole Am Lasarus Ole

¹⁹ Yesus né marielle am né ene ole anaran. “Danah os kéhu ole am nug féru bala kena kenanah meré. Nug de’ dorog keke kunum olele daré. ²⁰ Nusig ka’ ih’famba ge o duak danah os wénih Lasarus qe niré. Lasarus nug féru kunum isi olele morak. ²¹ Am nug danah kéhu ole qe lougwari ke le minak bi’fa os lelemba daré. Am o duak danah ge qé isi me’weppeg daré. ²² Sén dow o duak danah Lasarus mousew, Tiwurdi doup maweksi ateksi awen kena Abraham dianwa Abraham wa’utqorweg des. Danah kéhu ole qe ole mousew suhmeg. ²³ Nug kew pi qouse olewa gurak na’rinah olle delle amnew tew ge, Abraham unanah uwa pian. Lasarus ole wa’utqorak dewew pian. ²⁴ Géri nug Abraham ur’wuran, ‘Mem Abraham, da nuqrina. Na dasil ot dow Lasarus anwe eweg gu’r noh lewa meko lémfal oug mérigri mar. Ke’rdi da kew ewa gurak na’rinah wina,’ eko anan. ²⁵ Gam

Abraham noh meko anan, ‘Nir dasil, na dahmor. Na wanwa keke kena ot nian ole qe kunum on, gam Lasarus ge keke nou qe diaran. Gam gei ge nug gamag asewew ewa de am na ge gurakwa dana. ²⁶ Am ole, ig gamnigwa kuha’ na’rinah nie, géri oun ewari agrowa wanakri olele kawa am qewari ole igrowa ewa mata’rko duakri olele kawa.’ ²⁷ Danah kéhu ole ge Abrahamri anan. ‘Da nuqrina, mem! Lasarus anwe da memel lougwa atar. ²⁸ Ke’rdi da awlar kamlar tanig ole ena dasi. Nug gagrag anarew da gurak duina awen enewa ag aw u’iweg,’ eko anan. ²⁹ Abraham noh meko anan, ‘Mosesri Ro am profet dilag né yak nie, géri minwe ag qe dues.’ ³⁰ Géri nug anan, ‘Kawa, mem Abraham. Qe olele kawa. Danah os mousko am buliko asko atko amlagwa andig qe ih ge, ag dueksi olag bulirig.’ ³¹ Abraham nug anoran, ‘Ag Moses am profet ole dilag né dueksi pi dimlamurlag ge, danah mousko am sirko anarew qe ole ospi dueksi dimlamurweg,’ ” eko Yesus anan.

17

Yesus Hipuninri Anan

¹ Yesus bégur anaran, “Sak o kowol seweg danahas hipuninwa tolalagri qe u’ilag, gam danah qe sérig ole ge nug kug os perig. ² Danah qe sew nir nagur ene os hipunin sew pe, nug fagwa qar na’ri eiseksi tourweg iwba nurig olelenah. ³ Qeri dahméksi koutores. Na liap nagrowa hipunin sew pe, ga’ra morwe buliko aw sew. Am nug o buliew kowol qe minko dimorew ge, hipunin noh nusig kusuqka dowe dout katiar. ⁴ Am nug de’ usihwa nagrowa hipunin seko 7 qere patko am buliko sén 7 qere patak u’riko ‘Kowol qe nouni sém,’

elle o buliew pe, hipunin nusig kusugka dowe dout katiar,” eko anaran.

O Meře Mak

⁵ Aposel* Nařinah anoreg, “Na sewe ig nasip onig meře mak nařin mar.” ⁶ Nug noh meko anaran, “Ag olag meře mak nagurnah kapis ég sillah darig ge, ag ker nařin giram eneri anlag, ‘Na sirka atka iwba diřin noka be,’ éksi anweg nug dimlamurko qere sérig.”

Kuak Nirdi Kowol

⁷ “Né os anwi dolag. Ag olagwa usih os nug kuak nir nusig wan kopattig am sipsip gumardig. Sén nug kuak awenwari uriyew ge, danah nařin nusig ‘Na ere daka ke le,’ eko anurdig te? ⁸ Kawa. Nug ere andig, ‘Na le loka bawarka ke dasil se. Na amel meka deppe da ke lewi tatam, am na ke le.’ ⁹ Kuak nir nusig né dimlamurko keke kunum sérig, qeri danah nařin nusig ‘Kena sam,’ eko ospi anew. ¹⁰ Géri ag ole Tiwur keř sakri ane qe kunum séksi malweksi ge, ag anes, ‘Ig kuak nir nasip sam. Ig kekuak migak qe sam,’ éksi anes,” eko anaran.

Yesus Lepra Danah 10 Qere Sew Pasaoreg

¹¹ Sén Yesus Yerusalem attigri atelle Samaria atu uriko patak qe dimlamurko atan. ¹² Nug atko kaw oswa nowew, danah 10 qere leprasi ole peksi unaka pi waneg lawar deg. ¹³ Dessi ge, ag urweksi anoreg. “O danah nařin, Yesus! Na isanig ot duar!” ¹⁴ Sén nug pi-arko ge anaran, “Ag ateksi feřlag pris† ismares.” Ag atessi ge, ihwa feřlag pasaorew peg. ¹⁵ Danah 10 qe kunum feřlagwa leprasi pasaorew peg. Gam danah usih os sén féru pasaorew peko ge, fag

nařinwa qalko Tiwur binag sumelle buliko uriyen. ¹⁶ Nug atko Yesus nohwa ole fégwa gatewa yako duk noko “Kenanah sam,” eko anoran. Am nug ge Samaria danah. ¹⁷ Yesus kořman, “Danah 10 qere séwi feřlag pasaore. Am danah 9 qere ge arewa dasi? ¹⁸ Aregru uriyak danah usih ene ih Tiwur binag mérigri buliko uriyé?” ¹⁹ Qere anelle Samari-arer qeri anan, “Aska eit, na ot meře mak qewa Tiwur férun sew pasaore,” eko anoran.

Danah Bega Buliko Uriyewew Sén Areg Darig

²⁰ Deř os Farisi danah Yesus kořmoreg. “Ganeh Tiwur king beko danahas nusur gumardig?” Yesus noh meko anaran, “Ti-wurdi Kingdom digumeko bérig ge ag amlagwa peppeg pi bew. ²¹ Danahas ‘Enan de,’ am ‘Unan de,’ éksi ospi anweg. Keřdi Ti-wurdi Kingdom iril uriyen danahas gamlagwa de,” eko anan. ²² Yesus bégur dilag anan, “Sén qe uririg qewa ag da Danah Bega deř usih os peiflagri selag, gam ag ospi peifweg. ²³ Danah anarlag, ‘Mesaia‡ nug unan de,’ am ‘Nug enan de,’ éksi anlag. Gam ag aw gueksi dimlamareksi atweg. ²⁴ Keřdi Danah Bega da uririldi deřwa saw karan ampír oko atu kunum olele more qe sillah peksi ge dolag. ²⁵ Gam tatam ge, da gurak nařin uril am geiri danahas dimirřlag. ²⁶ Nuari sénwa danahas kowol nou seréw qe sillah Danah Begari uriyak sénwa ole qere ih selag. ²⁷ Danahas ke leg, le leg, danahas nug oppeg atew atew ole Nua kuh nařinah qe owa nuan. Sén qewa gu nařin neko le kue nařin bew paral meg. ²⁸ Qe sillah Lotri sénwa ole qere seréw. Danahas

* 17:5 17:5 Danah os Yesus nugégé toqarko meř arew kekuak nusig séksi ateg ole qe. Aposel ge Yesusri meř danah. † 17:14 17:14 Tiwur am danahas ole gamlagwa Tiwurdi ofa mak danah ‡ 17:23 17:23 Tiwur danahas nusur buliko diardigri danah toqoran.

ke lessi, le lessi, keke darendi maressi, keke fou daren maressi, ke keharessi am lo fuaressi daréw.²⁹ Gam Lot Sodom minko atewew sén qewa ge, Tiwur sew kew am qar ařelle saw karandi gu sillah neko ařarew kunum ole paral meg.³⁰ Qe sillah danahas pi bawrak deppog deř qewa Danah Bega kamsahlak gun olewa uřirig.³¹ Deř qewa danah os loug dimdim darig ge, lo owa keke nusgur diardigri pi now. Qe sillah danah os dara darig ge, lougwa keke diardigri buliko ospi atew.³² Keř ihwa Lot waw paral man qe dahmores.³³ Oun os nug nugégé kowol kunum nusig dimlamurko ge, foumak sansan diakri ospi ow. Gam oun os kowol kunum nusig dimorko da dimlamřelle mousdig ge foumak sansan diakri urig.³⁴ Da anarina. Danah Bega uřirig sén qewa danah ařit os tuřan ařié nieppes ge, os ge olle am os ge munurdig.³⁵ As ařit os ařié ke sagřessa dalas ge, os ge olle am os ge munurdig.”³⁶ (Danah ařit os ařié dar usihwa dalas ge, os ge olle am os ge munurdig.)³⁷ Yesus né mariko malwew, ag kořmoreg. “Nařinah, qe arewanah bérig?” Nug kořmak noh meko anaran. “Awen arewa doř mousak os niewew ge, tum qewa qagulsi. Qe sillah, da lugmak ospi uřiwin ag dueppog uřiril,” eko anaran.

18

As Qehřas Am Né Keřřak Danah Ole Dilas Né Tonak

¹ Am Yesus nug Bégur 12 unuqorak pi minweg sansan unuqorlagri né tonak ene amlagwa anan.² Nug anan, “Né keřřak danah os taun oswa daré. Nug Tiwur pi fařurdé am danah dilag ole pi dahmeré.”³ Am as qehřas os taun qewa daré. Nug bulibuli né keřřak danah qe dow atko

nuqurko andé. ‘Kegeř dasil nouni siřan. Qeri na da dimulwa daka né dasil kepař,’ eko anan.⁴ Sén welah né keřřak danah qe kité ospi san, gam dimba nug nugégé anan. ‘Da Tiwur pi fařřina am danah dilag ole pi dahmeina.’⁵ Gam as ene bulibuli dagnéwa uřiyew séřiag iwře, géri né nusig kepařko mangu murdil. Keřdi nug sew da kéwsil kawa ospi mew!’ eko anan.”⁶ Am Yesus anan, “Né keřřak danah mangu kawa nug keř eko anan qe dues.”⁷ Am Tiwur nug danahas nusgur keřřaran qe dilag kug tuřan kémun ole unuqorakwa mursi ge, asilag seko pi te mangu morko mare? Nug qere duelle te darig? Kawa.⁸ Da anarina. Nug ofeřdi mangu morko mardig. Gam sén Danah Bega da wan ewa buliko uřiko ge, o meře mak danah os piardil te?” eko kořmaran.

Farisi Danah Am Takis Wak Danah Ole Dilas Né Tonak

⁹ Danah os ag dueg ge ag mangu essi am la kunum ge sam sillah duardéw qeri Yesus né tonak ene anaran.¹⁰ “Danah ařit os unuqorlasri Tiwur Lougwa ates. Os ge Farisi danah am os ge takis wak danah.”¹¹ Farisi danah qe asko lawař delle nug unuqoran. ‘Tiwur, da na kena sam eko anarina, keřdi da danah la kunum sillah kawa. Da yawsen danah kawa, sak nou sak danah kawa, danah la walgar diko weiyak danah kawa, am takis wak danah ene sillah kawa.’¹² Da kuha usihwa kurdako ařit patina am keke kunum wina ge watiwi ameg 10 qere new ameg usih qe na mirina,’ elle unuqoran.¹³ Gam takis wak danah ge lawař asko delle saw karan os ole pi amnan, gam eweg damkowa meko delle unuqoran, ‘Tiwur, da hipunin danah. Na dasil ot dow hipunin dasil kusuřka miř,’ eko anan.¹⁴ Da anarina. Takis wak

danah qe Tiwur hipunin nusig noh kusqew Tiwur nohwa danah mangu delle lougwa atan. Gam Farisi danah ge qere kawa. Kerdi oun due nug wénih ole ge, Tiwur sew nug wénih kawa darig. Am oun nug due nug wénih kawa ge, Tiwur sew nug wénih ole darig,” eko anan.

Yesus Nir Nounu Wittak Kena Maran

¹⁵ Danahas Yesus nir yu ferlagwa eweg meko wittak kena mardigri dieksi dog. Sén Yesus bégur ag piareksi ge, gaña mareg. ¹⁶ Gam Yesus nir nounu urwarew nugrowa doweg ge anan. “Nir nounu parwarweg dagrowa dos. Ag aw dagarweg. Kerdi danahas nir nounu ene sillah qe Tiwurdi Kingdom ge asilag. ¹⁷ Da meñenah anarina. Danahas are nir nounu ene sillah ag Tiwur kallowa pi dalag ge, ag Tiwurdi Kingdom owa ospi noweg,” eko anan.

Yuda Dilag Kuri Danah Kéhu Ole

¹⁸ Yuda dilag kuri danah os Yesus kořmoran, “Duak marak danah kena, da aregnah seko foumak sansan diakri uril?” ¹⁹ Yesus kořewa oko anan, “Na kerdi dasil kena eka anam? Ounté kena os kawa. Tiwur nug nugé ih kena. ²⁰ Na Tiwurdi Ro 10 dona: ‘Na watnah dewew as la ole aw weiwes, danah aw dug kowen, yawsen aw sewen, né dar aw mewen, am anin memen ole kallolaswa denna kořlas dimlamur,’” eko anaran. ²¹ Anew kuri danah qe anan, “Ro qe kunum ole da nir nagurwa delle dimlamurwi uřiyen,” eko anan. ²² Sén Yesus né qe doko ge anoran, “Na ih usih os tuqren. Na kéhun kunum anwe daren meweg am qarég oka o duak danah marka ge, na saw kappari wittak kena qe urip. Qere seka ge, doka da dimlamir,” eko anan. ²³ Gam nug danah kéhu naři

ole géri, sén Yesus qere anew doko ge neko qan. ²⁴ Géri Yesus danah qe neko qew peko anan, “Danah kéhu ole os keke nusig kunum minko Tiwurdi kingdomwa nurigri ge kug ole. ²⁵ Meñenah, doř naři wénih kamel ge keke titiyakri nil ořewa nurigri ge kug ole, gam danah kéhu ole ge Tiwurdi kingdomwa nurigri ge kug qe erđak.” ²⁶ Danahas né qe dueksi Yesus kořmoreg, “Am oun ge foumak sansan diakri urig olele?” ²⁷ Yesus kořmak noh meko anaran, “Keř os danah sakri olele kawa ge, Tiwur ge sérig olele,” eko anan. ²⁸ Anew Pita anoran, “Ig na dimlamir nigri keke isangar kunum minaret,” eko anan. ²⁹ Anew Yesus anaran, “Da meñenah anarina. Danah os nug Tiwurdi kingdomri seko loug minko, waw minko awgur kamgur minarko, anig memeg ole am nir nusgur minarko asdig ge, ³⁰ nug sén wan ewa dewew saw kappari wittak kena kuřum tatam moran qe erđak murdig am keřew né foumak sansan diakri ole murdig,” eko anaran.

Yesus Mousko Am Asdigri Buliko Anan

³¹ Yesus Bégur 12 qe urwarew wanweg agé dessi anaran, “Ig Yerusalem tehet ge, Danah Begari né profet yeg qe kunum mou bérig. ³² Danah ag Danah Bega uksi Yuda danahas kawa la qe ewlagwa melag. Meweg ag geisah nug siwegkolessi uksiuksi qoressi sunu qessi qisleksi am qeweg mousdig. ³³ Gam deř kiamba ge nug buliko asdig,” eko anan. ³⁴ Nug Bégur ag né qe kunum dueg, gam olag ospinah mouran. Né digu lugman, géri ag nug keř eko marian ge sam sillah dueg.

Yesus Danah Ameg Garwak Ole Sew Kena Man

35 Yesus Yeriko wandigri wanewew, danah os ameg gaŕu ole ih dougwa ninapiŕko delle nuqran. 36 S n nug danahas ameg naŕi duksi erdeksi ateppeg uttulag doko koŕman, "Areg s ?" 37 Danah os anoreg, "Yesus Nasaretrer qe doko wane,"  ksi anoreg. 38 Anweg ge, nug uruko anan, "Yesus, Dewit fuŕuh, na dasil ot dow pe k hniŕ!" eko anan. 39 Danah anqeksi waneg qe gaŕa moreksi, "Na torka da,"  ksi anoreg. Gam nug qalko urwan, "Dewit fuŕuh, na dasil ot duar!" eko anan. 40 Yesus f g yako delle nuqak danah qe omalko nugrowa duakri anan. Unaka dow Yesus koŕmoran. 41 "Na da keŕ s rildi ot nie?" eko anan. Anew danah ameg gaŕu ge anan, "Naŕinah, da amindil ol nie," eko anan. 42 Anew Yesus anoran, "Na amin. Na ot meŕe mak qewa Tiwur sew kena mam." 43 Usihri nug ameg koptew ole Tiwur binag melle Yesus dimlamdan. S n danah kunum qe peksi ge, ag ole Tiwur binag meg.

19

Sakias Takis Wak Danah

1 Yesus Yeriko taun owa noko ih dimlamurko atan. 2 Danah os w nih Sakias nug qewa dian. Nug takis wak danah qe dilag kuri am nug k hu ole. 3 Nug Yesus ge oun qe perigrinah san gam olele kawa. Keŕdi nug danah kutuk am danah kuŕum am qataorak. 4 G ri nug anuqko guko atko guŕaw ker naŕi os teko Yesus qere wanew perigri qewa ameg meko dian. 5 S n Yesus awen qewa wanko annew tew peko ge anoran, "Sakias, na ofeŕ ne. Keŕdi da gei ole na loutwa daril." 6 G ri Sakias usihri neko gamag asakwa Yesus gamnurelle omlew lougwa ates. 7 Danahas kunum qere peksi

Yesusri n  n  marieg, "Nug aregri hipunin danah enenah lougwa  o at ,"  ksi aneg. 8 Louw ge Sakias asko Naŕinahri anan, "Naŕinah, na n  ene doka. Da keke dasil kunum gamagwa watiko leis ge o duak danah mardil. Am da oun os darmakwa qar g kaŕdin ge waŕos patak noh meko murdil," eko anan. 9 Yesus anoran, "Gei ole Tiwur na f narwa ole dilag hipunin noh kusq . Am danah ene ole Abraham fuŕuh. 10 Qeri Danah Bega nug oun os gattu owa de qe mariko peko buliko ow Tiwurdi uhŕibak  rurdigri uriy n," eko anan.

Kekuak Nir 10 Dilag N  Tonak

11 Yesus n  qe mariew dueppeg, nug Yerusalem mourak nuan am danahas ag Tiwurdi Kingdom usihri wanwa b rig  ksi dahmeg. G ri Yesus n  tonak ene anaran. 12 "Danah binlag ole qe fuŕuh os atu una oswa atew king dari-gri wittak morew urigri atan. 13 G ri nug kekuak nir nusgur 10 qere anew noweg usih usih qar g gol mina* awen awen qere maran. Marko ge anan, 'Qar g ene uksi kekuak moreppeg da buliko uriril,' eko anaran. 14 Gam danah nusgur os danah naŕi qeri olag pi nian ole qe danah la os nug dimugri meŕarweg danah naŕi qe atanwa ateksi, 'Ig danah ene king isanig diakri onig pi nie,' ellagri ateg. 15 Gam nug king beko buliko kawagwa uriy n. Uriko ge, kekuak nir nusgur 10 qere qar g maran ole qe dilag n  man. 'Ag qar gwa kekuak areg seg?' qe dorigri koŕmaran. 16 Kekuak nir anuqko duan qe anan. 'Danah naŕi, qar g na miŕen qe kekuak murwi qar g gol mina 10 la ole qaŕewa ban,' eko anoran. 17 Anew king nusig doko ge anan, 'Kena sen. Na kekuak nir dasil kena.

* 19:13 19:13 Mina usih ge kalam kiam kekuakri noh olele.

Na qarég nagurwa kekuak kena sen, géri gei na taun ten qere gumardipri anina.’¹⁸ Am arít patak qe doko anan, ‘King dasil, qarég nasip kekuak murwi qarég gol mina tanig ole la qaréwa ban,’ eko anan.¹⁹ Anew ge king nusig anoran, ‘Na taun tanig ole gumardip.’²⁰ Am kekuak nir kiam patak qe doko anan, ‘King dasil, qarég gol mina usih nasip na mifen ge enan. Da lamén qaríwa saputko pesorko méwi dian.’²¹ Na danah gáran ole. Ke’ os na pi kehna qe na funa, am danah la os keke mési qe ole na ona. Qeri da na farirko qere sein.’²² King nusig qe koréwa oko anoran, ‘Na kekuak nir nou am né nasip dimlamdak ge séwi noh urip. Na duen ge da danah gáral ole am danah la os keke mési qe da wina am danah la kéhsi qe ole da fuina.’²³ Na kerdi qarég dasil buliko uríko qaréwa noh la ole olem, gam na qarég lougwa pi men?’ eko anan.²⁴ Anko ge, danah aseksi deg qe dilag anan, ‘Qarég nusig kardeksi danah qarég gol mina 10 la qaréwa sew ban ole qe mores.’²⁵ ‘King nari, nug qarég gol mina 10 ge iril wé,’ éksi aneg.²⁶ Anweg anaran, ‘Da anarina, oun os ke’ os pesorko gumdig ge, fou la ole urig. Gam oun os ke’ nagur ole am nouni gumdig ge, da nug qe kafurdil.’²⁷ Gam kege’ dasil da king asilag diakri mineg ole qe diareksi duksi da nolwa aqares,’” eko Yesus anaran.

Yesus Yerusalem Nuan

²⁸ Yesus qere anko ge, Yerusalem attigri anuqko atan.²⁹ Yesus kaw arít Betfage am Betani ole Oliw qouku éksi ansi qe sékuwa dasa qe mouratak wanan. Wanko ge, béku’ arít me’ atew anqeksa ateppees anatan.³⁰ “A kaw uniwa ateksa waneksa ge, donki os fou kena mak

ounté os pi teko weiyen ole qe qagak dewew pelas. Peksa ge, kusqeksa oksa uríyes. ³¹ Oun os a kerdi donki kusuqsa eko ko’ mew ge anores. ‘Narínah kekuak murdigri kusuqru,’ eksa anores,” eko anan. ³² Béku’ arít qe ateksa ge nug anan qe sillah ole pes. ³³ A donki fou kena mak qe kusqeppees donki memeg ko’ mateg. “A kerdi donki kusuqsa?” éksi aneg. ³⁴ A ko’ mak noh meksa anes. “Narínah kekuak murdigri,” eksa anares. ³⁵ Géri donki oksa Yesus dowá uríyeksa ge, siot asilas qaréwari qe uréksa donki qaréwa duqessa, Yesus eweg orawes teko donki karan dian. ³⁶ Yesus donkiwa atewew, danahas siot asilag qaréwari uréksi ihwa duqareppeg nug qaréwa atan. ³⁷ Sén nug Oliw qouku minko nuakri ih gewa dowew ge, nug bégur dimlamdeg qe kunum ole olag gamag asakwa diguméksi qaleksi Tiwur binag sumeg. Kerdi ag Yesus mirakel sew piareg. ³⁸ “King Tiwur Narínah wénihwa uríye ge nug wittak more. Saw kappa Tiwur ole maror nirig am Tiwur karannah nug binag karan sumnig.” ³⁹ Am Farisi la os danah ameg nari qe owa deg qe Yesusri aneg, “Duak marak danah, na begpar ga’ra marwe mines,” éksi aneg. ⁴⁰ Yesus noh meko anaran, “Da anarina. Danah ene torweg ge, qar ko’rag koptew urwessi binag sumlag,” eko anan.

Yesus Yerusalemri Kuanan

⁴¹ Sén Yesus atko unaka wanko Yerusalem taun nari qe peko ge, o dow kuanelle anan. ⁴² “Yerusalem danahas, ag olag duaknah! Ag Tiwurdi maror owa kena diakri qe dollewri kenanah. Gam ag amlag garwé dasi. ⁴³ Sén qe uríyew ge, kege’ asilag fanlag uríyeksi kar asilag taliloreksi wan qagulweg tew, o mareksi dalag. ⁴⁴ Am taun asilag logréksi ag aqeksi keke

kunum ole seweg nou mérig. Am qar usih os minweg lia qaréwa ospi dew. Kerdi ag sén Tiwur agrowa uríyan ge, peksi olag pi mouran,” elle kuanan.

Yesus Tiwur Lougwa Duak Maran

⁴⁵ Yesus Yerusalem noko Tiwur Lougri kar owa atko qewa danah keke irardi méksi deppeg nug pi- arko ge digumeko lamaran. ⁴⁶ Nug ere anelle lamaran, “Tiwurdi Né yak ere ane, ‘Da loul ge unuqorakri lo.’ Gam ag seweg yawsen danah dilag lariak awen sillah beko se,” eko anan. ⁴⁷ Nug sansan Tiwur Lougri kar owa danahas doulag patté. Gam pris dilag anqak danah, Mosesri Ró duak danah am Yuda dilag kuri danah ole ag Yesus qeweg mousdigri ih mariréw. ⁴⁸ Gam ag ih ospi peg, kerdi danahas kunum né nusig dolagri seréw.

20

Kuri Danah Yesus Kuakri Wittak Sew Pelagri Kormoreg

¹ De’ os Yesus Tiwur Lougri kar owa danahas duak marelle am Né Kena kuswewew, pris dilag anqak danah, Mosesri Ró duak danah am Yuda dilag kuri danah ole duksi anoreg. ² “Na anwe ig duet. Na kuakri wittak arwari oka Tiwur Lougwa kuak ene sena? Na oun kuakri wittak ge mirew sena?” ³ Nug ko’lagwa oko anan, “Da ole ag ko’rmaidil. ⁴ Ag anweg due, Yon le luaran ge kuakri wittak Tiwur dowari te, kawa danah dowari te oko san?” ⁵ Ag agégé marieksi aneg, “Saw kappari ektu annig ge nug ko’rmigdig. ‘Ag kerdi nusig kuak qeri olag mére pi man?’ ⁶ Am ig Yonri kuakri wittak danah agopri éktu annig ge danahas uni kunum qar uksi kuiglag, kerdi ag olag mére me ge Yon ge Tiwurdi profet.” ⁷ Géri ag

Yesusri aneg, “Arewari té ge ig pi dotu.” ⁸ Qeri Yesus anan, “Da ole oun kuakri wittak miréw kekuina ge ospi anwi doweg,” eko anan.

Wain Dar Gumak Danah Nou Dilag Né Tonak

⁹ Am Yesus né tonak ene danahas amlagwa anan. “Sén danah os wain dar nafi kehko am nug danah os wain dar nusig gumeksi morlagri mine marelle ge, nug atu una oswa atko wagam dari-gri atan. ¹⁰ Wain mou wegak sénwa nug sew kekuak nir nusig os wain dar gumak danah ge agop wain mou os morlagri atan. Gam wain dar gumak danah ge mou’weksi anweg eweg sam buliko atan. ¹¹ Nug kekuak nir la anew atan, gam ge ole mou’weksi nouni sorweg eweg sam am buliko atan. ¹² Wain dar memeg kiam patak kekuak nir os mew atew ge, mou’weksi karag moreksi keigorweg dar dimdim atan. ¹³ Géri wain dar memeg anan. ‘Da aregnah séril? Da nir dasil ol mouse ole ge attig ge, né nusig dueksi dimlamurlag té,’ elle anew wain dar gumak danah ge agop atan. ¹⁴ Gam sén wain dar gumak danah dar memeg nag ge peksi ge, ag agégé né qageksi aneg. ‘Danah ene wain dar memeg mérig. Doweg qéhut mousew dar ge isanig darig,’ éksi aneg. ¹⁵ Géri keigoreksi ber’weksi dar dimdim ateksi qeweg mousan. Qeri wain dar memeg ge aregnah sardig? ¹⁶ Nug uríko wain dar gumak danah ge sew aqarweg mousweg am dar oko danah la gumlagri mardig,” eko anan. Sén danahas né tonak ge dueksi ge aneg, “Qere aw bew.” ¹⁷ Yesus kittarko delle ko’rman, “Qere ge Né yak ene digu areg? ‘Lo fuak danah wandor mineksi gerdeg ole ge lo memeg wandor ge oko gamagwa lagew delle lo mawe.’

18 Danah wandor qe qařewa to-
lalag ole ge, kunum ole kaduřlag.
Am wandor qe oun os qařewa
tolarig ge, maduřew nounu nérig.
Qe sillah, oun os nug da dimiřdig
ge nug paral mérig,” eko anan.
19 Mosesri Ŕo duak danah am pris
dilag anqak danah ole ag dueg
ge, né tonak qe asilag nou qe
uřameko marian. Géri sén qewa
ih ag ih os peksi ořalagri seg, gam
ag danahas dilag fařeg.

*Yuda Danahas Sisari Takis
Melag Te?*

20 Mosesri Ŕo duak danah am
pris dilag anqak danah ole ag
Yesus kařéordéw. Géri ag danah
os darmak danah anweg danah
mangu sillah ateksi yawssen am-
neksi Yesus pelag ateg. Ag nug
keř os nouni anew qewa ořweksi
wan atu dilag kuri danah kuakri
wittak morak am gagragsak ole
qe ewegwa melagri ateg. 21 Géri
yawssen amnak danah qe Yesus
kořmoreg. “Duak marak danah,
ig dotu ge na né mangu ih marina,
ismigna am na danah kunum
nouni ospi sarna. Am na né meře
Tiwur danahas areg dalagri o nie
qe ismarna. 22 Na an, ig sétu
sillah Sisari takis tourńig kena
te, kawa te?” 23 Yesus darmak
dahmak asilag qe doko anaran.
24 “Qarég silwa os seweg pewi.
Oun dorogrog am wénih ole qewa
de?” eko kořmaran. 25 Ag kořewa
uksi aneg. “Sisa dorogrog am
wénih ole.” Nug anaran, “Aria!
Sisari ge Sisa mores, am Tiwurdi
ge Tiwur mores,” eko anan. 26 Ag
Yesus né nouni os anew dolagri
dahmeg, gam sén nug danahas ole
dessi nug né nouni usih ospi anew
dueg. Ag nug né noh man, qeri
dorlag new ole toreksi deg.

*Mousko Am Dimba Diakri
Kořmak*

27 Sadusi* os danah mouseksi
am bulieksi pi asweg éksi andéw
ole qe uřiyeksi Yesus kořmoreg.
28 “Duak marak danah, Moses Ŕo
isanig yan ge danah os mousko as
nir kawa mundew ge, kamag as
qe oko awagri nir os memandig.
29 Sén os awag kamag 7 qere
daréw, géri awlag digam as os
wan, gam as qe nir kawa dewew
gému qe mousan. 30 Mousew
am dimugwari qe wan, am qe
ole as nir kawa dewew mousan.
31 Qe sillah kiam patak am atko 7
patak qe kunum ole as qe og, gam
nir kawa dewew mouseg. 32 Qe
dimba as qe ole mousan. 33 Am
buliko sirak sénwa as qe awag
kamag 7 qe kunum og, géri as qe
oun waw darig?” éksi kořmoreg.
34 Yesus né qe noh meko anan,
“Danahas wan ewa dasi ag nug
usi. 35 Gam Tiwur sew danahas
mousak sireksi foumak olag ole
qe nug wak ospi niew. 36 Ag
saw doup sillah dalag, géri ag
ospi mousweg. Ag Tiwurdi nir
dalag, keřdi ag Tiwur sew sireksi
foumak olag. 37 Am Moses ole ker
nagur os ařakri né yakwa ismige
ge, mousak bulieksi sirlag. Qeri
nug Nařinah Tiwurdi ere anan,
‘Abrahamri Tiwur, Aisakri Tiwur
am Yakopri Tiwur ole,’ eko anan.
38 Géri ig Mosesri né qewa dotu
ge Abraham, Aisak am Yakop ge
Tiwur ole fou dasi. Keřdi mousak
danah Tiwur binag pi mési, gam
danah fou dasi qe Tiwur binag
mési. Keřdi nug nohwa danahas
nusgur ge kunum fou dasi,” eko
anan. 39 Mosesri Ŕo duak danah
os Yesusri aneg, “Duak marak
danah, na né noh mangu anam.”
40 Qeri ounté kořmak fou la ole
ospi san.

Yesus Dewit Fuřuhri Kořman

* 20:27 20:27 Sadusi pris ameg os danah mouseksi pi bulieksi assi qeri olag meře me.

41 Am Yesus kuri danah qe kořmaran, “Aregri ere ansi Kristus† ge Dewit fuřuh? 42 King Dewitri Kasi Yakwa ere ane, ‘Nařinah Tiwur, Nařinah dasil Kristusri anan: Na ewel kenariwa deppe, 43 da kegeř nasip taparko séwi nuksi na kallonwa dalag,’ eko ane. 44 Dewit nug ‘Nařinah,’ eko anore, gam areg nug Dewit fuřuh darig?” eko kořmaran.

Yuda Kuri Danah Dilag Kowol Nou

45 Danahas kunum duepppeg Yesus bégur dilag anan. 46 “Ag Mosesri Ro duak danah dilag dahmes. Ag feřlag bala welah kena méksi maket awenwa weiyeppeg danahas piareksi felqarlagri sési. Am Yuda dilag binag mak lowa danah wenlag ole dasiwa dalagri sési. Am mallen sénwa danah wenlag ole dilag diak awenwa dalagri sési. 47 Ag as qehřas dilag keke kunum darmak ihwa memeg mési am qe tonlagri dessi unuqorak welah welah sési. Danah qere ge sak nou noh asilag qe nouninah mardig,” eko anan.

21

As Qehřas Ofa Man

1 Yesus Tiwur Lougwa delle danah kehlag ole Tiwurdi ofa mak awenwa qarég meppeg piaran. 2 Am nug as qehřas os o duak ole qarég 10 toia ařit ih ole mewew pian. 3 Peko ge nug anan. “Da meřenah anarina. As qehřas uni o duak, gam nug qarég ofa mé ge, danahas uni kunum érarak naři mé. 4 Danahas la kunum ge qarég asilag naři dewew am qarég siřin ge méw, gam as uni ge o duak as gam nug keř os oko lellori sillah ge qarég qe kunum ole mé,” eko anařan.

Tiwur Loug Qiko Néřig

5 Sén qewa nug bégur os aneg. “Tiwur Loug ene qar kena kenawa fueg am Tiwurdi ofa meg qewa bala moreksi koutoreg,” éksi aneg. Gam Yesus anan. 6 “Sén os uřiyew ge, keke kunum pesi qe qiko neko kaddurđig am qar usih os lia qařewa ospi dewew peweg,” eko anan.

Yesus Kug Uřirig Qeri Anan

7 Ag kořmored, “Duak marak danah, na anam keke qe ganehnah bérig? Ig keřnah pektu am donig ge qe bérigri sén unaka de?” 8 Yesus anan, “Geisah ag darmarwegra, dahméksi koutores. Geisah danah kuřum da wénilwa béksi ‘Da Kristus,’ am ‘Geiri kuagřak sén uřiko malwé,’ éksi anlag. Gam danah qe aw dimlamarweg. 9 Sén ag wan atu oswa fan neihwah am karak neihwah dueksi ge, ag aw fařweg. Keke qe tatam belag, gam malwakri sén qe ofer ospi bew.” 10 Yesus buliko anařan, “Wan atu os asweg wan atu la ole fan selag am king os asew king la ole fan selas. 11 Mim naři atu kuřumba néřig am atu kuřum laké naři niewew kousarlag am waře nouni ole belag. Am saw karan fařakri keke am kowol wagé wagé ole béksi atlag. 12 Gam keke qe kunum pi bak dewew, ag da dimlamiflag qeri ořwareksi beřwareksi Yuda dilag binag mak lo owa nolag am gurak maressi nouni saressi kalabuswa yanarlag. Am ag dieksi king am wan atu dilag kuri danah agop ole wanlag. 13 Sén qewa ag dasil olag meře me qe ag anarlagri sén darig. 14 Qeri ag olag meře mak gagrag diar. Ag keř éksi anarlagri tatam aw dahmeweg. 15 Da ag kegeř asilgar dilag né noh melagri né am dahmak kena ole mardil. Qeri ag kegeř asilgar né asilag ospi qeweg new am ospi kotarweg.

† 20:41 20:41 Kristus ge Mesaia. Tiwur danahas nusgur buliko diardigri danah toqoran.

16 Sén qewa ag da dimlamiřlag, qeri ag memelgar anilgar am awalgar kamalgar am leilgar ole keger marlag. Am geisah ag la os ge aqarweg mouslag. 17 Ag da dimlamiřlag, qeri danahas kuřum asilag olag nou mew keger marlag. 18 Gam ag kurlag uřug usihnah ospi lariwra, qeri ag aw farweg. 19 Ag da dahuhul dalag ge, ag foumak sansan diakri olag.”

Yerusalem Taun Logarđig

20 “Sén ag fan danah uřiyeksi Yerusalem o morweg peksi ge, ag dolag ge wagam kawa nug logarřlag. 21 Sén qewa danahas Yuda dalag ge, kum oleksi qoukuwa ates. Am danahas taun qewa dalag ge, taun qe mineksi kum ates. Am areg os taun dimdim dalag ge, aw bulieksi owa noweg. 22 Keřdi sén qe Tiwur Yerusalem danahas kug asilag qe noh mardig am Tiwurdi Né yakwana qe kunum ole mou béřig. 23 Sén qewa ge, as olag ole am nir yu ole ge kug narinah pelag, keřdi ag kum atakri olele kawa. Keřdi kug narinah atu qewa béřig am Tiwurdi uhřibak danahas qewari dilag qe noh meko mardig. 24 Danahas os ge fan barinwa kotřarřlag. Am os ge ofwareksi diareksi wan atu la kunumba kalabuswa atlag. Am Yerusalem taun qe Yuda danah kawa danah la qe tutuweg atew Tiwur sén moran qewa pattig,” eko anan.

Danah Bega Buliko Uřirig

25 Yesus buliko anaran. “Sén qewa kowol os kamba kalamba am sořwéwa ole beweg piarřlag. Wanwa danahas kunum iw kořkoř naři qelle urweg néřig qe dueksi olag fařew am dahmak kařwarew kité ospi seweg. 26 Danahas kuřum wan ewa keř béřig qe peksi olag fařew amlag

tařirig. Keřdi saw karan keke gagragsak naři ole qe kunum saharřlag. 27 Sén qe ge Danah Bega da lombigwa gagragsak naři ole am kamsahlak naři gun olewa uřiyepi kunum peřřlag. 28 Sén keke qe kunum digumeko bewew ge, ag gagrag méksi aminweg karan tew des, keřdi Tiwur ag gattu owari buliko diarko kusřak mardigri sén unaka durig,” eko anan.

Guřaw Kerdi Né Tonak

29 Yesus né tonak ene béğur anaran. “Guřaw ker am ker la ole piases. 30 Sén ker qere lounweg ge, ag agégé dolag qe kem sén durig malwe. 31 Qe sillah, da aném qere bew peksi ge ag dues. Wagam kawa ge Tiwurdi Kingdom béřig*. 32 Da meřenah anarina. Geiri danahas pi mousak deppeg keke aném qe kunum béřig. 33 Wan saw ole ge qerořđig, gam né dasil ge nagurnah ospi kawa mew.”

Yesus Buliko Uřirigri Dahmessi Des

34 “Dahmessi des! Ag ke lelle am le leko gar řakri aw dahmeweg. Ag wan ewa kena diakri naři aw dahmeweg. Ag kowol qere séssi dalag ge, da agrowa pi dueppag uřiril. Keřdi dasil uřiyak deř qe pelem sillah darig. 35 Geisah wanwari danahas kunum kug qewa dessi pelag. 36 Dahméksi koutoressi am bulibuli Tiwurdi unuřorweg gagrag qarar. Qewa ge, kug belag qe erđessi deppeg Danah Bega da uřiwi nolwa sirlag,” eko anaran. 37 Yesus kemunwa deř dorog Tiwur Lougwa duak mardé. Am tuřan ge nug atko Oliw qoukuwa daré. 38 Danahas kunum furwanah Tiwur Lougwa Yesus duak mardigri řaguldéw.

* 21:31 21:31 Tiwur danahas nusgur dilag king delle gumardig.

22

Yudas Yesus Keger Ewlagwa Mérigri Ih Marian

¹ Yuda dilag mallen beret yis kawa oleri wénih Nanúrak Deí* qe unaka duan. ² Am pris dilag anqak danah am Mosesri Ró duak danah ole ag danahas fafareksi larieksi Yesus orweksi qeweg mousdigri ih marieg. ³ Sén qewa ge, nou memeg Satan, Yesus Béгур 12 qe olagwa usih os wénih Yudas Iskariotrer qe owa nuan. ⁴ Now ge Yudas atew pris dilag anqak danah am Tiwur Loug gumakri felag tutu dilag kuri danah ole Yesus areg ag ewlagwa mérigri né marieg. ⁵ Qeri ag olag gamag asew Yudas qarégwa daren morlagri né fag qeg. ⁶ Yudas ag aneg qeri o niew digumeko ih are os peko, danahas pi dueppeg Yesus ag ewlagwa mérigri ih marian.

Yesus Békué Nanúrak Deédi Ke Bawres

⁷ Yuda dilag mallen beret yis kawa oleri qe duan. Deí qewa ge Yuda danahas Nanúrak Deédi sipsip yu aqeksi mallen qewa lélagri sén. ⁸ Yesus Pita Yon ole meátko anatan. “A ateksa Nanúrak Deédi ke lakri isanig bawres,” eko anan. ⁹ Gam a kořmores, “Nařinah, i ke arewa bawarnit?” ¹⁰ Yesus anatan, “A Yerusalem taunwa noksa ge danah os le witko mouko wanew pelas. Peksa ge, dimlamurwes lo nug nurig ole qewa nos. ¹¹ Sén a lo qewa noksa ge, lo memeg ere kořmores. ‘Duak marak danah nasip ere ané: Da Beglar 12 qe ole kurug arewa Nanúrak Deédi ke lenig?’ eksi anes. ¹² Lo memeg ge lo karan awen naři os tewol ole keke kunum bawrak ismattig.

Qewa ge, ig Nanúrak Deédi ke lenigri bawres,” eko anatan. ¹³ A ateksa ge, Yesus anan qe sillah keke kunum pes. Peksa ge, Nanúrak Deédi ke qewa bawres.

Nařinahri Ke

¹⁴ Sén Nanúrak Deédi ke qe lakri dow ge, Yesus aposel† nusgur 12 qe ole lo qe karan ke bawres awen qewa tewol o moreksi ninaqireksi deg. ¹⁵ Dessi ge, nug anan. “Da ol naři nie ge ag ole Nanúrak Deédi ke ene léktu tatam am da gurak oko mousdil. ¹⁶ Da anarina. Da Nanúrak Deédi ke fou la ospi léwin atew ole mallen ene digu ambo meko Tiwurdi Kingdomwa bérig,” eko anan. ¹⁷ Anko malako ge, Yesus wain kapwa qériak oko, Tiwurdi kena sam elle unuqorko Béгур dilag anan. “Ene uksi arié les. ¹⁸ Da anarina. Gei digumak da buliko wain ospi léwin atew sén uřiyew Tiwur wan eneri King bérig,” eko anan. ¹⁹ Am Yesus beret os oko, Tiwurdi kena sam elle unuqorko temew nounu new marko anan. “Ene ge da féřul. Da asilag seko mardil. Ag ere sesissi da dahmires,” eko anan. ²⁰ Ke léksi malweksi ge, Yesus kap wain ole os oko ge anaran. “Wain kap owa ene da karal. Qewa Tiwur titwanak fou danahas dilag sérig. Da karal qe asilag seko gogorđig. ²¹ Gam ag peksi! Danah da keger ewlagwa meirdig ole qe da ole tewol usihwa arié ke leřu. ²² Danah Bega ge Tiwur ih man qewa mousdig. Gam danah oun nug keger ewlagwa mérig ole qe ge nug kug os perig,” eko anan. ²³ Sén Béгур ag né qe dueksi ge, ag agégé ounnah qere sérig essi kořmeweg wane meweg duan.

Ag Olagwa Oun Naři Darig

* 22:1 22:1 Nanúrak Deí ge Yuda dilag mallen os. Sén Yuda danahas Isip darew qe, mousak nir danah anqakri nanřaran qe dahmorakri sén. † 22:14 22:14 Danah os Yesus nugégé toqarko anew kekuak nusig séksi ateg ole qe. Aposel ge Yesusri meř danah.

²⁴ Yesus Bégur ag agégé oun asilag nañi qeri néwa ih kareg. ²⁵ Karweg ge, Yesus anaran. “King wan eneri ge gagragsak asilagwa danahas gumaressi bilagwa qesi. Am wan ewa danah gagragsak ole qe ag danahas kehmarak danah éksi anarlagri ferlag mési. ²⁶ Gam ag ge qere aw seweg. Oun os asilag nañi de ge, nug danah sam sillah ag kallolagwa diar. Am danah oun ag gumardig ole ge nug asilag kekuak nir sillah diar. ²⁷ Qeri da koñmarina. Oun ge danah nañi? Danah tewolwa sam dewew ke bawreksi morweg le ole qe te? Kawa, danah ke bawre ole qe te? Ag dosi ge danah tewolwa de qe ge danah nañi. Gam da ge enan. Ag olagwa danah ke bawarko mare ole qe sillah deina. ²⁸ Ag da ole kug dasil kunumba datu. ²⁹ Géri Mem da king delle danahas gumardilri kekuakri gagragsak miñan. Qe sillah ag ole danahas gumarlagri kekuakri gagragsak marina. ³⁰ Qeri Kingdom dasil owa ag ole tewol dasilwa arié dettu ke am le ole léksi am kingri sia awen awenwa dessi Israel ater 12 qe gumarlag,” eko anan.

Yesus Pita Nug Dimurdig Qeri Anan

³¹ Yesus Saimonri anan. “Saimon, Saimon, na doka. Reis ulaswa gogreppeg kéwsi am kar ole yalew ate qe sillah Satan o meñe mak asilag qeperigri koñman. ³² Gam Saimon, da na ot meñe mak pi tolwewri unuqurin. Géri sén na ot buliew dagnewa bulika doka ge, kuak usih leipar olag meñe mak gagrag qor,” eko anan. ³³ Anew, Pita anoran. “Nañinah, da na dimlamirwi ole arié kalabuswa atnit am mousniri ole bawrem deina.” ³⁴ Yesus koñewa oko anan, “Pita, da anirina. Na keñew furwa maru pi

gelak, na kiam patak da pi duiñna eka andip,” eko anoran.

Yesus Bégur Gagrag Dalag Anan

³⁵ Qe dimba Yesus Bégur dilag anan. “Sén tatam da kuak marwi ateg ge, ag qarég yanakri sogot, baram, am félag gaña aw oweg eko anin. Sén qewa ag kitéri os qagreg te?” “Kawa,” éksi aneg. ³⁶ Yesus anaran, “Gam gei ge oun os sogotwa qarég ole ge war am baram ole os. Am oun os fan barin kawa ole ge siot qaréwari qe qarégri mew oweg am fan barin os daren mar. ³⁷ Tiwurdi Né yakwa ane, ‘Danahas nug ró tapewnak danah sillah peg.’ Am Né yakwa dasil ane qe olele murdig am dasil Né yakwa ane qe sén mou bérigri qe unaka do,” eko anan. ³⁸ Anew nug Bégur aneg, “Nañinah, fan barin arit enan,” éksi anweg am Yesus anan. “Malwew, qe olele,” eko anan.

Yesus Oliw Qoukuwa Unuqoran

³⁹ Yesus sansan seré sillah Oliw goukuwa atewew Bégur ole dimlamurweg arié ateg. ⁴⁰ Ateksi ge, Bégur anaran. “Ag qepiakwa pi tolaweg qeri Tiwurdi unuqores,” eko anan. ⁴¹ Nug Bégur minarko nagur lawar qar tourweg atko qe, qe sillah wanko ge gatewa yako delle unuqoran. ⁴² Unuqorko anan, “Mem, na ot niew pe, na kug nañinah wirdig ene moutina miñ. Gam da ol mourak aw dimlamurwen, na ot mourak qe dimlamur,” eko anan. ⁴³ Anew ge, saw kappari Tiwurdi doup os gumurko doko nug gagrag qoran. ⁴⁴ Yesus kug nañinah doko gagrag unuqoran. Unuqorewew ge séri qeko karag sillah katré katré wanwa nan. ⁴⁵ Nug unuqorak malako asko ge, buliko Bégur agop wanani. Wanko ge, ag olag kug qew usnieppeg piaran.

46 Piarko ge anan, “Ag keŕdi us-nisi? Aseksi qepiak uriyew to-lawegra unuqores,” eko anan.

Yesus Orweg

47 Yesus né mariewew, danah ameg nafi teg. Yesus Béгур qe olagwa usih os wénih Yudas qe omlarew teg. Nug Yuda koulagwa Yesus kiss murdigri unaka wanan. 48 Wanew Yesus anoran, “Yudas, na Danah Bega da keger ewlagwa méiridpri te kiss miridip sena?” 49 Sén Yesus Béгур ag kug bérig sew peksi ge, kořmoreg. “Nařinah, ig fan barinwa fan sénig te?” 50 Béгур qe usih os fan barinwa pris dilag kuri danahri kekuak nir doug kenari qe seiyan. 51 Yesus qere peko ge anan, “Aw! Malwam genan,” elle doug oko meko lamsiew buliko duřduan. 52 Yesus pris dilag anqak danah, Tiwur Lougri felag tutu am Yuda dilag kuri danah ole nug oralagri uriyeg qe dilag anan. “Ag tapewnak danah te oralagri fan barin am ker qetak ole kahweksi uriyew? 53 Da ag ole deř dorog Tiwur Lougwa daram, gam ag da ospi urwileg. Am gei ge asilag sén gatturi gagragsak ag gumare,” eko anaran.

Pita Yesus Pi Duina Eko Anan

54 Anko malwew ge, Yesus orweksi omleksi pris dilag kuri danah qe lougwa ateg. Ateppeg ge, Pita nug dimqeko nagur lawar qere dimlamaran. 55 Danah os kar owa lo ihřamba kew yaleksi urğessi deppeg, Pita ole wanew qere kew o moreksi deg. 56 Lo qewari kekuak as os Pita kew urğelle dewew peko kitturko de de ge anan. “Danah ene ole Yesus dimlamdak weiréw,” eko anan. 57 Gam Pita anan, “Kawa, da danah qe pi duina,” eko anan. 58 Am wagam kawa danah os

peko anan, “Na os ole enan,” eko anan. Anew Pita anan, “Kawa, da ole kawa.” 59 Kem ameg usih keke qere atew ge, danah os gagrag anan. “Meřenah! Danah ene Galilirer, qeri nug Yesus ole weiréw,” eko anan. 60 Anew Pita noh meko anan, “Na kitéri té marina ge da pi duina,” eko anewew ole maru gelan. 61 Sén qewa ole Nařinah buliko mangu ole Pita amegwa amnan. Pew ge Pita Nařinah ere anoran qe dahmoran. “Na keřew furwa maru pi gelak, na kiam patak na da pi duirna eka andip,” eko anan qe dahmoran. 62 Pita dimdim wanko delle ge, owa qetko atew qalko kuanan.

Yesus Siwegkolessi Uksiuksi Qoressi Am Koreg

63 Tiwur Lougri felag tutu Yesus gumessi deg qe nug diguméksi siwegkolessi am koreg. 64 Ag Yesus lamenwa ameg qageksi koreksi am kořmoreg. “Na profet daka pe, anwe duet. Oun na kuiré?” 65 Ag né nouni kowol kowol Yesusri aneg.

Yudari Kuri Danah Dilag Qaglakwa Yesus Kořmoreg

66 Kuagréw ge Yuda dilag kuri danah, pris dilag anqak danah am Mosesri Řo duak danah ole qag-ulweg ge, Yesus omleksi qaglak qewa waneg. 67 Kuri danah wagé wagé qe Yesus kořmoreg. “Na anwe duet. Na Kristus† qenan te?” éksi aneg. Yesus kořlagwa oko anan, “Da anwi ge, ag dasil olag meře ospi mew. 68 Am da os ag kořmardil ge, ag né qe noh ospi meweg. 69 Gam gei digumeko atak Danah Bega Da Tiwur gagragsak ole eweg kenariwa daril,” eko anan. 70 Anew danah wagé wagé qe kunum bulieksi kořmoreg. “Qenan géri na Tiwur

† 22:67 22:67 Kristus ge Mesaia. Tiwur danahas nusgur buliko diardigri danah toqoran.

Bega te?" éksi anweg, nug anan. "Ag anéw ge da qenan." ⁷¹ Qewa danah wagé wagé aneg, "Ig né gagrag qorakri né la ospi marihut. Ig igégé nou nusig qe nug koéwa duam qe olele," éksi aneg.

23

Yesus Uksi Pailot Dowa Ateg

¹ Yudari kuri danah wagé wagé qe kunum qaglakwari aseksi Yesus omleksi Pailot* dowa ateg. ² Qewa ge nug diguméksi yagoŕ moreksi aneg. "Ig danah ene danahas isangar nouni omlardig sew pet. Am Sisari takis pi tourwegri doulagwa nolle am ole nug ane, 'Da Kristus am da king,' eko anew orwektu uktu uriyam," éksi aneg. ³ Géri Pailot Yesus koŕmoran, "Meŕe te na Yuda danah dilag king?" Yesus né noh meko anan, "Na anam qenan." ⁴ Pailot pris dilag anqak danah am danah ameg naŕi ole dilag anan. "Da danah ene piém ge nug kité nouni ospi san." ⁵ Gam ag duessi bulibuli gagrag aneg. "Nug Yudia atu kunumba weiyelle né mariyelle danahas olag ye. Nug Galili tatam diguman am gei ge ewa uriyam se," éksi aneg.

Yesus Uksi Herod Dowa Ateg

⁶ Sén Pailot qere doko ge nug koŕmaran. "Danah ene Galilirer te?" ⁷ Ag koéwa uksi aneg, "Yo, nug Galilirer." Pailot qe doko ge, ag Yesus uksi king Herod dowa ates eko anaran. Keŕdi Herod nug Galili gumdé am sén qewa Herod nug ole Yerusalem dian. ⁸ Sén nug Yesus peko ge, o gamag naŕi asan. Keŕdi nug Yesus neihwah maŕiweg doko sén welah perigri o nian. Am nug Yesus mirakel os sew piardigrinah dahmeré. ⁹ Qeri Herod Yesus koŕkoŕ moran, gam Yesus koéwa ospi

wan. ¹⁰ Pris dilag anqak danah am Mosesri Ro duak danah ole qewa dessi ge, Yesus gagragnah yagoŕ moreg. ¹¹ Qe dimba Herod fan danah nusgur ole Yesus uksiuksi qoressi siwegkolessi kingri bala kena urwurweg now uksi Pailot dowa bulieksi ateg. ¹² Tatam ge Herod am Pailot ole a olas usih pi daré, gam deŕ qewa ih ole a liam pates.

Pailot Yesus Ker Mawanakwa Katullag Anan

¹³ Pailot anew pris dilag anqak danah, danahas gumarak danah am danahas ole qagleg. ¹⁴ Qagulweg nug anaran, "Ag danah ene uksi dagnéwa uriyeksi anéw, 'Nug danahas isangar nouni omlardigri olagwa ye,' éksi anéw. Gam da ag nolagwa koŕmorko piém ge, ag yagoŕ moreksi aneg sillah nug kité nouni ospi san. ¹⁵ Qeri Herod ole qere peko mew buliko ignéwa uriyé. Danah ene anwi qeweg mousdigri sillah kité nouni ospi san piém. ¹⁶ Qeri da anwi siwirwa qisleksi am paŕoweg attig." ¹⁷ (Pailot qere anan, keŕdi sansan Nanŕurak Deŕwa kalabus danah usih os danahas ag nusig olag nie ole qe paŕoweg doko dimdim ate.) ¹⁸ Gam danahas kunum urweksi aneg. "Danah qe qewe mousar! Barabas matulwe do migar!" ¹⁹ Barabas nug sew Yerusalem taun gumak danah Yuda dilag danahas ole karak naŕi seg am nug danah os ole qew mousan. Qeri nug kalabuswa yaneg. ²⁰ Pailot nug Yesus mundew attigri o dian, qeri buliko danahas koŕmaran. ²¹ Gam danahas bulibuli urweksi aneg, "Ker mawanakwa katul! Ker mawanakwa katul!" ²² Pailot kiam patak danahas anaran, "Kitéri? Nug keŕ kugnah san,

* 23:1 23:1 Pailot nug Rom danah am Yudia wan atu qe gumdé.

qeri anwi qeweg mousdig? Danah ene qeweg mousdigri sillah kité nouni ospi san piém. Géri qisleksi am paŕoweg attig,” eko anan. ²³ Gam gagragnah úrweksi Yesus ker mawanakwa katlakri aneksi Pailotri né qeweg nan. ²⁴ Géri Pailot minko ag aneg qe dimlamurko Yesus qeweg mousdigri anan. ²⁵ Yuda aneg sillah, Pailot anew tapewnak danah Barabas nug sew Yerusalem taun gumak danah Yuda dilag danahas ole karak naŕi seg am nug danah os ole qew mousan, qeri kalabus dian qe matlew duan. Am Yuda olag nian sillah, Yesus ge qelagri Rom fan danah ewlagwa man.

Yesus Ker Mawanakwa Katleg

²⁶ Qewari ge ag Yesus uksi taun dimdim ateppeg danah os wénih Saimon Sairinirer qe úriko taun owa nurig sewew órweg. Órweksi keigoreksi ker mawanak sumeksi guqawa meweg mouko Yesus dimlamdan. ²⁷ Danahas ameg naŕi Yesus dimlamdeg. Qe olagwa as os Yesusri kunnessi dimlamareg. ²⁸ Yesus piarko anaran. “Yerusalem as, ag dasil aw kuanweg. Ag agégé asilag am nir nounou asilgar ole dilag kuanes. ²⁹ Keŕdi geisah sén os úriyew danahas anlag, ‘As olagwa nir kawa, as nir pi memnak am as ouma asilag nir ospi lak ole qe ge kena.’ ³⁰ Sén qewa danahas qouku wagé wagé am nounu dilag ole anlag, ‘Ag néksi tonigweg mouset,’ éksi anlag. ³¹ Keŕdi ag da kité nouni ospi séwi am qere sirilag ge, ag ge nouninah sarlag,” eko anan. ³² Sén qewa Rom fan danah tapewnak danah aŕit os Yesus ole aŕié ker mawanakwa katlarlagri diareksi ateg. ³³ Ateksi awen os wénih mousak danah kuri kéwsi éksi ansi qewa ge Yesus ker mawanakwa katleg. Am

tapewnak danah aŕit qe os ge kenariwa katleksi am la os ge nanetiwa katleg. ³⁴ Yesus unuqoriko anan, “O Mem, hipunin asilag kusuq. Keŕdi danah ene duessi pi sési,” eko unuqoran. Danah ameg naŕi amneksi depppeg fan danah ag oun Yesus féru bala qe urigri ker masawa namba yeksi touressi sagoŕweg. ³⁵ Am Yuda dilag kuri danah Yesusri né siwkolessi aneg. “Nug danahas la ge kehnarko kusqaran. Géri gei ge nug meŕenah Kristus Tiwur toqoran dako pe, nug nugégé kusqak urig,” éksi aneg. ³⁶ Fan danah ole Yesusri né siwkolessi unaka waneksi wain qew morlagri seg. ³⁷ Qere séssi aneg, “Na Yuda dilag king daka pe, na nagégé kusqak o,” éksi aneg. ³⁸ Karan kuriwa ker mawanakwa ker masa oswa né os ere yak qe dian. “Ene Yuda Dilag King.” ³⁹ Danah nou os aŕié ker mawanakwa katlareg ole qe Yesus okoko qorko anan. “Na Kristus meŕe Tiwur toqiran dew pe, na nagégé kusqak oka am i ole sewe kusqak of.” ⁴⁰ Gam tapewnak danah os ge lia gaŕa morko anoran, “Na nug mousdig sillah ih usih qewa mousdip, qeri na Tiwur pi te faŕurna? ⁴¹ I ge isanit sak nou qe ih noh mawekru mousnit, gam nug ge kité nouni ospi san,” eko anan. ⁴² Anko ge Yesusri anan, “Yesus na king beka ge, da dahmir.” ⁴³ Yesus koŕewa oko anan, “Da meŕenah anirina. Na gei da ole paradaiswa† danit,” eko anan.

Yesus Mousan

⁴⁴ Kémun kem ameg 12wa keke qere usihri atu qe kunumba gattu tonko niewew atko tueh kem ameg 3wa keke qere malwan. ⁴⁵ Kem ameg órweg gattu tonko niewew, Tiwur Lougwa gun awen owa lamén naŕi eisak nian ge

† 23:43 23:43 Saw kappa awen kenahan. O meŕe mak danah mouseksi ge qewa Yesus ole dasi.

gamagwa karilko neko arít patan.⁴⁶ Géri Yesus gagrag urúko anan, “O Mem, da koullil na ewenwa meina,” elle ole mousan.⁴⁷ Sén Rom fan danah dilag kuri qe kunum peko ge Tiwur binag meko anan, “Meřenah, danah ene mangunah,” eko anan.⁴⁸ Am danahas kunum qe pelagri uríyeg ge peksi olagwa qetko atew bulieksi loulgarwa ateg.⁴⁹ Gam danahas Yesus doréw qe kunum ole am as Galiliri dimlamdeksi uríyeg qe ole lawar assessi dessi keř keř beko atan qe kunum ole peg.

Yesus Uksi Ateksi Matmatwa Meg

⁵⁰ Danah os wénih Yosep nug Yudia atu owa taun Arimatearer am nug ole Yuda dilag kuri danah qaglak qewa delle kug kepardé. Nug danah kena am danah mangu am nug Tiwur king delle danahas nusgur gumardigri sén qe ameg meré.⁵¹ Nug ole Yuda dilag kuri danah qagleksi kug peréw qewa daré. Gam nug kuri danah la aneg am seg qeri o olele ospi dian.⁵² Nug Pailot dowá atko Yesus gařa oko suhumdigri kořmorew, Pailot mundew wan.⁵³ Géri nug Yesus gařa ker mawanakwari oko neko lamén kena sagahwa saputko am oko atko matmat os qar ofe kutlak qewa man. Matmat qe fou am danah gařa la ospi mak ole.⁵⁴ Deř qe Sabatri keke bawrak sén, am Sabat digumerigri sén unaka duan.⁵⁵ As Yesus dimlamurweg Galiliri uríyeg qe Yosep dimlamurweg matmatwa ateg. Ag Yesus gařa areg matmatwa meg qe pelagri ateg.⁵⁶ Peksi ag bulieksi loulagwa ateksi ge, gořen murđig kena ole qe Yesus gařa warwurlagri bawreg. Malaweg ge Sabat diguman. Géri Mosesri Ro dimlamdak ag sik og.

24

Yesus Mousko Am Buliko Asan

¹ Kuhawa furwanah as os gořen murđig kena ole bawreg qe uksi matmatwa ateg.² Ateksi qewa ge, matmat koře megleg qar nafi qe bitlew dougwa wanak dewew peg.³ Peksi ole ag owa nog, gam Nařinah Yesus gařa qewa ospi peg.⁴ Qeri ag katat aqarew aseksi deppeg ge, usihri danah arít bala ampiř sonře sillah mak ole qerlagwa aseksa des.⁵ As qe fareksi nou méksi duk nuksi gatlagwa yeksi wan kittureksi deppeg ge, danah arít qe anes. “Ag danah gei fou de ge keřdi mousak danah dilag awenwa marisi?”⁶ Nug ewa os kawa. Nug mousan gam buliko asan. Nug Galili dessi keř eko anaran qe dahmores.⁷ Nug anan, ‘Danah Bega hipunin danah ewlagwa meweg ker mawanakwa katulweg mousdig, gam deř kiamba buliko asdig,’ eko anan.”⁸ Qewa ge, ag Yesus anan ge bulieksi dahmoreg.⁹⁻¹⁰ As qe Maria Makdalarer, Yoana am Maria Yems anig am as la os ole arié matmatwa ateg. Ag bulieksi matmatwari louw ateksi ge, Béğur 11 qe am danahas la Yesus dimlamurdéw ole qe kunum keř keř ban qe anweg dueg.¹¹ Gam ag as né aneg qe ulas né essi olag meře ospi man.¹² Gam sén Pita asko guko atko duk noko amnew matmat ofe owa now ge, lamén sapteksi meg ole qe ih qewa niewew pian. Peko ge, keř keř ban qeri dahmew te mew newew buliko louw atan.

Danah Arít Emeus Atakri Ihwa Yesus Pes

¹³ Deř qewa ih Yesus dimlamdak danah arít os Emeus kappa atlasri ates. Yerusalemri Emeus atak ge 11 kilomita sillah.¹⁴ A até até keř keř Yerusalem ban qe kunum mariessa ates.¹⁵ A qeri mariessa

sufiessa ateppe ge, Yesus nugégé dow ole arié ateg. ¹⁶ A pes, gam nug oun qe a olas ospi mouran. ¹⁷ Nug kořmatan, “A kitérinah né mariessa atsa?” A olasnah dow kilas nou mew aseksa des. ¹⁸ Danah os ge wénih Kliopas qe asko kořmoran. “Na Yerusalemri urina, gam na nagé té deř gane atan qewa keř keř ban qe ospi duen?” eko anan. ¹⁹ Anew ge, nug kořmatan. “Keřnah ban?” eko anew, a kořewa oksa anes. “Nasaretrer Yesuřri né mariřu. Nug gagragsak naři ole né marian am keř keř san. Qewa ge, Tiwur amegwa am danahas amlagwa ole nug profet gagragsak ole. ²⁰ Gam pris dilag anqak danah am gumarak danah isanig ole orweksi ewlagwa meweg ker mawanakwa qeweg mousan. ²¹ Ig Israel nug ig kug owari buliko wigri-gri onigwa niewew dahmoretu weiram. Gam qenan ih kawa, qeweg mousan am gei ole deř kiam ate, gam kité ospi be. ²² Am as isangar os gei furwanah matmat nusigwa ateksi am bulieksi uriyeksi seweg durnig new katat iqé. ²³ Ag Yesus gařa qewa ospi niewew piéw, gam Tiwurdi doup piatweg Yesus buliko asé eksa anap. ²⁴ Danah isanig os matmatwa ateksa ge, as anéw qe sillah ole Yesus gařa qewa ospi piap,” eksa anap. ²⁵ Géri Yesus anan, “A dahmak kutuk ole. Profet dilag né yak algurer nie, gam ag nagur olag meře ospi me. ²⁶ Ag pite dosi ge Kristus kug naři ene oko mousko tatam am buliko asko ge kamsahlak gun olewa darig?” eko anan. ²⁷ Am nug digumeko Mosesri am profet la kunum dilag Né yakwa nugégé nusig yeg qe kunum a dolasri nug digu kusuko ismatan. ²⁸ Ag kaw ateg ole qe mourak waneksi ge, Yesus nug kaw qe éřurko attigri san. ²⁹ Gam danah ařit qe gagrag meksa anes,

“Na i ole ninig, keřdi ene gattu mane am kem noko malwé,” eksa anes. Géri nug a ole nilagri lousw ateg. ³⁰ Ag ke lelagri ařié dessi ge, Yesus beret os oko Tiwurdi kena sam elle unuqorko temko matan. ³¹ Qere sew ge, usihri a amlas fur kougwew peksa olas mouran ge nug Yesus. Gam a sén qewa nug ospi peppes ole qerořan. ³² A atété né marieksa anes. “Ig ihwa uriyettu nug Tiwurdi Né yak digu kusuko marié ge kuřunit koré,” eksa anes. ³³ Géri a usihri aseksa ole Yerusalem bulieksa ates. Ateksa qewa ge Yesus Béğur 11 qe am leilgar la ole qagulweg piares. ³⁴ Qewa ge aneg, “Meře! Nařinah buliko asan am ole Pita gumurko wanew nug pian,” éksi aneg. ³⁵ Am danah ařit Emeusri qe a attowa keř keř ihwa san qe marieksa am beret temko matew ge peksa olas mouran qeri anes.

Yesus Peg

³⁶ Sén ag né qeri marieppege, Yesus nugégé gumarko doko olagwa qere asko delle anan. “Tiwur o maror ag ole dalag.” ³⁷ Ag peksi ole dore piam essi olag fařko nou man. ³⁸ Gam Yesus anan, “Ag keřdi fařessi am olag ařit ole de? ³⁹ Da ewel fél ole duřfal ene pes. Da enan! Urwileksi pes, da dore os kawa. Keřdi dore ge téhu am kéwsi ole kawa.” ⁴⁰ Nug qere anko ge eweg am féğ ole ismaran. ⁴¹ Ag olag gamag aseweg dahmak kuřum og, qewa ag olag meře ospi man. Qeri Yesus kořmaran, “Ag kité lakri ewa os de te?” eko anan. ⁴² Anew ge ag kaké ařak os uksi moreg. ⁴³ Morweg ge, nug oko ag peppege ole lan. ⁴⁴ Nug anaran, “Da ag ole dettu anarin. Mosesri Řo yakwa, profet dilag Né yakwa am Dewitri Kasi Yakwa dasil ane qe kunum meřenah mou bérig,” eko anan. ⁴⁵ Anko ge, nug Tiwurdi Né yak olag mourdigri sew dahmak

asilag matlan. ⁴⁶ Nug anaran, “Tiwurdi Né yakwa ane, ‘Kristus qe nug kug na’ri oko mousko am de’r kiamba ge buliko asdig. ⁴⁷ Danahas olag buliew Tiwur dowe doweg am hipunin asilag kusuqrigri né qe nug wénihwa danahas kunum agop ag Né Kena qe kusulag. Am qe Yerusalem digumelag,’ eko ane. ⁴⁸ Ag qe ih ke’r ke’r ban peg qe kunum ole mariweg dues. ⁴⁹ Da Mem né fagqan qe dimlamurko Koulli Gun méwi u’irig. Am ag taun ewa

ih daweg atew Tiwur gagragsak mardig,” eko anan.

Yesus Saw Kappa Atan

⁵⁰ Qe dimba Yesus bégur omlarew taun pa’rweksi Betani mourak ateksi eweg sumko wittak maran. ⁵¹ Nug wittak marewew Tiwur sumko oko tew minarko saw kappa atan. ⁵² Géri ag Yesus binag méksi am olag gamag asak na’riwa bulieksi Yerusalem ateg. ⁵³ Am ag Tiwur Lougwa dessi Tiwur binag sumdew.